

O LE EKALESIA A IESU KERISO O LE AU PAIA O ASO E GATA AI • AOKUSO 2016

O Le Liahona



**O Se Vaaiga e
Faavavaau i Matafaioi
a Tamaitai, i. 26**

O Le A Moni le Uiga o le I
Ai o le Faatuatua? i. 16

O Auala e Mafai ai e Taitai
ona Fesoasoani i Autalavou
e Aoao Atu, i. 24

Tala i le Faamanuiaina:
O Auala Na Matou
Ola-Tutoatasai Ai, i. 36–41, 54



"Ua tuu mai ia te outou ia outou faamasino, ina ia outou iioa le lelei mai le leaga; ma o le ala e faamasino ai ua manino, ina ia mafai ona outou iioa ma se malamalama atoatoa, e pei o le malamalama o le ao mai le pouliuli o le po."

O Le Liahona, Aokuso 2016



4

O SAVALI

- 4 Savali a le Au Peresitene Sili: O Le Faamoemoe o le Alofa i le Aiga e Faavavaau**
Saunia e Peresitene Henry B. Eyring
- 7 Savali a Faiaoga Asiasi: Faafailleleina Faatasi o Aiga**



I LE FAAVAA

Luma: Ata na pueina e Matthew Reier o le tina ma le tama teine, na pueina i Ghana, Aferika i Sisifo. I totonus o le faavaa pito i luma: Ata na Pueina © iStock/Thinkstock. I totonus o le faavaa i tua: Les Nilsson.

TALA FAAALIA

- 16 Taliaina o le Finagalo ma le Taimi a le Alii**
Saunia e Elder David A. Bednar
O le faatuatua malosi i le Faaola, o le taliaina lea o Lona finagalo ma [Lana] Taimi, e tusa lava pe o le tali e le o le mea lea sa tatou faamoemoe pe mananao i ai.
- 26 O Le Avea ma se Tamaitai: O Se Vaaiga e Faavavau**
Saunia e Sharon Eubank
O se malamalamaga ma le faatinoga sa'o o le aoaoga faavava a le Atua i le Ekalesia, o se puna o le faamalosia mo tamaitai.
- 32 O Tusitusiga Paia na Leiloloa**
Saunia e Elder Gene R. Cook
E le gata ina taliina e le Alii a matou tatalo ae sa faamanuiaina foi le olaga o se tagata ese.

MATAGALUEGA

- 8 Tusigāmanatu o le Konafesi o Aperila 2016**
- 10 O Le Mea Tatou Te Talitonu I Ai: Tatou te Talitonu i le Tausia o Tulafono e Sefulu**
- 12 Ataata: O Mafuaaga e Sefulu Ou Te Fiafia ai i le Tusi a Mamona**
Saunia e David Fullmer
- 13 Auaunaga i le Ekalesia: O Se Meaalofa Sili Atu**
Saunia e Chris Deaver
- 14 Tala Fou o le Ekalesia: Au Peresitene o Eria**
- 24 Aoao Atu i le Ala a le Faaola: Fesoasoani i le Autalavou ia Aoao Atu**
Saunia e Brian K. Ashton
- 36 O Leo o Le Au Paia o Aso e Gata Ai**
- 80 Seia Tatou Toe Feiloai: Vavega**
Saunia e Elder Matthew Cowley



42

42 Ia Mauaa ia Keriso

Saunia e Elder L. Whitney Clayton
O Iesu Keriso o le [vaega] taua o se olaga faamanuiaina. O le atiina a'e o aa mausali faaleagaga ia te Ia e mafai ai ona tatou manumalo ma maua le filemu i le totonugalemu o o tatou tofotofoga.

49 O Oe E Tautupu

Saunia e Kathy Kipp Clayton
O mea e tolu e aloese ai ina ia mafai ona e ola e tusa ma lou taua e faavavau.

**50 Laveaiina e Lo'u Tuagane**

Saunia e Brittney Ann Harman
O le a ou faafetai pea i lo'u valaauliaina o lo'u tuagane e amata ona ma o i le malumalu ina ua atoa lona 12 tausaga, ona sa ou manaomia lana lagolago i tausaga mulimuli ane.

53 Pepa Lautele o I Ai se Savali: Aua le Aafia Fua Ai**54 Faia o se Oso i Lona Lumanai**

Saunia e Miriam Bay
Ina ua uma ona auai i se vasega o le ola tutoatasina nua ofoina mai e le Ekalesia, sa amataina ai e se tasi o teineitiiti e 11 tausaga le matua se pisinisi tapoleni osooso ina ia manuia ai lona nuu.

58 Fesili ma Tali

E i ai sau uo e lagonaina e pei e leai ni ana uo i le lotu sei vagana ai a'u. O le a se mea e mafai ona ou faia e fesoasoani ai ia te ia?

60 Ua Na'o le Fesoasoani lava a le Atua

Saunia e Elder Timothy J. Dyches


63 O Tali mai Taitai o le Ekalesia: Auala ia Tumau ai le Agavaa

Saunia e Peresitene Thomas S. Monson

64 O Le Auala Na Ou Iloa Ai: Sailiga mo le Atua

Saunia e Ismael Ezequiel Polanco Almonte

68

**66 Ia I Ai i le Mea e Ao ona Tatou I Ai**

Saunia e Elder Randy D. Funk
O le tu i nofoaga paia o lona uiga o le faia o mea lelei. O a ni auala e mafai ona e tu ai i nofoaga paia?

68 O Le Tama'i Fagu o le Filemu

Saunia e Ray Goldrup
Sa le'i mafaufau tele Gage i le fagu e leai se mea na i ai lea sa tuu atu e lona tamamatua ia te ia, sia oo i ni nai vaiaso mulimuli ane ina ua maliu le tamaloa o lona aiga.

70 O Lima, o le Loto, ma se Ataata


Saunia e Laura Burton
Sa manao Litia ia aulelei ia pei uma lava o lona tina, ae sa le'i i ai sana vali laugutu. Na ta'u atu e lona tina ia te ia le mea e sau mai ai le lalelei moni.

72 O Tali mai se Apostolo: Aisea e taua tele ai aiga?

Saunia e Elder D. Todd Christofferson

73 O La Tatou Itulau**74 Toa o le Tusi a Mamona: Na Molimau Atu Samuelu****75 E Mafai Ona Ou Faitauina le Tusi a Mamona****76 Tala o le Tusi a Mamona: Ua Aoao Mai Samuelu e uiga ia Iesu****79 Itulau e Valivali**

64



O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululuua:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: James B. Martino, Carol F. McConkie

Fautua: Brian K. Ashton, Randall K. Bennett, Craig A.
Cardon, Cheryl A. Esplin, Christoffel Golden, Douglas D.
Holmes, Larry R. Lawrence, Carole M. Stephens

Pule Faatonuilli: Peter F. Evans

Faatonuili o le Lagolago mo Aiga ma

Tagata o le Ekalesia: Vincent A. Vaughn

Faatonuili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Megan VerHoef Seitz

Au Tusitusi ma Faatonutonu: Brittany Beattie, David
Dickson, David A. Edwards, Matthew D. Flitton, Lori
Fuller, Garrett H. Garff, LaRene Porter Gaunt, Jill Hacking,
Charlotte Larcabal, Michael R. Morris, Eric B. Murdock,
Sally Johnson Odekirk, Joshua J. Perkey, Jan Pinborough,
Richard M. Romney, Mindy Anne Selu, Paul VanDenBerghe,
Marissa Widdison

Pule Faatonusili Tusiati: J. Scott Knudsen

Faatonusili Tusiati: Tadd R. Peterson

Au Mamau: Jeanette Andrews, Fay P. Andrus, C. Kimball
Bott, Tom Child, Nate Gines, Colleen Hinckley, Eric P.
Johnsen, Susan Lofgren, Scott M. Mooy, Mark W. Robison,
Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett,
Bryan W. Gygi, Ginny J. Nilson, Gayle Tate Rafferty,
Derek Richardson

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le
Faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atos \$6.60 (Samoa).

**Auina atu tusitusiga ma faafesili i luga o le
initoneti** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuala") e lomia i le faa-Alepania, Aminia
(Sasae), Pisilama, Palekeria, Kemupotia, Sepuanu, Saina,
Kalaotia, Siekislovakia, Tenimaka, Take, Igilisi, Esitonia,
Fiti, Finelani, Farani, Siamani, Eleni, Hanikeri, Initu, Iseleni,
Initonisia, Italia, Japani, Kiripati, Korea, Latvia, Litunia,
Malakasa, Maselua, Monokolia, Nouei, Polani, Potukale,
Romania, Rusia, Samoa, Saina (ua faafaofigieina), Silovenia,
Sipaniolu, Suetena, Swahili, Tagaloka, Tahiti, Tai, Toga,
Iukureini, Urutu, ma Viatename. (E eseese lava gagana.)

© 2016 Puletaofia e le Intellectual Reserve, Inc. Ua taofia
aia tatau uma. Lomia i le lunaite Setete o Amerika.

E mafai ona kopi talia ma ata o le *Liahona* mo le toe
faaaogaina i lotu po o le aiga ae ia le faia ai ni pisinini. E le
tatau ona kopi ni talo po o ni ata po afai o faasa mai i le
laina o loo ta'ua ai le e ona le faatufugaga. Auina atu fesili
e uiga i le puletaofia e le Intellectual Property Office, 50 East North
Temple Street, Salt Lake City, UT 84150, USA; i-meli:
cor-intellectualproperty@ldschurch.org.

For Readers in the United States and Canada:

August 2016 Vol. 40 No. 8. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address must be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi faaleaiga.
O ni faataitaiga nei se lua.



**"O Mafuaaga e Sefulu Ou Te Fiafia ai
i le Tusi a Mamona,"** itulau e 12: A uma
ona faitau faatasi o se aiga lenei tusiga,
e mafai ona e valaaulia tagata taitasi o le
aiga e lisi ia mafuaaga latou te fiafia ai i
le Tusi a Mamona. Mafaufau e tuu atu i
tagata taitoatas i faasoa mai a latou lisi
ma a latou mau e sili ona fiafia i ai mai le
Tusi a Mamona. E mafai ona e faia se sini
e vaavaai mo nisi mafuaaga e fiafia ai i le
Tusi a Mamona a o outou faitaufina faatasi
e le aunoa.

"la I Ai i le Mea e Ao ona Tatou I Ai,"
itulau e 66: E mafai ona e faitau e uiga i
le aafiaga a Elder Funk i le filifili e tu i se
nofoaga paia ona fai lea o le gaoioiga o
loo avatu faatasi ai i le itulau e 67. Mafau-
fau e talanoa o se aiga i mea e paia ai se
nofoaga ma pe mafai faapetfea e tagata
taitoatas i ona tutu i nofoaga paia, e tusa
lava pe e le o totonusi o se falesa po o se
malumalu. Talanoa i le taua o le matafaioi
a le Agaga Paia i le fesoasoani ia tatou tutu
i nofoaga paia.

FAAOPOOPOGA O LOO MAUA I LE INITONETI

O loo maua le *Liahona* ma isi mea e faaaoga a le Ekalesia i le tele o gagana i le
languages.lds.org. Asiasi i le facebook.com/liahona.magazine (e maua i le
gagana Peretania, Potukale, ma le Sipaniolu) e sue ai savali musuia, manatu mo
afiafi faaleaiga, ma mea e faaaoga e mafai ona e faasoa atu i au uo ma aiga.

AUTU I LE LOMIGA LENEI

O numera e faasino i le itulau muamua o le tusiga.

Agaga Paia, 26, 54, 66, 68

Agavaa, 63

Aiga, 4, 7, 50, 72

Aitalafu, 39

Alofa, 4, 70

Aoao atu, 13, 24

**Aoaoga Faavae a
Keriso,** 26

Auai i le Lotu, 50, 66

Auauna atu, 13, 54, 70

Autalavou, 24

**Faamanuiaga faaleperisi-
tua,** 16, 80

Faatuatua, 16, 38, 42,
60, 80

Galuega, 38

Galuega faalemalumalu,
4, 50

Iesu Keriso, 12, 16, 42, 73,
75, 76

Liua, 32, 64

Molimau, 63, 74

Natura paia, 26, 49

Ola-tutoatası, 36, 37, 38,
39, 40, 41, 54

Ponokalafi, 63

**Sauniuniga mo faalave-
lave faafusei,** 36

Sefuluai, 79

Seminare, 64

**Soifua maloloina
faaletino,** 16, 37

Talafaasolopito o aiga, 50

Tatalo, 32, 60, 64

Tekinolosi, 53

Teuina o meaai, 40

Togiola, 4, 16, 42

Tusi a Mamona, 12, 63,
74, 75, 76

Tusitusiga Paia, 32

Uo, 58, 64

Upu o le Poto, 37, 63

Usiusitai, 10, 42

Valaauga, 13

Vavega, 80



Saunia e
Peresitene
Henry B. Eyring
Fesoasoani Muamua
i le Au Peresitene Sili

OLE FAAMOEMOE OLE Alofa i le Aiga e Faavavaau

Mai meaalofa uma ua tuuina mai e lo tatou Tama Faalelagi i Lana fanau, o le meaalofa silisili lava o le ola e faavavaau (tagai MF&F 14:7). O lena meaalofa o le nonofo lea e faavavaau i le afioaga o le Atua le Tama ma Lona Alo Pele i ni aiga. E na o malo aupito maualuga o le Atua, o le selesitila, o le a faaauau ai sootaga alofa o le olaga i le aiga.

O i tatou uma lava e faamoemoe mo le olioli o le nonofo ai i ni aiga agaalofa. Mo nisi o i tatou, o se lagona tatou te le'i oo i ai—o se lagona ua tatou iloa e mafai ona maua ae le'i oo i ai. Atonu na tatou vaai i ai i olaga o isi. Mo nisi o i tatou, o le alofa i le aiga ua foliga mai e sili atu le moni ma le pele pe a tuuveseeseina i tatou e le oti mai se tamaitiiti, se tina, se tama, se uso, se tuafafine, po o se matua o matua agaalofa ma peleina.

Ua tatou lagonaina uma le faamoemoe ia i ai se aso tatou te toe lagona ai le alofa mafanafana a lena tagata o le aiga sa tatou matuai alofaina ae ua oi nei ia toe opoina.

E silafia e lo tatou Tama Faalelagi agaalofa o tatou loto. O Lona faamoemoega ia tuu mai ia i tatou le fiafia (tagai 2 Nifae 2:25). Ma o lea na Ia tuuina mai ai le meaalofa o Lona Alo ina ia mafai ai ona maua le olioli i sootaga faale-aiga lea e faaauau e faavavaau. Ona sa motusia e le Faaola filifili o le oti, o le a faapea ona tatou toetutu ai. Ona sa Ia togiolaina a tatou agasala, tatou te mafai ai, e ala i le faatua ma le salamo, ona agavaa i le malo selesitila, lea e fusia faatasi ai aiga i le alofa e faavavaau.

Na auina mai e le Faaola le Perofeta o Elia ia Iosefa Samita e toefuatai mai ki o le perisitua (tagai MF&F 110).

Faatasi ai ma na ki na oo mai ai le mana o le faamauga, o le ofoina mai o le meaalofa sili a le Atua i Lana fanau—le ola e faavavaau i aiga e fusia faatasi e faavavaau.

O se ofo e mafai ona talosaga i ai atalii/afafine uma o le Atua o e e o mai i lenei lalolagi. O le tasivaetolu o Ana fanau agaga na teena Lana ofo i le lalolagi o agaga. Ona o le leai o se faatuatua ma le faaali atu o le fouvale aliali, sa latou filifili ai ia le iloa lava le olioli o le meaalofa a le Tama Faalelagi o aiga e faavavaau.

Mo i tatou o e ua pasia le suega taua i le muai lalolagi o agaga, ma faapea ona agavaa ai e maua le meaalofa o tino faitino, o le filifiliga maoae o le ola e faavavaau e a tatou lava e fai. Afai ua faamanuiaina i tatou e maua le talalelei toefuataiina, e mafai ona tatou filifili e osia ma tausia feagaiga a le Atua lea tatou te agavaa ai mo le ola e faavavaau. A o tatou tumau i lena faamaoni, o le a faamaonia e le Agaga Paia lo tatou faamoemoe ma le talitonu o loo tatou i ai i le ala i le ola e faavavaau, ia nonofo faatasi i ni aiga e faavavaau i le malo selesitila.

Mo nisi, o lena olioli e faavavaau e ono foliga mai o sina atagia tainane foi o se faamoemoega e galoo atu. Atonu na fai e matua, fanau, uso, ma tuafafine ni filifiliga e foliga mai e faaleaoga ai i latou mo le ola e faavavaau. Atonu foi e te mafaufau, pe mata ua e agavaa e ala i le Togiola a Iesu Keriso.

Sa tuuina mai e se perofeta a le Atua ia te a'u le fautuaga ua aumai ai ia te a'u le toofilemu. Sa ou popole ona atonu o le a le mafai ai e lo matou aiga ona faatasia e faavavaau ona



o filifiliga a isi. Sa ia saunoa mai, "Ua e popole i le faafitaui sese. Tau lava o lou ola agavaa mo le malo selesitila, ma o le a sili atu le matagofie o le faatulagaga o le aiga nai lo le mea e mafai ona e manatu i ai."

Ia i latou uma o e ona o aafia ga faaletagata lava ia po o faaipoipoga ma fanau—po o le leai o na mea —ua lafo atu ai se puao i o latou

faamoemoe, e tuuina atu la'u molimau: O loo silafia ma alofa le Tama Faalelagi ia te oe o Lona atalii/afafine agaga. A o e i ai faatasi ma Ia ma Lona Alo Pele a o le'i i ai lenei olaga, sa Laua tuuina i lou loto lou faamoemoe o loo i ai e uiga i le ola e faavavau. Faatasi ai ma le mana o le Togiola a Iesu Keriso e galulue faatasi ma le tai-taiga a le Agaga Paia, e mafai ai ona e

lagona i le taimi nei, ma o le a lagona i le lalolagi a sau le alofa o le aiga lea e matuai finagalo lou Tama ma Lona Alo Pele ia e mauaina.

Ou te molimau atu a o e ola agavaa mo le malo selesitila, o le folafolaga faaperofeta e faapea, "o le a sili atu le matagofie o le faatulagaga o le aiga nai lo le mea e mafai ona e manatu i ai" o le a fai mo oe. ■

AOAO ATU MAI LENEI SAVALI

Mafaufau e amata i le ta'u atu ia i latou e te aoaoina me uiga i se taimi na e faafetai ai mo le faamoemoe o aiga e faavavau. Valaaulia i latou e mafaufau loloto i tami na latou lagona ai le agaga faafetai mo aiga e faavavau. Fesili atu ia i latou pe latou te fia faasoa mai. Ona

e valaaulia lea o i latou e mafaufau i ni auala e faaleleia atili ai ma atili ola agavaa ai i le malo selesitila ina ia mafai ona fai mo i latou le folafolaga faaperofeta, "o le a sili atu le matagofie o le faatulagaga o le aiga nai lo le mea e mafai ona e manatu i ai."

Faasoa Atu o le Fiafia e Faavavau

O se tasi o mea e sili ona manaia e uiga i le talalelei o le malamalama e uiga i le ata o le faaolataga. Tatou te maua le avanoa matagofie e faatasi ai ma o tatou aiga mo le faavavau. O lena malamalama e fesoasoani tatou te maua ai le faamoemoe i soo se taimi tatou te lagona ai le lofituina e le lalolagi. Ua aoao mai Peresitene Eyring, "E silafia e lo tatou Tama Faalelagi agaalofa o tatou loto. O Lana fuafuaga o le aumaia ia i tatou o le fiafia (tagai 2 Nifae 2:25). O lea na la tuuina mai ai le meaalofa o Lona Alo ia mafai ai ona maua le olioli o sootaga faaleaiga e faaaauau e faavavau. . . . O se ofo lea e mafai ona maua e atalii ma afafine uma o le Atua e o mai i le lalolagi."

O lena faamanuiaga e faatatau ia i tatou o loo ola i le taimi lenei ma ia i latou o e ua maliliu—peitai e na o la tatou fesoasoani lava e mafai ai. O o tatou tuaa o loo i le lalolagi o agaga i le taimi nei, o loo faatalitali mai mo i tatou e saunia o latou igoa mo sauniga o le malumalu ina ia faataunuina e fai ai ma o latou sui. Peitai o nisi o taimi e faigata ai ona fai



le galuega mo i latou. Atonu tatou te pisí tele, pe atonu e mamao mea tatou te nonofo ai mai se malumalu e o atu soo ai i ai.

O le mea e lelei ai, o loo i ai isi auala e mafai ona tatou fesoasoani ai i o tatou tuaa, e pei o le faiga o galuega tala-faasolopito o aiga, taina faalelei o igoa o tagata ua maliliu, po o le vaaiga o nai o tatou tei ae o atu o tatou matua i le malumalu. E ala i le fesoasoani atu, tatou te auauna atu ai i le Alii ma aumai le faamoemoe o aiga e faavavau ia i latou o loo i le isi itu o le veli.

E Faavavau Aiga

Ona o le Togiola a lesu Keriso ma le toefuataiga o mana o le perisitua e faamau ai aiga, ua mafai ai ona tatou toe nonofo e faavavau ma o tatou aiga! O a mea e te fiafia ai e uiga i lou aiga? Mulimuli i faatonuga nei e fai ai le filifili pepa e faailoga ai lou aiga.

1. Gagau faalua se fasipepa i le afa ina ia maua ai se fasipepa umi e tasi.
2. Tusi se ata o se tagata ma ona lima e tau atu i tulimanu o loo gagau.
3. Oti ese le ata o le tagata. Aua le otia le vaega o loo papai atu ai lima i tulimanu o loo gagau.
4. Talatala. Tusi se faaupuga po o se ata o se mea e te fiafia ai e uiga i tagata taitoatasí o le aiga.
5. Faapipii faatasi ni filifili pepa se tele pe afai e toatele lou aiga!



Ia suesue ma le agaga tatalo lenei savali ma saili ia iloa mea e faasoaa atu. O le a faapefea ona faateleina e le "O Le Aiga: O Se Folafolaga i le Lalolagi" lou faatuatua i le Atua ma faamanuita ai i latou e te tausia i faiaoga asiasi? Mo nisi faamatalaga, alu i le reliefsoociety.ids.org.

Faafaileleina Faatasi o Aiga

"O le tane ma le ava ua i ai se tiutetauave paia e alofa ma tausi e le tasi le isi ma a la fanau."¹ Na saunoa Peresitene Russell M. Nelson, Peresitene o le Korama a Apostolo e Toasefululua e faapea, "O le aiga e tatau ona avea ma fale su'usu'e o le Atua mo le alofa ma le auauna atu."

"E finagalo lo tatou Tama Faalelagi i tane ma ava ina ia faamaoni a'i'a'i le tasi i le isi, ma ia faataua ma tausi a latou fanau o se tofi lea mai le Alii."²

I le Tusi a Mamona, ua saunoa mai ai Iakopo e faapea, o le alolofa o tane i a latou ava, o le alolofa o ava i a latou tane, ma le alofa o loo ia i lau mo a laua fanau, o nisi ia o mafuaaga sa sili atu ai i se tasi o taimi le amiontonu o sa Lamana nai lo o sa Nifae (tagai Iakopo 3:7).

O se tasi o auala sili ona lelei e valaaulia ai le alofa ma le lotogatasi



i totonu o o tatou aiga, o le tautala ma le alofa i tagata o o tatou aiga. O le tautala ma le alofa e aumai ai le Agaga Paia. Sa talosaga mai Sister Linda K. Burton, peresitene aoao o le Aualofa, ina ia tatou mafaufau: "Na faafia ona tatou 'fai [atu ni] upu alofa i le tasi' ma le loto i ai?"³

Mau Faaopoopo

Roma 12:10; Mosaea 4:15; Mataupu Faavae ma Feagaiga 25:5

Mafaufau i le Mea Lenei

E faapefea e le alofa ma le agalelei i le tasi ma le isi ona valaaulia ai le Agaga i totonu o o tatou aiga?

FAAMATALAGA

1. "O Le Aiga: O Se Folafolaga i le Lalolagi," *Liahona*, Nov. 2010, 129.
2. Russell M. Nelson, "Faaolataga ma le Faaeaga," *Liahona*, Me 2008, 78.
3. Linda K. Burton, "O le a Tatou o A'e Faatasi i Luga," *Liahona*, Me 2015, 31.
4. D. Todd Christofferson, "Ia Tatou Faamatane," *Liahona*, Nov. 2006, 46–48.

Faatuatua, Aiga,
Toomaga



O Tala Ola

Sa faasoaa mai e Elder D. Todd Christofferson o le Korama a Apostolo e Toasefululua se aafiaga a o laitiiti na tamau ai ia te ia le taua o se aiga alofa. A o matou laiti ma o'u uso, sa faia ai se taotoga tele o lo latou tina ona o le kanesa, lea sa matuai tiga ai o ia pe a faaaoga lona lima taumatau. Faatasi ai ma se aiga o tama, sa tele ni auliga, ae a o auli lona tina, sa masani ona taofi ae alu i totonu o le potu e tagi ai seia oo ina te'a le tiga.

Ina ua iloa e le tama o Elder Christofferson le mea sa tupu, sa faalilolilo ona alu o ia e aunoa ma ni ana meaai i le aoauli toe-toe lava mo se tausaga atoa, ina ia lava ai se tupe e sefe e faatau mai ai se masini na faafaigofie ai le auliga. Ona o lona alofa i lona toalua, sa ia faia ai se faataitaiga o le faafailelega i totonu o aiga mo lana fanau tama. E faatatau i lenei fesootaiga faagaeetia, na saunoa ai Elder Christofferson, "Ou te le'i iloa le ositaulaga ma le agaalofa o lo'u tama mo lo'u tina i lena taimi, ae o lea ua ou iloa, ou te faapea ifo ia te a'u lava, 'O se tamatane lena.'"⁴

TUSIGĀMANATU O LE KONAFESI O APERILA 2016

“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e iloiloina le konafesi aoao ia Aperila 2016, e mafai ona e faaaogaina itulau nei (ma Tusigāmanatu o le Konafesi i lomiga i le lumanai) e fesoasoani ia te oe e suesue ma faaaoga aoaoga talu ai nei a perofeta ma aposestolo soifua ma isi taitai o le Eklesia.



AOAOGA FAAVAE UA FAAMAMAFAINA

O se Faamagaloga o a Tatou Agasala

“O sauniga o le papatisoga e ala i le faatofuina, o le faaeeina o lima mo le meaalofa o le Agaga Paia, ma le faamanatuga e le o ni mea tutupu e mavaevae ma tuueseeseina; ae, o i latou o ni elemene i se mamanu fesootai ma tuufaatasia o le alualu i luma i le faaaogaina o le togiola. O sauniga taitasi e sosoo ai e siitaina ma faalauteleina lo tatou faamoemoega faaleagaga, manaoga, ma faatinoga. O le fuafuaga a le Tama, le Togiola a le Faaola, ma sauniga o le talalelei e maua ai le alofatunoa tatou te manaomia e fetaomi ai i luma ma alualu ai i luma i lea laina ma lea laina ma lea mataupu ma le mataupu e agai atu i lo tatou taunuuga e faavavau.”

Elder David A. Bednar o le Korama a Apostolo e Toasefululu, “[Faatumauina] Pea le Faamagaloina o a Outou Agasala,” *Liahona*, Me 2016, 62.

FOLAFOLAGA FAAPEROFETA



Faavavau

“O la’u savali i le po nei o se taumafaiga e faamatala . . . mea e tatau ona tatou faia i le avea ai ma se vaega o le fuafuaga o le fiafia lea na sauniaina e lo tatou Tama Faalelagi mo i tatou. Ae tatou te lei fananau mai, sa tatou ola i se aiga faatasi ma lo tatou Tama Faalelagi e faavavau ma faaeaina. Sa la faauuina se fuafuaga lea e mafai ai e i tatou ona siitia ma alualu i luma ia avea e faapei o la. Sa la faia ona o le alofa mo i tatou. O le faamoemoega o le fuafuaga o le faatagaina lea o i tatou ia maua le avanoa e ola ai e faavavau e pei ona soifua ai lo tatou Tama Faalelagi. Ua ofo mai e lenei fuafuaga o le talalelei ia i tatou se ola o le olaga faaletino lea o le a tofotofoina ai i tatou. Sa tuuina mai se folafolaga e faapea e ala mai i le Togiola a lesu Keriso, afai tatou te usiusitai i tulafono ma sauniga faaleperisitua o le talalelei, o le a tatou maua le ola e faavavau, le meaalofa sili o Ana meaalofa uma.”

Peresitene Henry B. Eyring, Fesoasoani Muamua i le Au Peresitene Sili, “O Aiga e Faavavau,” *Liahona*, Me. 2016, 81.

LAINA TUTUSA

Matafaioi Paia o Alii

E talanoaina i nisi taimi e le tele o failauga le autu lava lea e tasi o le talalelei. O saunoaga nei e tolu na faia e uiga i matafaioi paia o alii:

- Tane: “Taulimaina lau ava . . . i le ala o loo taulimaina ai oe e le Tama Faalelagi.” —Henry B. Eyring, “O Aiga e Faavavau,” 83.
- O e umia le perisitua: “ia ola e tusa ma o [ou] avanoa o e umiaina le perisitua. I se aso a sau, *e na* o alii lava na latou tauaveina ma le manatu mamaafa lo latou perisitua, e ala i le saili atu ma le *filiga* ina ia aoaoina e le Alii lava Ia, o le a mafai ona faamanuiaina, taiatalaina, puipuia, faamalosia, ma faamaloloina isi.” —Russell M. Nelson, “O le Tau o le Mana o le Perisitua,” 67–68.
- Tama: “O le matafaioi a le tamā e paia lona faavae, na amata mai i se Tama i le Lagi ma oo mai, i lenei lalolagi faaletino, faatasi ai ma le Tama o Atamu. . . . “. . . O le tulaga faatamā e manaomia ai le ositalaulaga. . . .

“O le alofa i le tina o lana fanau—ma le faaalia o lena alofa—o le lua ia o ni mea sili ona lelei e mafai e se tamā ona faia mo lana fanau. E faamau-sali ma faamalosia ai le faaipoipoga lea e avea ma faavae o lo latou olaga ma le saogalemu faaleaiga.” —D. Todd Christofferson, “O Tama,” 94, 95.



Tala Maoae mai le Konafesi

O le a se mea e sili ona tosina ai lo tatou mafaufau nai lo o se tala? O nisi nei o tala mai le tele na faasoai mai i le konafesi:

- O le a le sootaga i le va o fua o magnolia ma le ala e faia ai e le alofa le avanoa mo isi i o tatou olaga? —Tagai Neill F. Marriott, “Se a Se Mea Tatou te Faia?” 10.
- Aisea na nofo ai Elder Hales ina ua maea le konafesi e lulu lima ma tagata uma lava? —Tagai Robert D. Hales, “O Le Agaga Paia,” 105.
- I le 11 o tausaga, sa avea ai Yvette Buggingo ma se tagata sulufai, o lona tama na fasiotia ma o ona tuagane e toatolu na leiloloa. Na faapefea le faaiuga o lana tala? —Tagai Linda K. Burton, “Sa Fai Au ma Tagata Ese,” 13.
- E mafai faapefea e nei tala i tamaiti o le Au Paia o Aso e Gata Ai mai aiga e le lolotu ona uunaia i tatou i mea e ao ona fai? —Tagai Neil L. Andersen, “Ai Se Talia i Latou ua Talia A’u”, 49.

“O le usiusitai o le toto ola lea o le faatuatua.”

Peresitene Dieter F. Uchtdorf,
fesoasoanilua i le Au Peresitene Sili,
“O Le A la Tuu Oe i lugia o Ona Tauau
ma Ave Oe i le Aiga,” *Liahona*,
Me 2016, 103.

Ina ia faitau, matamata, pe faalogo i saunoaga o le konafesi aoao, asiiasi i le conference.lds.org.

TATOU TE TALITONU I LE TAUSIGA O TULAFONO E SEFULU

O Tulafono e Sefulu o loo maua i le Feagaiga Tuai (tagai Esoto 20:1–17), ae ua iloa e le Au Paia o Aso e Gata Ai, o na poloaiga e faata-tau i augatupulaga uma, ae e le na o taimi o le Feagaiga Tuai. Sa aoao mai e Apinati ia Tulafono e Sefulu i le Tusi a Mamona (tagai Mosaea 12:33–36; 13:13–24), ma na toe faaali mai i latou e le Alii i le Perofeta o Iosefa Samita mo o tatou vaitaimi (tagai MF&F 42:18–29; 59:5–13).

E ui lava ina lafoai e le toatele o tagata i aso nei ia nei poloaiga, ae tatou te talitonu o loo aoga pea i latou. Na faamalamalama mai e Peresitene Thomas S. Monson:

“O amioga sa manatu muamua i ai e le talafeagai ma lē mama, i le taimi nei ua le gata ina onosaia ae ua manatu foi le toatele o tagata ua taliaina. . . .

“E ui lava ua suia le lalolagi, ae o loo tumau pea ia tulafono a le Atua. E le’i suia lava; ma o le a le suia lava. O Poloaiga e Sefulu e tonu—o polo-aiga lava. E *le* o ni fautuaga. Ua tutusa lelei lava lo latou taua i aso nei e pei ona i ai foi i le taimi na tuu atu ai e le Atua i le fanauga a Isarael.”¹

Tatou te le tautala leaga e uiga i isi ona o le le mulimuli i poloaiga. Ae, tatou te vaai ifo i o tatou lava olaga ma iloilo ai po o le a le lelei o loo

tatou ola ai i aaoaga faalelagi ua tuu-inia mai ia i tatou.

O Tulafono e Sefulu ua faatusa i tulaga faatauaina autu o le amio, lea e mafai ona vaevaeina i ni vasega se lua: o le ala tatou te faia ai le Atua ma le ala tatou te faia ai isi. Ina ia fesoasoani ia tatou faatumauina le Atua i le totonugalemu o o tatou olaga, ua Ia poloaiina ai i tatou ia aua ne’i ifo atu i ni isi lava atua, ia tausia le paia o le aso Sapati, ma ia aloese mai le upuvale ma le ifo i tupua. Ina ia fesoasoani ia tatou alolofa i fanau a le Atua, ua Ia poloaiina ai i tatou ia ava i o tatou matua ma aua le gaoi, fasioti tagata, pepelo, mana’o, pe mulilua.

Ona o faaaliga faifaipea a le Atua i Ana perofeta, ua tatou aoao atili ai e uiga i mea ua Ia faamoemoe mai ia i tatou, ae e tumau lava ona avea Tulafono e Sefulu o se nofoaga lelei e amata ai i la tatou sailiga ia usiusitai. “O poloaiga a le Atua o se faailoaga o Lona alofa mo i tatou, ma o le usiusitai i Ana poloaiga o se faailoaga lea o lo tatou alofa mo Ia.”² ■

“O le fea poloaiga o i le tulafono ua sili?” Tagai i le tali a le Faaola i le Mataio 22:37–40.

FAAMATALAGA

1. Peresitene Thomas S. Monson, “Tutu i Nofoga Paia,” *Liahona*, Nov. 2011, 83.
2. Carole M. Stephens, “Afai Tou te Alofa Mai ia te Au, Ia Outou Tausi i Au Poloaiga,” *Liahona*, Nov. 2015, 120.

O POLOAIGA E MO LO TATOU FIAFIA



“E le i aumaia poloaiga a le Atua ina ia faaoso ita ia i tatou pe avea ma ni faafitali i lo tatou fiafia. Ae e moni le faafeagai.

O Le na foafoaina i tatou ma alofa ia i tatou ma le atoatoa, e silafia le auala tatou te manaomia ona ola ai i olaga ina ia maua le fiafiaga silisili e mafai ona maua. . . .

“Ua lava le alofa o lo tatou Tama Faalelagi ia i tatou ua fetalai mai ai: Aua e te molimau pepelo; aua e te gaoi; aua e te mulilua; ia e alofa atu i lou tuaoi e pei o oe lava ia te oe; ma isi mea faapena. Ua tatou iloa poloaiga. E malamalama o la a tatou tausia poloaiga, o le a fiafia atu o tatou olaga, faamalieina atili, ma faaitiitia le lavelave.”

Peresitene Thomas S. Monson, “Tausi i Poloaiga,” *Liahona*, Nov. 2015, 83.

O nisi nei o faataitaiga o le
ola ai i poloaiga i aso nei:


"Aua ne'i e fai mo oe ni atua
ese i o'u luma" (Esoto 20:3).
*E ui o le toatele o tagata e
le o faaosoooina i aso nei
e tapuai i se tama'i povi
auro, ae e le tatau ona tatou
tapuai i "tupua" e pei o viiga
po o mea o le lalolagi (tagai
2 Nifae 9:30).*



"la e ava i lou tama ma
lou tina" (Esoto 20:12).
*O lenei mea e mafai ona
aofia ai le ava i o tatou
tuaa, o tatou matua, ma
o tatou matua faalelagi.*



"la manatua le aso sapati, ia tausi lona
paia" (Mosaea 13:16). O le tausia o le
aso Sapati e mafai ona fesoasoani tatou
te aoao ai ia i ai se manatu "e tau-tasi
i le mamalu o le Atua" (MF&F 88:67).



"Aua e te manao" (Esoto 20:17).
*O le manao e oo atu ai, i isi mea
e aofia ai le, le faamalieina ma le
le fiafia.*



"Aua e te mulilua" (Esoto 20:14).
*O le i ai o ni mafaufauga mama e
fesoasoani tatou te tausia ai lenei
poloaiga (tagai MF&F 42:23).*

O MAFUAAGA E SEFULU OU TE FIAFIA AI I LE TUSI A MAMONA

Saunia e David Fullmer

I le avea ai o se molimau lona lua a Iesu Keriso, o lenei tusi ofoofogia ua aoao mai ai matapu ma aoaoga faavae e le o maua i se isi lava mea.


Ou Te Fiafia i le Tusi a Mamona I se tulaga lautele, ou te fiafia lava i ai mo le mana o loo i ai i le aumaia o le au faitau “ia latalata i le Atua e ala i le usitaia o ona mataupu, nai lo se isi lava tusi.” Atonu o le mafuaaga lena na faatatau i ai le Perofeta o Iosefa Samita o le “maaaauau o la tatou tapu-aiga,” ma “e silisili ona sa’o i loo se isi tusi i le lalolagi.”¹

Ae ou te fiafia foi i le tusi mo ni mafuaaga patino. O ni mafuaaga nei se 10 o le tele o mafuaaga:

O Le Tusi a Mamona . . .

1. Sa tusia i se vaitaimi e tasi o le talafaasolopito e faaaoga e le au faitau o le isi [vaitaimi]—o tatou. Tagai Mamona 8:16, 34–35.
2. O loo faamatala manino mai ai metotia a Lusifelo mo le faasala-lauga o mea faataumaoi i aso e gata ai. Tagai 2 Nifae 28:3–29.
3. Ua tautino mai o vaivaiga faaletagata o se avanoa ia malosi ai, ma o le o mai ia Keriso ma le lotomaualalo, o se mea lea e manaomia. Tagai Eteru 12:27.
4. Ua faamatalaina le alofa moni o le alofa mama lea o Keriso ma o se meaalofa paia e mafai ona faia i ni laasaga patino ina ia maua ai. Tagai Moronae 7:43–48.

5. O loo faamanino mai ai le manaomia o le faafeagai i mea uma. Tagai 2 Nifae 2:11–13.
6. O loo faamatala tonu ma manino ai tulaga e mafai ai e le alofa mutimutivale ona faamalie manaoga o le faamasinotonu. Tagai Alema 34:11–30.
7. O loo tusifaamaumau ai vaega se *hua* o tagata na tuu i ai ni faa-tonuga faapitoo ia suesue i upu a Isaia, o le tasi o ia [vaega] o i tatou. Tagai 2 Nifae 25:4–8; Mamona 8:23.
8. Ua avea o se soa molimau faatasi ma le Tusi Paia i le sootaga a le Atua ma le tagata, e pei ona muai ta’ua i se valoaga o le Feagaiga Tuai. Tagai Esekielu 37:15–20; 2 Nifae 28:29; 29:3–8.
9. O loo i ai se folafolaga, afai tatou te faitau ma tatalo e uiga i ai ma se loto faamaoni, ma le faatuatua ia Keriso, o le a faaalia mai e le Alii ia i tatou o Lana lava upu lea. Tagai Moronae 10:4–5.
10. Ua aoao mai, o puapuaga o le Faaola na tuuina atu ai ia te Ia le malamalamalama lelei i o tatou tofotofoga ma le tomai e fesoasoani ai ia i tatou a o tatou tauivi ma na [tofotofoga]. Tagai Alema 7:11–13.



E sili i lo na mea uma, ou te fiafia i le Tusi a Mamona ona o lana molimau manino o Iesu o le Keriso. Ou te fiafia i ai mo lana folafolaga o le a iu lava ina togiola uma e le Alii le aiga o Israaelu pe a latou osia ma tausia feagaiga paia ma Ia. O le Tusi a Mamona o se vavega o ona po nei—o se meaalofa o le alofa ia i tatou mai le Atua lava Ia. ■

E alala le tusitala i Iuta, ISA.

FAAMATALAGA

1. Iosefa Samita, i le faatomuaga o le Tusi a Mamona.

O SE MEALOFA SILI ATU

Saunia e Chris Deaver

Sa le'i na ona aoao o i matou e Uso Reynolds—sa ia alofa ia i matou.

lo'u tausaga mulimuli i le Peraimeri, sa maua ai se matou faiaoga fou: o Uso Reynolds. Sa sina lona ulu ma maanuminumi [ona foliga], ma sa ia faamatala mai ni tala e uiga i le Pau o le Tamaoaiga ma lana tautua i le mili-teli a le I.S i le taimi o le Taua Lona II a le Lalolagi. O le taimi maumau sa ou le malamalama i ana tala—sa le manaia ma na tutupu i aso lava la ua leva.


I se tasi taimi sa matou ulavavale ai ma a'u uo i totonus o le vasega. Sa aveese mai a'u e Uso Reynolds ma tautala sa'o mai lava ia te a'u. Sa ia fai mai ou te faia se mea lelei atu, ma fai mai sa manao i le mea sili mo a'u. A o le'i oo i lena taimi, o i matou ma a'u uo sa matou le faalogo [i le fai-aoga]. Ae e le'i umi ae matou iloaina se mea taua e uiga ia Uso Reynolds —sa matuai popole alofa o ia ia i matou, ma na pau lava lana fuafuaga ia alofa ia i matou.

Sa faasoa mai i taimi uma e Uso Reynolds lana molimau i le Faaola o Iesu Keriso. Sa i ai se malamalama i ona foliga a'o ia aoaoina i matou e uiga i le mana o le ola i se olaga e totonus galemu ia Keriso. Sa oo ina avea ana tala ma ni aafiaga moni mananaia na faapea ona faaosofia ai o matou vaaiga faalemafaufau ma oo ina matou mananao ai e auauna i le Alii.

Ou te manatua pea se lesona sa ia aoaoina mai e uiga i le Perofeta o Iosefa Samita ma le ala na ia molimau mai ai o Iosefa Samita sa avea foi ma se tama laitiiti na pei o i matou.

Faatasi ai ma ona loimata, sa ia ta'u mai ai ia i matou, sa i ai i le Alii ni faamoemoega maualuluga mo i matou, na pei foi ona sa i ai Ona [faamoemoega maualuluga] mo Iosefa. Na fai mai Uso Reynolds, o le a taitasi i matou ma faia ni mea maoae i o matou olaga, e oo lava i le suia o le lalolagi, pe afai o le a matou pei o Iosefa ma faalatalata atu i le Faaola.

O ni nai tausaga mulimuli ane, a o matou i ai ma a'u uo i le aoga mau-luga, sa matou iloa ai sa manaomia e Uso Reynolds le faagataina o ana laau apitoti [apricot]. Sa matou faagataina ma le fiafia ana laau, lea sa alu ai ni nai itula o le fepee'i i apefa'i ma le tatipieseina. Sa o se galuega mamafa, ae na matou iloaina o le a taua ia Uso Reynolds.



O le tausaga lava foi lena sa matou iloa ai sa manaomia e Uso Reynolds se seti fou o tusitusiga paia. O ana tusitusiga paia na tuai, maanuminumi itulau, ma toulu ese. Sa tuufaatasi a matou tupe ma faatau mai mo ia se tusi fusi tolou pa'u manaia, sa lolomi ai i luga lona igoa. Sa matou tuuina atu ia te ia i le pati o le Kerisimasi a le matou uarota. O le a le galo lava ia te a'u le susulu o ona foliga ma le ilaila o ona mata i loimata ma le fiafia i le vaaia o i matou o tama o faia se mea sa taua tele ia te ia.

Ina ua ou alu i le kolisi i ni tausaga mulimuli ane, sa ou iloa ai ua maliu Uso Reynolds. Sa ou alu e asi lona faletua ma lona aiga e faasoa atu i ai lo'u faaaloalo loloto ma le talisapaia o ia. Ina ua ou vaai uma i lana fanau ma fanau a lana fanau fiafia, sa ou iloa ai le faamanuiaina o au i le iloaina o lenei tamalii maoae.

“Sa alofa o ia ia te outou,” na fai mai ai Tuafafine Reynolds ma loimata ma se ataata. “Sa alofa *moni* o ia ia te outou.”

I se lalolagi lea e faigata ai ona taulai atu i mea sa'o, sa faaali mai e Uso Reynolds ia i matou, o le matou sootaga ma le Tama Faalelagi ma Lona alofa e sili atu lava ona taua. Atonu na matou faagataina laau a Uso Reynolds ma tuu atu ia te ia se seti fou o tusitusiga paia, ae sa ia tuuina mai ia i matou se meaalofa sili atu: o se alofa tumau mo le Faaola o Iesu Keriso. ■

E alala le tusitala i Kalefonia, ISA

TALA FOU O LE EKALESIA

Asiasi ane i le news.lds.org mo se faaopoopoga o tala fou ma mea e tutupu i le Ekalesia.

Ua Tofia Taitai Fou o Eria

Ua faasilasila mai e le Au Peresitene Sili ia suiga nei i tofiga faaleautaitai i eria e amata atu i le aso 1 o Aokuso 2015. O uso uma o Au Peresitene o Eria o ni Pulega Aoao.

Ua tofiaina Fitugafulu e ala i faa-aliga, i lalo o le taitaiga a le Au Peresitene Sili, e fesoasoani i le Korama a

Apostolo e Toasefululua i la latou auaunaga i le lalolagi atoa.

I le taimi o le misiona faaletino a Keriso sa Ia valaaulia ia Fitugafulu, faatonu i latou i se auala e tutusa lava ma le au Apostolo e Toasefululua ma auina atu ia te i latou “ai ona luma,” faamatala atu o le a faalogo foi

i latou o e faalogo i o latou leo i Lona siufogaga (tagai i le Mataio 10:1, 16-17 Luka 10).

I se faaaliga na tuuina atu i le Perofeta o Iosefa Samita i le 1835, sa faaali mai ai e le Alii, i le lotolotoi o isi mea, “le faatulagaga o le Toafitugafulu, e tatau ona i ai ia te i latou ni peresitene e toafitu e pulefaamalumalu i luga o i latou, e filifili mai i le aofai o le toafitugafulu” (MF&F 107:93). ■

Au Peresitene o Fitugafulu



L. Whitney
Clayton

E lagolago i
eria uma



Donald L.
Hallstrom

Amerika i Matu
Matusisifo
Amerika i
Matu Sisifo



Richard J.
Maynes

Amerika i
Matu
Sautesasae



Craig C.
Christensen

Iuta i Matu
Iuta Aai o Sate
Leki

Iuta i Saute



Ulisses
Soares

Idaho
Amerika i
Matu Tutotonu



Lynn G.
Robbins

Amerika i
Matu
Sautesisifo



Gerrit W.
Gong

Amerika i
Matu
Matusasae

Aferika i Sautesasae



Stanley G.
Ellis

Fesoasoani
Muamua



Kevin S.
Hamilton

Peresitene



S. Mark
Palmer

Fesoasoani
Lua

Aferika i Sisifo



Marcus B.
Nash

Fesoasoani
Muamua



Terence M.
Vinson

Peresitene



Vern P.
Stanfill

Fesoasoani
Lua

Asia



Chi Hong (Sam)
Wong

Fesoasoani
Muamua



Randy D.
Funk

Peresitene



David F.
Evans

Fesoasoani
Lua

<p>Asia i Matu</p>    <p>Kazuhiko Yamashita Fesoasoani Muamua</p> <p>Scott D. Whiting Peresitene</p> <p>Yoon Hwan Choi Fesoasoani Lua</p>	<p>Pasila</p>    <p>Marcos A. Aidukaitis Fesoasoani Muamua</p> <p>Claudio R. M. Costa Peresitene</p> <p>W. Mark Bassett Fesoasoani Lua</p>	<p>Keripiane</p>    <p>Claudio D. Zivic Fesoasoani Muamua</p> <p>Walter F. González Peresitene</p> <p>Hugo E. Martinez Fesoasoani Lua</p>
<p>Amerika Tutotonu</p>    <p>Adrián Ochoa Fesoasoani Muamua</p> <p>Kevin R. Duncan Peresitene</p> <p>Jose L. Alonso Fesoasoani Lua</p>	<p>Europa</p>    <p>Paul V. Johnson Fesoasoani Muamua</p> <p>Patrick Kearon Peresitene</p> <p>Gary B. Sabin Fesoasoani Lua</p>	<p>Europa i Sasae</p>    <p>James B. Martino Fesoasoani Muamua</p> <p>Bruce D. Porter Peresitene</p> <p>Larry S. Kacher Fesoasoani Lua</p>
<p>Mekisiko</p>    <p>Arnulfo Valenzuela Fesoasoani Muamua</p> <p>Paul B. Pieper Peresitene</p> <p>Rafael E. Pino Fesoasoani Lua</p>	<p>Sasae Tutotonu/Aferika i Matu</p>   <p>Larry R. Lawrence Faatautaia mai le laumua o le Ekalesia</p> <p>Wilford W. Andersen</p>	<p>Pasefika</p>    <p>S. Gifford Nielsen Fesoasoani Muamua</p> <p>O. Vincent Haleck Peresitene</p> <p>Craig A. Cardon Fesoasoani Lua</p>
<p>Filipaina</p>    <p>Allen D. Haynie Fesoasoani Muamua</p> <p>Shayne M. Bowen Peresitene</p> <p>Evan A. Schmutz Fesoasoani Lua</p>	<p>Amerika i Saute Matusisifo</p>    <p>Lawrence E. Corbridge Fesoasoani Muamua</p> <p>Carlos A. Godoy Peresitene</p> <p>Hugo Montoya Fesoasoani Lua</p>	<p>Amerika i Saute Saute</p>    <p>Allan F. Packer Fesoasoani Muamua</p> <p>José A. Teixeira Peresitene</p> <p>Mark A. Bragg Fesoasoani Lua</p>



FAMATALAGA MAILE KERISI KETSEMANE, SAUNIA E HARRY ANDERSON

Saunia e Elder
David A. Bednar

O le Korama
a Aposetolo e
Toasefululua



Taliaina o le Finagalo ma le Taimi a le Alii

*O le faatuatua malosi i le Faaola o le taliaina lea o Lona
finagalo ma [Lana] taimi i o tatou olaga—e tusa lava pe o le
tali e le o le mea lea sa tatou faamoemoe pe mananao i ai.*

Sa avea Elder Neal A. Maxwell (1926–2004) o se soo pele a le Alii o Iesu Keriso. Sa auauna atu o ia o se tasi o le Korama a Aposetolo e Toasefululua mo le 23 tausaga, mai le 1981 i le 2004. O le mana faaleagaga o ana aoaoga ma lana faataitaiga o le avea ma soo faamaoni sa faamanuiaina ma o loo faaauau ona manuia ai i le tele o auala ofoofogia ia tagata o le Eklesia toefuataiina a le Faaola ma tagata o le lalolagi.

Ia Oketopa 1997, sa ma talimalo ai ma Sister Bednar ia Elder ma Sister Maxwell i le Iunivesite o Polika Iaga–Idaho (a o ta'ua o le Ricks College). Sa tuu e saunoa atu Elder Maxwell i tamaiti aoga, faiaoga, ma le aufaigaluega i se faigalotu tuufaatasi.

Na muamua atu i lena lava tausaga, sa feagai ai Elder Maxwell ma ni ao ma ni po e 46 o togafitiga faavaivai tagata e faaaoga ai ni kemikolo e tape ai sela o le kanesa o le toto [lukimia]. Sa sologa lelei ana [taumafaiga] ia toe malosi ma ana fofa faifai pea, e tau atu i masina o le tautotogo ma le taumafanafana, ae peitai sa faatapulaa lava le malosi faaletino ma le aumalosi o Elder Maxwell i le taimi sa ia malaga mai i Rexburg. Ina ua uma ona faafeiloai Elder ma Sister Maxwell i le malaevaalele, sa ma aveina atu loa ma Susan i laua i lo matou fale mo se malologa ma se taumafataga mama o le aoauli a o le'i faia le faigalotu.

Sa ou fesili atu ia Elder Maxwell po o a ni lesona sa ia aoaoina e ala i lona gasegase. O le a ou manatua pea le fitoitonu ma le ogaoga o le tali sa ia tuuina mai. “Dave,” sa ia fai mai ai, “Ua ou aoaoina, o le le solomuli e sili atu le taua nai lo o le ola.”



***Sa faamalosia lou
faatuatua a o ou moli-
mauina le faatagaina e
lenei ulugalii o o laua
manaoga malamalama
mo le faamalologa ina
ia "tofatumoanaina i
le finagalo o le Tama"***
(Mosaea 15:7).

O lana tali i la'u fesili sa o se mataupu faavae sa ia maua ai se aafiaga patino maoae i le taimi o ana togafitiga e faaaoga ai kemikolo. Ia Ianuari 1997, i le aso sa atofaina e amata ai le faasologa muamua o ona togafitiga, sa tepa atu ai Elder Maxwell i lona faletua, aapa atu mo lona lima, manava se mapuea loloto, ma saunoa atu, “Pau lava le mea ou te le fia solomuli.”

I lana savali i le konafesi aoao ia Oketopa 1997, sa aoao mai ai Elder Maxwell ma le faamaoni tele: “A o tatou feagai ma o tatou lava . . . tofotofoga ma puapuaga, e mafai foi ona tatou aioi atu i le Tama, e pei lava ona sa faia e Iesu, ina ia tatou ‘le . . . ma’e’e’—o lona uiga ia le solomuli pe toe fo’i (MF&F 19:18). O le le solomuli e sili atu le taua nai lo o le ola! I le ma lea, o le inu i se ipu oona e aunoa ma le tiga ai o se vaega foi lena o le faapei o Iesu.”¹

Sa oo ina atili loloto le aafiaga ma le taua ia te a’u o mau e faatatau i puapuaga o le Faaola a o Ia ofoina mai le taulaga togiola e le iu ma faavavau.

“Aua faauta, o a’u o le Atua na mafatia i nei mea mo tagata uma, ina ia latou le mafatia pe afai latou te salamo;

“Ae afai latou te le salamo, o le a latou mafatia e pei lava o a’u;

“O le mafatia lea na oo ai ia te a’u lava, o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga—ma manao ai ia Ou le inu i le ipu oona, ma ma’e’e—

“E ui i lea, ia i ai i le Tama le viiga, ma sa ou inu ma faauma ai a’u tapenapenaga mo le fanauga a tagata” (MF&F 19:16–19).

Sa le’i solomuli le Faaola i Ketesemane po o luga i Kolokota.

Sa le’i solomuli foi Elder Maxwell. Sa fetoomi atu i luma ma tumau lenei Aposetolo maoae, ma sa faamanuiaina ai i le taimi faoopoopo i le olaga nei e alofa atu ai, e auauna atu ai, e aoao atu ai, ma molimau atu ai. O na tausaga faaiu o lona soifua sa o se faailoga ofo malosi i lana faataitaiga o se soo tuuto—e ala i ana upu ma ana galuega.

Ou te talitonu o le toatele o i tatou atonu o le a manatu, o se tagata e i ai le malosi faale-agaga, potomasani, ma le maualuga o Elder Maxwell e feagai ai ma le gasegase tuga ma le maliu, ma se malamalamaaga o le fuafuaga o le fiafia a le Atua, faatasi ai ma le faamautino-agaga ma le alofa mutimutivale, ma le mamalu. Ae ou te molimau atu o faamanuiaga faapena e le tuuina atu mo na o le Au Pulega Aoao, pe mo ni nai tagata filifilia o le Ekalesia.

Talu mai lou valaauga i le Korama a le Toasefululua, o ou tofiga ma femalagaaiga ua mafai ai ona ou masani i tagata faamaoni, lototetele, ma le totoa o le Au Paia o Aso e Gata Ai i le lalolagi atoa. Ou te fia faamatala

atu ia te outou e uiga i se tasi o alii talavou o le ua faamunuinaia ai lou olaga, ma o le ua ou aoaoina ai faaleagaga ni lesona taua e uiga i le le solomuli ma e uiga i le tuu atu o o tatou lava loto ia "tofatumoanaina le loto o le Alo i le finagalo o le Tama" (Mosaea 15:7).

O se tala mo'i ma e moni foi ia tagata. Ae, o le a ou le faaaogaina igoa moni o tagata o loo aafia ai. Ou te faaaogaina ma le faatagaga ia faamatalaga filifilia mai a latou api talaaga patino.

"Ia Aua Le Faia Lo'u Loto ae O Lou Finagalo"

O Ioane o se alii agavaa ua umia le perisitua ma auauauna faamaoni o se faifeautalai faamisiona. Ina ua taliu mai i le aiga mai lana misiona, sa tafao faamasani ma faaipoipoina i se tamaitai talavou amiontu ma le lelei, o Heta. O Ioane sa 23 ona tausaga ae o Heta sa 20 i le aso sa faamuina faatasi ai i laua mo le olaga nei ma le faavavau i le maota o le Alii.

Pe tusa o le tolu vaiaso talu ona uma le la faaipoipoga i le malumalu, ae iloa ai ua ma'i Ioane i le kanesa o ponaiivi. Talu ai ona sa maua foi ni fula laiti o le kanesa i ona mama, o lea sa le tulaga lelei ai lona toe foi i le manuia.

Sa tusia e Ioane i lana api talaaga: "O le aso aupito sili lenei ona taufaafefe o lo'u olaga. E le gata ona sa ta'u mai ua ou maua i le kanesa, ae ona sa ou faatoa faaipoipo ma lagona ai ua ou toilalo i le avea ai ma se tane. Sa avea au ma tagata e tuuina mai mea e manaomia ma puipuia lo ma aiga fou, ae o lenei—i le tolu o vaiaso i lena matafaioi—na ou lagona ua ou toilalo."

Sa tusia e Heta: "Sa o se tala faanoanoa lenei, ma ou te manatua lona suia tele o la ma'ua vaaiga. Sa ou i ai i totonu o le potu faatalitali a le falemai, sa ou tusitusia ai ni faamatalaga faafetai o le faaipoipoga a o ma faatalitalia taunuuga o suesuega a Ioane. Ae o le iloa e uiga i le kanesa o Ioane, na foliga mai sa le toe taua ai ia ulo mo kuka faaumi, falai ma ipu fai meaai. O le aso sili lenei ona leaga o lo'u olaga, ae ou te manatua lo'u alu e moe i lena po ma le loto faafetai mo le ma faamauga i le malumalu. E ui lava ina sa tuuina mai e fomai ia Ioane le na o le 30 pasene o le avanoa e ola ai, sa ou iloa afai e tumau pea lo ma faamaoni na ia te au se 100 pasene o le avanoa e faatasi ai ma ia e faavavau."

E tusa ma le tasi le masina mulimuli ane, ae amata loa le kimo [togafigita e faaaaoga ai vailaau kemikolo] a Ioane. Sa ia faamatalaina lana aafiaga: "O togafigita na mafua ai ona ou ma'i tigaina nai lo o se isi lava taimi o lo'u olaga. Ua toulu lo'u laulu, lusi le 41 pauna, ma na pei sa toulu ese lo'u tino. O le kimo [togafigita e faaaaoga ai vailaau kemikolo] na ou aafia ai foi faalelagona, faalemafaufau, ma faaleagaga. O le olaga sa o se tietiega i lola i le aluga o masina o le kimo, na i ai taimi lelei, taimi le lelei, ma mea uma e tova ai. Ae o na mea uma, sa tumau lava lo ma faatuatua o le a faamalolo a'u e le Atua. Sa ma iloaina lava."

Sa tusia e Heta ona mafaufauga ma lagona: "E le mafai ona ou tatalia le tuu atu o Ioane e nofo na o ia i le falemai, o lea o le a ou moe ai i po uma i luga o se tama'i nofoa i lona potu. Sa toatele a ma uo ma aiga e asiasti mai i le ao, ae o po sa sili ona faigata. Ou te sioa i le taualuga ma mafaufau po o le a se mea ua fuafuina e le Tama Faalelagi mo i maua. O nisi taimi e tami solo ai lo'u mafaufau i nofoga pogisa, ma sa toetoe lava a manumalo ia te a'u lo'u fefe i le aveesea atu o Ioane. Ae sa ou iloaina o nei mafaufauga sa le mai le Tama Faalelagi. Sa oo ina fai sooo a'u talosaga mo le faamafanafanaga, ma sa tuuina mai e le Alii ia te a'u le malosi e faaauau ai pea."

O le tolu masina mulimuli ane, sa faia ai se taotoga o Ioane e aveese ai se fula lapoa mai lona vae. O le lua o aso talu ona uma le taotoga, sa ou asiasti atu ai ia Ioane ma Heta i le falemai. Sa matou talanoa i le taimi muamua sa ou feiloai ai ia Ioane i totonu o le misiona, e uiga i le la faaipoipoga, e uiga i le kanesa, ma e uiga i lesona taua e faavavau tatou te aoao mai e ala i tofotofoga o le olaga nei. A o tau faaiiu le matou feiloaiga, sa talosaga mai Ioane pe mafai ona ou faisona faamanuiaga faaleperisitua. Sa ou tali atu o le a ou tuuina atu ma le fiafia lena faamanuiaga, ae sa ou fia tuuina atu muamua ni fesili.

O lea na ou tuuina atu ai ni fesili ou te le'i fuafuina e fai atu, ma ou te le'i mafaufau muamua lava i ai: "Ioane, e i ai sou faatuatua e le faamaloloia [oe]? Afai o le finagalo a lo tatou Tama Faalelagi e siitia atu oe e ala i le otu i lou talavou i le lalolagi o agaga e faaauau ai lau galuega, e te faatuatua e faalogo ma usitai atu i Lona finagalo ma e le malolo ai?"

***O le tasi o faamanuiaga
silisili o le olaga nei o le,
ia le solomuli ma faataga
o tatou loto taitoatasi
ina ia "tofatumoanaina
i le finagalo o le Tama."***



**Sa tumu lo'u loto
i le faafetai ma le
faamemelo a o ou
molimauina lenei ulu-
galii talavou o taulima
le tauiviga aupito sili
ona faigata o tauiviga
faaleagaga uma—o le
lolo atu ma le agamalu
o o laua loto i le fina-
galo o le Atua.**

E masani lava i tusitusiga paia, sa faaaoga ai e le Faaola po o Ana auauna le meaalofa faaleagaga o le faamalologa (tagai 1 Korinito 12:9; MF&F 35:9; 46:20) ma iloa ai na i ai i le tagata le faatuatua ina ia faamaloloina (tagai Galuega 14:9; 3 Nifae 17:8; MF&F 46:19). Ae a o matou talanoa faatasi ma Ioane ma Heta ma fagatua ma nei fesili, sa faateleina lo matou malamalamā e faapea, afai o le finagalo o le Atua e mo lenei alii talavou lelei ina ia faamaloloina, ia na pau lava le ala e mafai ona maua ai lena faamanuiaga, o le pe afai lea e muamua faatuatua lenei ulugalii totoa e le faamaloloina. I se isi faaupuga, e tatau ona faatoilalo e Ioane ma Heta, e ala i le Togiola a le Alii o Iesu Keriso le “tagata natura” (Mosaea 3:19) o le matele lea o loo ia i tatou uma e poloai ma le le onosai ma le viga soo i faamanuiaga tatou te mananao i ai ma talitonu e tatau ai mo i tatou.

Sa matou iloa se mataupu faavae e fetaui i soo tuuto uma: o le faatuatua malosi i le Faaola o le taliaina ma le usiusitai o Lona finagalo ma [Lana] taimi i o tatou olaga—e tusa lava pe o le tali e le o le mea lea sa

tatou faamoemoe pe mananao i ai. E mautinoa lava, o le a naunau, moomoo, ma talosaga atu Ioane ma Heta mo le faamalologa ma lo laua manatu, mafaufau ma le malosi atoa. Ae o le mea e sili ona taua, o le a laua “loto ina usitai uma ua silafia e le Alii e tatau ona faaoo mai i [o laua] luga, e pei ona usitai atu se tamaititi i lona tama” (Mosaea 3:19). Ioe, o le a laua loto e “tuu atu o [laua] agaga atoa e fai ma taulaga ia te ia” (Ominae 1:26) ma tatalo atu ma le faamaualalo, “Lo'u Tama e, a e finagalo i ai, ia e aveese lenei ipu ia te a'u, a e aua le faia lou loto a o lou finagalo” (Luka 22:42).

O mea sa foliga mai muamua ia Ioane, Heta, ma a'u o ni fesili e paso ai, na avea ma se mamanu o aoaoga faavae o le talalelei na foliga mai ua feteenai. Mafaufau i le apoapoaiga a le Faaola, “O lē maua lona ola, e mau-mau ai ia te ia: a o le faamaumau i lona ola ona o a'u, e maua e ia” (Mataio 10:39). Sa Ia folafola mai foi, “A e toatele o e ua muamua e avea ma mulimuli; o e ua mulimuli foi e avea ma muamua” (Mataio 19:30). Ma sa fautuaina e le Alii Ona soo o aso e gata ai, “Ma o lau upu o

le a faamaualalo ai le toatele o tagata maualuluga, ma o lau upu o le a faaea ai le toatele o e maualalalo” (MF&F 112:8). O le mea lea, o le i ai o le faatuatua ina ia le faamaloloina e foliga mai e fetaui lelei i se mamanu mamana o aoaoga faavae o le talalelei e foliga mai e feteenai, lea e manaomia ai ona tatou ole atu, saili atu, ma tu’itu’i atu ina ia tatou maua le poto ma le malamalama (tagai 3 Nifae 14:7).

Ina ua uma ona faaalu le taimi na manaomia e mafau-fau loloto ai i a’u fesili ma ia talanoa ai ma lona toalua, sa faapea mai loa Ioane ia te a’u: “Elder Bednar, ou te le fia oti. Ou te le manao e tuua Heta. Ae afai o le finagalo o le Alii ia siitia atu a’u i le lalolagi o agaga, ia ou te matea ua ou manao e talia lena mea.”

Sa tumu lo’u loto i le faafetai ma le faamemelo a o ou molimauna lenei ulugalii talavou o taulima le tauiviga aupito sili ona faigata o tauiviga faaleagaga uma—o le lolo atu ma le agamalu o o laua loto i le finagalo o le Atua. Sa faamalosia lo’u faatuatua a o ou molimauna lenei ulugalii o faataga o laua manaoga malolosi ma malamalama mo le faamalogia ina ia “tofatumoanaina i le finagalo o le Tama” (Mosaea 15:7).

Sa faamatalaina e Ioane lana tali mai i le matou talanoaga ma le faamanuiaga sa ia mauaina: “Sa faaso mai e Elder Bednar ia i ma’ua le manatu mai ia Elder Maxwell e faapea e sili atu le le solomuli nai lo o le ola. Ona fesili mai lea o Elder Bednar ia i ma’ua, ‘Ou te iloa o loo ia te ouluia le faatuatua ina ia faamaloloina, ae o ia te ouluia le faatuatua e le faamaloloina ai?’ O se manatu ese lenei ia te a’u. O le mea moni sa ia fesili mai pe sa i ai so’u faatuatua e talia ai le finagalo o le Alii pe afai o Lona finagalo ia le faamaloloina a’u? Afai na oo mai le taimi ou te ulufale atu ai i le lalolagi o agaga e ala i le oti, pe sa ou saunia e usitai ma talia?”

Sa faaaauau le faamatalaga a Ioane: “O le i ai o le faatuatua ina ia le faamaloloina sa foliga mai ua le tusa ai ma le mea sa masani ona faamoemoeina; ae o lena vaaiga na suia ai le ala sa ma mafaufau ai ma lo’u toalua ma mafai ai ona tuu atu o ma talitonuga atoa i le fuafuaga a le Tama mo i ma’ua. Sa ma aoaoina sa manaomia ona ma maua le faatuatua, o le Alii e pule po o le a lava le taunuuga e oo i ai, ma o le a Ia taiala i maua mai le mea o loo ma i ai agai

atu i le mea e tatau ona ma i ai. A o ma tatalo, o a ma’ua talosaga sa suia mai le ‘Faamolemole e faamalolo a’u’ i le ‘Faamolemole tuu mai ia te a’u le faatuatua e talia ai soo se taunuuga ua fuafuaina e Lau Afio mo a’u.’

“Sa ou mautinoa e talu ai o Elder Bednar o se Apostolo, o le a ia faamanuia i elemene o lo’u tino ia galulue faatasi, ma o le a ou oso ese mai le moega ma amata ona siva pe fai se mea tulaga ese faapena! A o ia faamanuiaina a’u i lena aso, sa ou maofa ona o upu sa ia saunoa ai sa toeitiiti lava tutusa i upu a lo’u tama, lo’u tama faaletulafono, ma lo’u peresitene o le misiona. Sa ou iloaina mulimuli ane, e le afaina po o lima o ai e i luga o lo’u ulu. E le sua la mana o le Atua, ma e failoa mai Lona finagalo ia i tatou taitoatas ma e ala mai i ana auauna faatagaina.”

Sa tusia e Heta: “Mo a’u, o lenei aso sa tumu i lagona fefiloi. Sa matuai o’u mautinoa lava o le a tuu e Elder Bednar ona aao i luga o le ulu o Ioane ma faamalolo atoatoa ai o ia mai le kanesa. Sa ou iloaina e ala mai i le mana o le perisitua e mafai ona faamaloloina ai o ia, ma sa matuai o’u manao lava ia tupu lena mea. Ina ua uma ona ia aoaoina i ma’ua e uiga i le faatuatua ina ia le faamaloloina, sa matuai o’u fefe lava. E oo mai i lena taimi, ou te le’i amata taulimaina le mea moni e faapea, o le fuafuaga a le Alii e ono aofia ai le aveesea o lo’u toalua fou. Sa faalagolago lo’u faatuatua i luga o taunuuga sa ou manao i ai. I se isi a faaupuga, sa leai se loloto. E ui lava ina tau faafefe i le amataga, ae o le manatu o le i ai o le faatuatua ia le faamaloloina na iu ina faasaolotoina ai a’u mai le popole. Na mafai ai ona i ai lo’u talitonuga atoatoa na sili atu le silafia e lo’u Tama Faalelagi o a’u nai lo lo’u iloaina o a’u lava, ma o le a Ia faia le mea e sili ona lelei mo maua ma Ioane.”

Sa faia se faamanuiaga, ma ua mavae atu vайасо, masina, ma tausaga. Sa faavavega ona faasolo tuuitiitia le ogaoga ma le malosi o le kanesa o Ioane. Sa mafai ona ia faamaeaina ana aoaoiga i le iunivesite ma maua ai se galuega faamanuiaina. Sa faaaauau e Ioane ma Heta ona faamalosia le la mafutaga ma fiafia faatasi i le olaga.

O se taimi mulimuli ane, sa ou maua ai se tusi mai ia Ioane ma Heta na logo mai ai a’u e faapea na toe foi mai le kanesa. Sa toe amatalia ana kimo ma atofaina le aso o le

E tusa lava pe malosi

Io tatou faatuatua,

e tele mauga o le

a le aveesea ai. Ma

e le o ma’i uma ma

Iē atoatoa o le a

faamaloloina.

taotoga. Sa faamatala mai e Ioane: “O lenei tala sa le gata ina oo mai o se mea na ma le fiafia ai ma Heta, ae sa ma le malamalama foi i ai. Pe sa i ai se mea ma te le’i aoaoina i le taimi muamua? Pe na faamoemoe mai e le Alii se mea e sili atu mai ia i maua?

“O lea na amata ai ona ou tatalo mo se faamaninoga ma mo le Alii ina ia fesoasoani mai ia ou malamalama pe aisea na tupu ai lenei toe oo mai o le kanesa. I se tasi aso a o ou faitau i le Feagaiga Tuai sa ou maua ai la’u tali. Sa ou faitau i le tala ia Keriso ma Ona Apostolo i luga o le sami i le taimi na oso ai se matagi malosi. O le matatau ai ina ne’i sa’e le vaa, sa o atu ai le au sooo i le Faaola ma fai atu, ‘Le aoao e, e te le manatu mai ea ia te i matou a fano?’

O le mea tonu lava lenei na ou lagonaina! E te le manatu mai ea i lo’u maua i le kanesa? E te le manatu mai ea i lo ma manaio e amata se aiga? Ae a o faaauau pea la’u faitau i le tala, sa ou maua ai la’u tali. Sa silasila atu le Alii ia i latou ma fatalai atu, ‘Outou e faatuatau itiiti,’ ma sa Ia faaloaloa atu Lona aao ma vavao atu i vai.

“I lena lava taimi sa tatau ai ona ou fesili ifo ia te a’u lava, ‘Pe ou te talitonu moni ea i lenei mea? Pe ou te talitonu moni sa Ia vavaoina vai i lena aso? Pe ua na o se tala manaia e faitau i ai?’ O le tali o le: Ou te talitonu, ma ona ua ou iloa sa ia vavaoina vai, sa ou iloa ai i le taimi lava lena e mafai ona Ia faamalolo ia te a’u. E oo lava i lenei taimi, sa faigata ia te a’u ona tau faaogatasi le manaomia o lo’u faatuatau ia Keriso ma le le maalofia o Lona finagalo. Sa ou vaai i ia mea o ni mea eseese se lua, ma o nisi taimi sa ou lagona ai e tetee le tasi i le isi. ‘Aisea e tatau ai ona i ai lo’u faatuatau pe afai o Lona finagalo o le mea lea e iu ina manumalo,’ sa ou fesili ai? Ina ua mavae lenei aafiaga, sa ou iloaina o le i ai o le faatuatau—i lo’u lava ia tulaga—sa le o le manaomia ona iloa o le a ia faamalolo ia te a’u, ae e *mafai* ona Ia faamalolo ia te a’u. Sa tatau ona ou talitonu e mafai ona Ia, ma pe afai lava e tupu sa pule lava o Ia.

“A o ou faatagaina na manatu e lua ia i ai faatasi i lo’u olaga, ma taulai atu le faatuatau ia Iesu Keriso ma usitai atoatoa atu i Lona finagalo, sa faapea ona ou maua ai le

faamafanafanaga sili atu ma le toofilemu. Sa matuai matagofie le vaaia o le aao o le Alii i o ma’ua olaga. Ua taatitia tonu lava mea i o latou tulaga, ua tutupu vavega, ma e faaauau pea ona faalotomaualaloina i ma’ua i le vaaia o le faailoaina mai o le fuafuaga a le Atua mo i ma’ua.”

O le amiontonu ma le faatuataua mautino lava le aoga e fuliese ai mauga po o mea faalavefau—pe afai o le fulieseina o mauga e ausia ai faamoemoega o le Atua ma ua tusa ai ma Lona finagalo. O le amiontonu ma le faatuataua mautino lava e aoga i le faamaloloina o e mamai, tutuli, pe pipili—pe afai o faamalologa faapena e ausia ai faamoemoega o le Atua ma ua tusa ai ma Lona finagalo. O le mea lea,

e oo foi i le faatuataua malosi, e tele mauga o le a aveesea ai. Ma e le o mai uma ma lē atoatoa o le a faamaloloina. Afai e faatapulaaina mea faafeagai uma, afai e aveesea uma ia faafitalui, o lona uiga o le a le faataunuina faamoemoega autu o fuafuaga a le Tama.


“O le tele o lesona e tatau ona tatou aoaoina i le olaga nei, e pau le auala e mafai ona maua ai, e ala lea i mea tatou te oo i ai ma o nisi taimi e puapuagatia ai. Ma ua faamoemoe ma talitonuina i tatou e le Atua e feagai ma faigata le tumau o le olaga nei faatasi ai ma Ia fesoasoani ina ia mafai ona tatou iloa mea e tatau ona tatou aoao ai ma iu ai ina avea i tatou ma tagata e tatau ona avea ai i le faavavau.

O Le Uiga o Mea Uma

O le tala lenei e faatatau ia Ioane ma Heta o se tala masani ma ese lava. O lenei ulugalii talavou o le sui o le faitau miliona o

le Au Paia o Aso e Gata Ai faamaoni, ma tausi feagaiga i le lalolagi atoa, o e o loo fetaomi atu i luma i le ala sao ma le vaapiapi ma se faatuatau tumau ia Keriso ma se susulu atoa o le faamoemoe (tagai 2 Nifae 31:19–20). Sa le’i auauna atu Ioane ma Heta i ni tulaga maualuluga iloagofie faaleautaitai i totonu o le Ekalesia, sa le aiga i le Au Pulega Aoao, ma o nisi o taimi sa i ai o la masalosaloga ma popolega. I le tele o nei itu, o le la tala o se tala masani.

Ae o lenei alii ma le tamaitai talavou sa faamanuiaina i auala e tulaga ese e aoao ai lesona taua mo le faavavau e ala i puapuaga ma faigata. Ua ou faasoaina atu lenei tala ia



te outou aua o Ioane ma Heta, o e ua pei lava o le toatele o outou, na oo ina malamalama o le le solomuli e sili atu le taua nai lo o le ola. O le mea lea, o le la aafiaga sa le faatatau tele i le ola ma le oti; nai lo o lena, sa faatatau i le aoaoga, ola, ma le avea ai.

Mo le toatele o outou, o le la tala o le, sa avea, pe e mafai foi ona avea ma au tala. O loo e feagai, sa [e] feagai, pe o le a [e] feagai ma ni luitau tutusa i o outou olaga, faatasi ai ma lea lava lototele e tasi ma le vaaiga faale-agaga e pei ona sa i ai ia Ioane ma Heta. Ou te le iloa pe aisea e aoao ai e nisi o tagata ia lesona o le faavavau e ala i tofotofoga ma puapuaga—ae e aoao e isi ia lesona tai faa-pena e ala i le laveai ma le faamalologa. Ou te le iloa ia mafuaaga uma, ia faamoemoega uma, ma ou te le iloa mea uma e uiga i le taimi a le Alii. Faatasi ai ma Nifae, e mafai e oe ma a'u ona faapea atu, tatou te “le iloa le uiga o mea uma” (1 Nifae 11:17).

Ae ou te iloa lelei lava nisi o mea. Ou te iloa o i tatou o atalii ma afafine agaga o se Tama Faalelagi alofa. Ou te iloa o le Tama e Faavavau o le mataisau o le fuafuaga o le

fuafuaga o le fiafia. Ou te iloa o Iesu Keriso o lo tatou Faaola ma le Togiola. Ou te iloa na mafai e Iesu ona faataunu le fuafuaga a le Tama e ala i Lana Togiola e le iu ma faavavau. Ou te iloa o le Alii, o le sa “tu’itu’ia, fasia, [ma] faamanualia mo i tatou,”² e mafai ona fesoasoani ma faamalosi “i ona tagata, e tusa ma o latou vaivaiga” (Alema 7:12). Ma ou te iloa o le tasi o faamanuiaga silisili o le olaga nei o le, ia le solomuli ma faataga o tatou loto taitoatasi ina ia “tofatumoanaina i le finagalo o le Tama” (Mosaea 15:7).

E ui ina ou le iloa mea uma e uiga i le faapefea, ma le o afea, ma le o fea, ma le aisea e tutupu ai nei faamanuiaga, ae ou te tautino atu e moni i latou. Ma ou te iloa a o outou fetaomi atu i luma i o outou olaga ma se faatuatua tumau ia Keriso, o le a outou maua le gafatia ia le solomuli ai. ■

Mai se faigalotu a le Ofisa o Aoga a le Ekalesia, “That We Might ‘Not . . . Shrink,’” sa fosogaina atu i le Iunivesite o Texas i Arlington i le aso 3 o Mati, 2013.

FAAMATALAGA

1. Neal A. Maxwell, “Faaaoga Le Toto Togiola a Keriso,”

Liahona, Ian. 1998, 22.

2. “Iesu o Nasareta, le Tupu, Faaola” *Viiga*, nu. 101.

**O le tele o lesona
e tatau ona tatou
aoaoina i le olaga nei,
e pau le auala e mafai
ona maua ai, e ala lea
i mea tatou te oo i ai
ma o nisi taimi e pua-
puagatia ai.**



Saunia e
Brian K. Ashton

Fesoasoani Lua i le
Au Peresitene Aoao
o le Aoga Sa

FESOASOANI I LE AUTALAVOU IA Aoao Atu

Etatou i le autalavou ona aoao atu. Sa faamanino mai e le Alii le mea lenei ina ua la lisiina mai tiute o se ositaulaga:

“O le tiute o le ositaulaga o le *talai atu, aoao atu, faamalamalama atu*, apoapoai atu, ma papatiso atu, ma faamanua le faamanatuga.” (MF&F 20:46; faaopoopo le faamamafa).

E na o ni nai fuaiupu mulimuli ane, o loo faasafua atu ai e le Alii le tiute ia aoao atu ma faamalamalama atu i aoao ma tiakono (tagai MF&F 20:58–59). O le mea moni, e manaomia e alii talavou ma tamaitai talavou uma le avanoa e aoao atu ai mai i lea taimi i lea taimi.

O Aoga o le Aoao Atu e Isi Talavou o Isi Talavou

O Iesu Keriso o le faiaoga atoatoa lea. O le aoao atu e fesoasoani ai i le autalavou ia mulimuli i le faataitaiga a le Faaola ma avea atili ai e pei o Ia. O le aoao atu foi e saunia ai i latou ia avea ma ni faifeautalai, matua, ma ni taitai i le Ekalesia. A aoao atu le autalavou, e tatau lava ona latou suesue i le talalelei ma ola ai. E i ai foi ia i latou le Agaga ina mafai ona aoao atu (tagai MF&F 42:14). O le taunuuga, o faiaoga autalavou, e masani lava ona tele atu mea [latou te] aoaoina ma maua ai se molimau malosi atu e uiga i le autu nai lo o tagata o le vasega.

Ma le isi, o le autalavou e aoao atu, latou te maua le to'a, aoao i tomai faafafiaoga, ma amata ona iloa mea latou te le iloa. O le autalavou o e na maua le avanoa e avea ai ma ni faiaoga e aoao foi ia avea ma ni tamaiti aoga ma ni tagata lelei atu o le vasega.

Ae o le mea e sili atu, o le autalavou na aoaoina e faapea foi ona faamanuiaina. E masani ona faalogo ma tele ina auai le autalavou pe a aoao atu la latou tupulaga. E faamalosia ai faauoga a o talanoa le autalavou i autu o le talalelei

a o faatasi ai le Agaga. Ma e masani lava ona mafai lelei e le autalavou ona fesoasoani i le tasi ma le isi ia galulue e ala i a latou faafitauli masani.

E Mafai Faapefea ona Fesoasoani Taitai Matutua i le Autalavou ia Manuia?

Pe a aoao atu ia autalavou, e nafa taitai matutua mo le faamautinoaina o le amio talafeagai ma se siosiomaga faaleagaga.

E mulimuli taitai matutua i le Agaga pe a valaaulia le autalavou e aoao atu.¹ O nisi o le autalavou e le'i sauni e aoao atu, e ao ai i taitai ona faaeteete e aua ne'i lagona e nei tagata talavou le le toafimalie. Atonu ua saunia nisi o le autalavou e aoao atu na o se vaega o se lesona, ae o isi e mafai ona aoao atu se lesona atoa. I vasega toalaiti, ia mautinoa e taitai e le talosagaina soo le autalavou e aoao atu. Ma le isi, o nisi o lesona, ae maise lava lesona o autu faigata, e sili atu ona aoaoina e tagata matutua. Ma le isi, e manaomia ona vaaia e autalavou le faataitaia e taitai matutua o mataupu faavae sao o le aoao atu.

E mafai e taitai matutua po o matua ona galulue taitoatas i le autalavou e fesoasoani ai i le saunia o a latou lesona. O lenei fesoasoaniga e aofia ai le fai atu i le autalavou e faitau le lesona ia le itiiti ifo ma se vaiaso a o le'i faia,² fautua atu ia i latou e tatalo mo le mea e finagalo le Tama Faalelagi latou te aoao atu, faia o se fuafuaga o le lesona, ma faataitai le aoaoina atu faatasi o le lesona. A o maua e le autalavou faaaliga i le taimi o le faagasologa o le tapenaga, e mafai e taitai ona fesoasoani ia latou iloa ai o le faaaliga lava lena.



E tatau i le autalavou ona aoao atu, ma faatasi ai ma ni fesoasoani, e mafai ona latou aoao lelei atu.

E mafai e taitai matutua ona fesoasoani i faiaoga talavou e fatu ni fesili e faaosofia ai le talanoaga, valaaulia le musumusuga a le Agaga Paia, ma fesoasoani i tamaiti aoga ia iloa upumoni mo i latou lava. E mafai foi i taitai ona fesoasoani i le autalavou ia iloa ona filemu pe a uma ona tuu atu se fesili e tuu atu ai se taimi i tagata o le vasega ia maua ai se faaaliga.

I le taimi o le lesona, e mafai e taitai matutua ona faasoa atu ni aafia ga patino ma ni molimau, e fesoasoani i le autalavou ia iloa e le o tuua na o i latou i o latou luitau ma tuu atu ia i latou le faamoemoe e faatoilalo ai. E manaomia e le autalavou le atamai ma le poto masani e ofo atu e taitai matutua. E tatau foi i taitai ona faamanino aoaoga faavae pe a manaomia ai.

Ia aloese taitai matutua mai le faoa o le lesona e tusa lava pe o tau taumafai atu pea le faiaoga talavou. Ae peitai, e mafai ona saunia taitai e tuuina atu le lagolago e ala i le suesue mamao i mea o le lesona ma tatalo mo ni auala e sili ona lelei e fesoasoani ai i le faiaoga talavou.

E Mafai e le Autalavou ona Aoao Atu, ma Lelei le Aoao Atu

Talu ai nei na talosagaina ai a'u ou te suimomo'e e aoao le vasega 12 ma le 13 tausaga o le Aoga Sa a la'u uarota. Sa ou fesili atu i lo'u atalii e 13 tausaga, e fesoasoani ia te a'u i le aoao atu. Sa ma faia faatasi se fuafuaga

o le lesona. Sa fai e Iakopo le afa muamua o le lesona, ma faaali atu se vitio puupuu, faasoa atu mau e fataau i le ma autu, ma fai atu ni fesili sa mafaufauina lelei. Sa fesili atu foi Iakopo i tagata o le vasega po o le a le mea na latou lagonaina ma fesoasoani ia latou iloa le Agaga Paia.

I le afa lona lua o le vasega, sa ou tuu atu i tagata o le vasega e aoao atu i le tasi ma le isi le Uluai Faaaliga. Ona ma valaauliaina lea o i latou e aoao atu le Uluai Faaaliga i o latou aiga i le afiafa faaleaiga. Ina ua uma le vasega, sa ma auina atu se imeli i matua e logoina ai i latou e uiga i le ma valaaulia.

Ina ua ou fesili atu ia Iakopo po o a ni ona lagona e uiga i le lesona, sa ia fai mai, "Sa matuai manaia lava. Ou te iloa sa i ai iina le Agaga aua ou te le'i mafaufauina e mafai e tagata o la'u vasega ona tali a ta fesili, ae sa latou taliina."

E tatau i le autalavou ona aoao atu, ma e mafai ona e fesoasoani ia latou manuia. Pe a latou faia, o le a tuputupu a'e a latou molimau, ma o le a lelei ona saunia i latou e avea o ni faifeautalai, matua, ma taitai i le Eklesia. Ae o le mea e sili ona taua, o le a avea atili i latou e pei o le Faaola. ■

Faamolemole tagai i le tusi lesona fou, Aoao Atu i le Ala a le Faaola, i aoaoatu.lds.org mo nisi manatu i le faaleleia o le aoao atu.

FAAMATALAGA

1. O peresitene o le korama a le Perisitua Arona e fono faatasi ma o latou taitai matutua i le filifiliga o se talavou o le a aoaoina lesona o le a sosoo ai (tagai *Tusitalaulima 2: Taitaiina o le Eklesia* [2010], 8.3.2).
2. Talu ai o faaaliga e oo mai i "lea fuaitau i luga o lea fuaitau, ma lea mataupu i luga o lea mataupu" (2 Nifae 28:30), o le faitaunia o le lesona e le itiiti ifo o se vainsao a o le'i oo i le [aso sa] e tuu atu ai i faiaoga le taimi e maua ai faaaliga.

OU TE FIA
FAAPEA ATU
FAALAUATELE MAI
LO'U LAVA AAIFIAGA
E FAAPEA, O LO'U
OLAGA UA TUMU
MA FAAMAMALUINA
MA TELE INA
LELEI ONA O LE
TALALELEI A
IESU KERISO.

O le Avea ma se Tamaitai



O SE VAAIGA E FAAVAVAVU

Saunia e Sharon Eubank

Faatonu o Auauaga Alofa a le AAG

O ni tausaga se tele ua mavae, sa faia ai e la'u uo ma lona toalua se aoaoga faaleautaitai i nuu maotua o Ghana, ma ina ua uma sa sau se tamaitai ia te ia ma fai mai ma le ootia lava, "O le ekalesia lenei e mo se tamaitai." Sa fai atu la'u uo i le tamaitai po o le a le uiga o lana faamatalaga. Sa ia fai mai, muamua lava, "Ua ia i tatou se Aualofa matagofie, ua faapea ona aoao mai ia i tatou e uiga i mea faaleagaga ma mea i aso uma ua manuia ai o tatou aiga ma i tatou. Ae o le taimi lava lea, o loo i ai lou alii i le isi potu e sosoo atu o loo aaooina o matou taitoalua e ao ona latou faia a latou ava ma fanau i le agalelei ma le agamalu. Ua i ai le malumalu, ina ia mafai ona avea ai la'u fanau ua maliliu ma a'u fanau e faavavau. O mea uma lava ou te manao i ai, ou te maua i le ekalesia lenei. O le ekalesia lenei e mo se tamaitai."

Pe o se ekalesia lenei e mo se tamaitai? Faatasi ai ma ni nai mea malie e ese ai, o lo'u aaifiaga patino na tele lava ina maua ai le malosiaga. O lea la, nai lo o le taliina o le fesili mo oe, o le a ou faalagolago lava i mea ua ou molimauina i le lalolagi atoa. E le o a'u o se polofesa, se tagata atamai, po o se sooupua le Eklesia. Ae ou te fia tautala faalauaitele atu mai o'u lava aaifiaga e faapea, o lo'u olaga ua tumu ma faamamaluina ma tele ina lelei ona o le talalelei ma le Eklesia a Iesu Keriso o le Au Paia o Aso e Gata Ai.

E mautinoa lava e le o taofiofia ai tamaitai pe i ai ni manatu le aoga e uiga i matafaioi a tamaitai i totonus o le aiga, o le aoaoga faavae a le Eklesia e uiga i matafaioi o tamaitai i le aiga, Eklesia, alalafaga, malo ma le malumalu—ma le ala e fesootai ma fegalegalea'i faatasi ai alii ma tamaitai—o le aoaoga faavae aupito talafeagai, mamana, atamai, ma faaosofia ua ou faalogo o tautalagia. O lea ou te faapea atu ai i o'u uso, o mea o loo outou mananao moni i ai i lou matafaioi o se tamaitai, se Kerisiano, o se tagata atamai, o se tagata e faavavau, o loo iinei i le aoaoga faavae a Iesu Keriso ma i le faaogaina o lena aoaoga faavae i le Eklesia.



"TAMAITAI LELEI O LE
LALOLAGI... O LE
A TOSINA MAI I LE
EKALESIA I NI VAEWA
TOATELE... O LE
A TUPU LENEI MEA
I SE MAUALUGA E
FAAPEA... ATOA FOI
MA LE MAUALUGA
O LOO VAAIA AI
TAMAITAI O LE EKA-
LESIA O NI TAMAITAI
ILOGA MA LE TULAGA
ESE—I NI TULAGA
FIAFIA—MAI TAMAITAI
O LE LALOLAGI."

**PERESITENE SPENCER W.
KIMBALL**



O le Aoaoga Faavae a le Atua ua Tutusa ai Alii ma Tamaitai i a Laua Filifiliga

O le talalelei a Jesu Keriso e faatatau uma i alii ma tamaitai, ma o aoaoga faavae a le Atua e tau fai tali uma atu ai i laua mo a laua filifiliga, ae e leai ni tulaga faatauaina e ese mo tamaitai, ese foi mo alii. E le faatagaina e le Atua ni ponokalafi, mulilua, sauaga mataga, faatamala, faailoga tagata, po o le faalealofa, e tusa lava po o a o tatou itupa.

O lenei foi aoaoga faavae ua aumai ai foi ia i tatou lo tatou malamalama o le mea na tatou o mai ai, aisea ua tatou i ai iinei, ma o fea o loo tatou o i ai. Ua aumai ai lo tatou malamalamaaga i lo tatou itupa o ni tamaitai ma ni alii faapea foi ma o tatou matafaioi o ni afafine ma alii, uso ma tua-gane, ava ma tane, ma tina ma tama.¹

Ua aoao mai Elder D. Todd Christofferson o le Korama a Aposetolo e Toasefululua, "Ua faaalia mai e perofeta e faapea, na muai ona tatou ola o ni atamai ma sa tuuina mai ia i tatou ni foliga faatusa, po o ni tino agaga, e le Atua, o lea na avea ai ma Ana fanau agaga—o atalii ma afafine o ni matua faa-lelagi."² Sa i ai lava i taimi uma le atamai (tagai MF&F 93:29).

O a'u o se *tamaitai*. Faatasi ai ma le itupa na oo mai ai foi ni uiga auaumama ma ni tiutetauave faapitoa.

O a'u o se *tama teine*. O le matafaioi lenei ua faamatala tonu ai, o ai a'u e faatatau i le Atua. E i ai ni o'u matua faalelagi ma ua i ai le aia tatau, o se afafine, e talanoa ai ma le Tama Faalelagi e ala i le tatalo ma ia maua faaaliga e ala i le Agaga Paia.³

O au o se *uso*. O le uiga o lenei matafaioi, o a'u o se Kerisiano, o se tagata o le Ekalesia, o se uso i le talalelei, o se soo, ma ua ou osia ni feagaiga o le a ou ositaulaga ma faapaia ma auauna ma taitai.

E mafai foi ona ou maua le avanoa i lenei olaga e avea ai o se *ava*—afai e le

o le olaga lenei, e mautinoa lava i le olaga a sau. O le matafaioi lenei o a'u lea e faatatau i se paaga tutusa ua filifilia, se tane. E ui e le tutusa i ma'u—ona e leai se tasi e i ai le tuufatasiga o meaalofa ma uiga o loo ia te a'u pe o loo ia te ia—ma te faaaoga ai o ma'u uiga felagolagoma'i e taumafai ai ia tasi. O le upu *faamauga* o se faamatalaga lelei tele lea o le tuufatasiga e faavavau o se faaipoipoga na faia i le pule o le peris-tua i totonu o se malumalu.

O le matafaioi o le *tina* o a'u lea e faatatau ia i latou e tupuga mai ia te a'u. Pe ou te mauaina moni lenei matafaioi i lenei taimi puupuu i le lalolagi po o le, pe a mavae le lalolagi, o le folafolaga o aiga e faavavau ua faia ia i latou o a latou faaipoipoga sa faamauina i le malumalu ma e ala i le Agaga Paia o Folafolaga (tagai MF&F 132:19).

O la tatou aoaoga faavae e tulaga ese i le lalolagi, ma o se vaega o le Toefuataiga o le talalelei a Jesu Keriso. Mafaufau po o le a tonu le uiga pe afai e te malamalama i lenei aoaoga faavae ma talitonu i ai. Ia te a'u, e aumai ai se vaaiga e faavavau i mea uma ou te faia.

O le Ekalesia O Le Nofoaga Lea Tatou Te Faataitaia ai le Aoaoga Faavae a le Atua

Ou te talitonu o le avea ma se tagata o le Ekalesia ua avea ai a'u o se vaega o se tasi o polokalama sili ona lelei o le atinaega ua faapea ona mamanuina. O se polokalama lautele o le atinaega o le tagata lava ia, faa-malosiga, ma le tulaga faaletaitai mo tamaitai e tupu i le na o le faia o mea e faia e tagata uma o le ekalesia: tulaga faaletaitai, faila-uga, faia o faaiuga, talanoaga faatauanau, paketiga, auauna atu i le lotoifale, tusitusi ma faitautusi, sailiiliga, atiina a'e o punaoa, fai togalaau, teuina o meaai, ola maloloina o le aiga—e alu lava alu lava [le lisi].



Ou te talitonu o feeseseaiga e faatatau i matafaioi o tamaitai e tulai mai pe oo ina i ai se mea ua motusia i le va o le aoaoga faavae ma le faatinoga o le aoaoga faavae. Ae peitai, e ala i faaaliga faifaipea mai le Atua i Ana perofeta ma ia i tatou e ala i le Agaga Paia, e mafai ona faaaauau ona tatou iloa ma tuuitiitia le tele o le feeseseaiga e alia'e mai.

Mo se faataitaiga, o loo faaaauau ona faamanino mai e apostolo ma perofeta ni mataupu ua loa ona tatou talitonu i ai:

- Na saunoa mai Elder M. Russell Ballard o le Korama a Aposetolo e Toasefululu: "a o atu ia alii ma tamaitai i le malumalu, ua faaee uma mai ia i laua le mana lava e tasi, o lona uiga o le mana o le perisitua."⁴
- Sa saunoa Elder Dallin H. Oaks o le Korama a Aposetolo e Toasefululu, "E le masani ona tatou talanoa i tamaitai i le i ai o le pule o le perisitua i o latou valaauga faale-Eklesia, ae o le a se isi pule o i ai?"⁵
- Sa faamalamalama mai e Peresitene James E. Faust (1920–2007), Fesoasoani Lua i le Au Peresitene Sili, "O tama uma i lona aiga o se faatama [peteriaka] ae o tina uma o se faatina [meteriaka] e tutusa i laua i o laua matafaioi faamatua e iloagofie ai."⁶

1. Tuu se Vaaiga Lautele i le Mafaufau

Se'i ou tuuina atu ni fautuaga se tolu o le a fesoasoani ia i tatou i lo tatou faatinoina o lenei aoaoga faavae? O la'u fautuaga muamua o le, ia manatua le vaaiga lautele na tuuina mai e le aoaoga faavae a Iesu Keriso.

I se taimi ua mavae atu, i le avea ai ma faatonu o Auau-naga Alofa a le AAG, a o ou i ai i se fonotaga sa ou maua se talosaga faatopetope e faatatau i tagata Kerisiano sulu-fai o e sa tutuliese uma mai Mosula, Iraki, e vaegau a le Setete Isalama ma sa lolofi atu i Ketisitana. E toa 5,000 ni tagata sa tautulei atu i le faafeagaiga Anelikana i Baghdad mo se avanoa i le lotoa o lona falesa, ma sa leai ni a latou

meaai. Sa talosaga mai le ulugalii faamisiona mo fesoasoaniga alofa a le Au Paia o Aso e Gata Ai mo ni tupe faavavave e faatau ai ni araisa, pi, ga'o, ma ni palanikeke, ma sa tatou tali vave atu i ai ina ia mafai ona latou maua se tau-mafataga i lena afiafi.

Ona o la'u galuega, o ituaiga mea nei e feagai ma a'u i aso uma. O le faamalosia e vaai atu i le ata lautele i le tele o taimi, ou te fesili ai ia te a'u lava, o a ni auala e sili ona lelei e faaaoga ai lo'u malosi? A o tatou sailia ni tali, se'i o tatou suesue i aoaoga faavae o le talalelei. "Vaai i tala atu o le faailoga" (Iakopo 4:14) po o le tautu lava i le fesili e tasi po o le faiga e tasi e masani ona see ese ai lo tatou taulai atu ma le taimi mai le ola i le talalelei.

Sa saunoa Bonnie L. Oscarson, peresitene aoao o Tamaitai Talavou e uiga i le tumau ona pipii i le talalelei a o tatou sailia ni tali: "E mafai ona tatou filifili pe o le a faaaauau pea ona tatou mulimuli i mea ua uma ona tatou lagonaina. E le o i ai ni tali i mea uma, ae e mafai ona tatou filifili pe o le a tatou faamaoni i mea ua uma ona tatou lagonaina mai i le Agaga Paia. Ia tatou galulue pea e faaleleia ia mea, ae mo le taimi nei, taofimau pea i le faatuatua."⁷

O le a faaaauau pea ona suia a tatou faatinoga i le Eklesia a o tatou aoao e faaaoga a tatou aoaoga faavae i ni auala e lelei atu ma sili ona atoatoa. Ou te faamoemoe o le a sili atu le talafeagai ma tutusa o le augatupulaga e sosoo ai i lana faatinoga o le talalelei. Ae ou te talitonu foi ua mautu maa faavae lapopoa ma ua lava e faafailele ai o tatou faatuatua ma a tatou molimau.

2. Ia Tumau le Faamoani E Ui lava i le Tetee

O le faafeagai e le o se mea e leaga moni. Ou te talitonu o le faafeagai e faamalosia ai foi i tatou. Ina ua ou asiatis atu i le Huntington Botanical Gardens i San Marino, Kalefonia, ISA, sa ou matauina ai ni ili lapopoa i le faaaliga na faafoligaina le agi i taimi uma o le to'elau lea e faamalolosia ai laau o tau vevela ina ia tatalia ni afa e ono oso mai. E auina mai pe faataga i aso uma e le Alii ni "matagi to'elau" e faa-aoga ai faafitauli ma le le fia taliaina [o se meal] ina ia mafai ona faamalosia ai o tatou aa ma ia tatou mau fetuunai ai. O luitau faapena o le mea moni o se meaalofa.

O tala nei e lua mai le talafaasolopito o le Eklesia tatou te maua ai se vaaiga i mea faafeagai:

O le tala muamua o le taunu atu o Poika Iaga i le Vanu o Sate Leki i le 1847, e pei ona faamatalaina e Peresitene

E TUUMULI LE
AGAGA PAIA I LE
TAIMI LAVA E AMATA
AI E SE ALII PO
O SE TAMAITAI
ONA FAAAOGA
LE PULEAGA
AMIOLETONU
MA LE MAFAI AI
ONA TAITAI MA LE
AGAMALU, ALOFA,
MA LE MAMA.

**TAGAI I LE
MF&F 121:37**



Gordon B. Hinckley (1910–2008): “E leai se palau na suaina lona eelele. Sa le’i iloa e [Polika Iaga] se mea e tasi e uiga i lona lafulemu, leai se mea [na iloa] e uiga i vaitau, i le tau, i le kiona, i le maatiati o taumalulu, o le ono aafia i ni mala iniseti. Sa leai se upu lelei a [le au uluai suesue] o Jim Bridger ma Miles Goodyear na fai e uiga i lenei nofoaga. Sa augani atu Sam Brannan ia te ia e o agai i Kaledonia. Sa le’i faalogo o ia i se tasi o i latou. Sa ia taitai atu ona tagata i lenei nofoaga vevela ma le mea sa foliga mai o se nofoaga tuufua. Ina ua ia taunuutu atu, sa vaavaai atu o ia agai i le folasi tele e tau atu i le vaituloto masima i sisifo ma faapea atu, ‘O le nofoaga sa’o lenei.’”⁸

O le tala lona lua o le manatuaina e Uilifoti Utilafi o se saunoaga a le Perofeta o Iosefa Samita. Sa saunoa le Perofeta i aso popofou o le Toefuataiga i se faapotopoga toalaiti o taitai e uiga i le tele o le malamalamama faalemataupu faavae o loo taatia i luma atu mo i latou: “Ua matuai faamalamalamaina ma aoaoina au i a outou molimau i lenei po, ae ou te fia fai atu ia te outou i luma o le Alii, e le sili atu ni mea ua outou iloa e uiga i taunuuga o lenei Ekalesia ma le malo nai lo o se tamameamea i luga o vae o lona tina. Tou te le malamalamama i ai.”⁹

Ua ou faasoatua nei tala e lua ona la te faamatala atu ai lagona o loo o’u lagonaina. O le i ai i le nofoaga sa’o po o le maua o le aoaoga faavae sa’o e le faapea ai o le a leai ni eria laugatasi masima e segaia ai le vaai, ma le mumu o alisi uli po o kiona e oti ai po o tagata e fai mai e te le manuia, ae o le nofoaga ma le aoaoga faavae sa’o lenei. Ma e tatau ona tatou faaauau pea. E tutusa



lava lo tatou malamalamama ma se pepe i luga o vae o lona tina e uiga i le mea o loo faia e le Alii i alii ma tamaitai ma le perisitua. Ae e fiafia le Alii e aoao i tatou pe a tatou mafaia, pe a tatou tuputupu a’e, pe a tatou ole atu. Ma pe a tatou faateleina lo tatou malamalamama, e mafai ona tatou faia le mea e pei ona fai mai ai Sister Oscarson, “I le taimi nei ia taofimau lo tatou faatuatua.”

3. Saili le Agaga Paia

O le faia o ni fesili ma le mauaina o tali o le fatu lea o le mauaina o se molimau i aoaoga faavae a le Atua. O le a molimau mai le Agaga Paia pe a sa’o se mea e ala i lagona toafilemu ma le mafanafana. Fai mai Linda K. Burton, peresitene aoao o le Aualofa e uiga i lenei faagasologa: “Tatou o i punavai sa’o mo ni tali. Aisea o le a tatou talitonu ai i le Initonetia ae le o perofeta? E mafai ona tatou iloa le ala e fai atu ai fesili i se auala e faigofie ai ona galulue faatasi ma faaalia ai ni atugaluga faamaoni. . . . Ae ia onosai ma lotomaulalo.”¹⁰

Ua aoao mai e Elder Jeffrey R. Holland o le Korama a Aposetolo e Toasefululufa ia i tatou le eseesege i le va o uunaiga a Satani ma tali mai le Atua: “O ai lea e musumusu mai ma le atamai ia [pepelo] i o tatou taliga? . . . Ua tatou taufafai iloa uma le o loo faia lenei mea-o le tama o pepelo uma. O Lusifelo, o lo tatou fili e toatas.”¹¹



Sa taumafai le Perofeta o Iosefa Samita, o le sa tele atu lona potomasani i le mauaina o faaaliga nai lo o se isi lava i lenei tisipenisione, e aoao i tatou e faapea, o fesili e ao ona taulimaina ma se tautinoga i le lotogatasi ma le faaaloalo. O lenei mea e valaaulia ai le Agaga Paia. I le 1839, sa tusia ai e Iosefa i lana tusi mai le Falepuipui o Liperate e faapea “o aia o le perisitua ua fesoottai e le mavavaeeseina ma mana o le lagī” ma o le mana o le perisitua e ao ona faaauau pea “[nao i] le faatauanau, i le talitiga, i le agamaualalo ma le agamalu, ma le alofa faamaoni” (MF&F 121:36, 41). Sa aoao atu foi e le Perofeta ni mataupu faavae talitutusa i le Aualofa: “O le agamalu, alofa, ma le mama—o mea nei e tatau ona viia ai [tatou].”¹²

Sa saunoa Iosefa Samita e uiga i le agavaivai ma le agamalu o auala e lagona ai le Agaga Paia ma faaaoga ai uunaiga amiontonu. Sa ia saunoa atu i lenei mea i alii ma tamaitai aua e aafia uma ai itu e lua o le mafutaga. O le pule uma ma le faatagaga paia e faaleaogaina (aua e tuumuli le Agaga Paia) i le taimi lava e amata ai e se alii po o se tamaitai ona faaaoga le puleaga amioletonu (tagai MF&F 121:37) ma le mafai ai ona taitai ma le agamalu, alofa, ma le mama.

O Mea o Loo Naunau i ai Tamaitai o Loo i totonu o a Tatou Aoaoga Faavae

O loo i ai se naunautaiga i le toatele o tamaitai i le lalolagi ina ia faatauaina, ia maua le faamoemoega mo o latou malosiaga, ma ia su'e ni alii o e mananao e fausia ni aiga ma ia faamaoni.

Sa ou feiloi i se tasi o taimi i se tagata siva mai Peretania a o [o'u] malaga i se nofoaafi i Finelani. Sa ma tau fai fiafia ona ma te tautatala i le Igilisi, ma a o ma talanoa sa ma fesilisili atu i le tasi ma le isi ni fesili: O a au mea o fai i Finelani? O le a le mea e te talitonu i ai? O lona iloa ai o o'u talitonuga, sa ia fesili mai ai, “E te le ulaula pe inu ava malosi? E te le talitonu i feusuaiga a e le'i faaipoipo?” Ma i le ma talanoaga atoa, sa fai lava ma toe foi mai i le mataupu lenei, ma le fia iloa. “Ou te matea a e tafao faamasani i alii e faapena foi o latou lagona, o le a manuia la,” sa ia

fai mai ai. Ma sa toe fai mai mulimuli ane: “E i ai la ni alii e faapena ni o latou lagona?” Sa amata mai e matuai le manao i ai, ae uma ane ua moomoo faanoanoa. Sa galala o ia mo se mea sa faalogo i ai i la tatou aoaoga faavae.

E le'i toe aluese lava ma a'u le manatuaga o le ma feiloaiga i luga o le nofoaafi, ma e masani ona faamanatu mai ai ia te a'u se saunoaga lauliloa mai ia Peresitene Spencer W. Kimball (1895–1985): “O le tele lava o le tuputupu a'e tele ua oo mai i le Ekalesia i aso e gata ai, o le a oo mai ona o le toatele o tamaitai lelei o le lalolagi . . . o le a taina mai i le Ekalesia i ni numera toatele. O le a tupu lenei mea i se maualuga e faapea ona atagia mai ai i tamaitai o le Ekalesia le amiontonu ma le tulaga lelei i o latou olaga, atoa foi ma le maualuga o loo vaaia ai tamaitai o le Ekalesia o ni tamaitai iloga ma le tulaga ese—i ni tulaga fiafia—mai tamaitai o le lalolagi.”¹³

O le aoaoga faavae o le faasinomaga ma matafai o tamaitai ua faatusa i ai faanaunauga sili o lo'u loto. O le faatinoina e tagata o le ekalesia i le lalolagi nei o aoaoga faavae o le Atua e le atoatoa, ae e mataala, ola, tumu i le faamoemoegi ma faamoemoega lelei. Matou te talitonu “o le a faaali mai [e le Atua] le tele o mea silisili ma le taua tau i le Malo o le Atua i le lumanai” (Mataupu Faavae o le Faatuatua 1:9). E mafai ona tatou filifili e mulimuli i lena aoaoga faavae.


O lea la, ou te toe fesili atu ai: O se ekalesia lenei mo se tamaitai? O la'u tali e faavae tonu i o'u lava aafiaga i le lalolagi atoa. Ioe. ■

Mai i se tautalaga na tuuina atu i le FairMormon Conference i Provo, Iuta, ISA, i le aso 8, o Aokuso, 2014.

FAAMATALAGA

1. Tagai i le “O Le Aiga: O Se Folafolaga i le Lalolagi,” *Liahona*, Nov. 2010, 129.
2. Todd Christofferson, “Aisea e Faaipoipo ai, Aisea e Fai ai se Aiga,” *Liahona*, Me 2015, 50.
3. Tagai “O Le Aiga: O Se Folafolaga i le Lalolagi,” 129.
4. M. Russell Ballard, “Alii ma Tamaitai ma le Mana o le Perisitua,” *Liahona*, Sete. 2014, 36.
5. Dallin H. Oaks, “O Ki ma le Pule o le Perisitua,” *Liahona*, Me 2014, 51.
6. James E. Faust, “The Prophetic Voice,” *Ensign*, Me 1996, 6.
7. Bonnie L. Oscarson, talanoaga patino ma le tusitala, 21 Iulai, 2014.
8. Gordon B. Hinckley, i le James E. Faust, “Brigham Young: A Bold Prophet” (Education Week address, Aug. 21, 2001), 1, speeches.bry.edu.
9. *Aoaoga a Peresitene o le Ekalesia: Iosefa Samita* (2007), 137.
10. Linda K. Burton, talanoaga patino ma le tusitala, 21 Iulai, 2014.
11. Jeffrey R. Holland, “O le Isi Atalii Faama’imau ‘Oa,” *Liahona*, Iulai 2002, 70.
12. *Aoaoga: Iosefa Samita*, 482.
13. *Aoaoga a Peresitene o le Ekalesia: Spencer W. Kimball* (2006), 222–23.





**Saunia e Elder
Gene R. Cook**

Na auauna atu o
se Fitugafulu o le
Pulega Aoao mai
le 1975 i le 2007

O Tusitusiga Paia NA LEILOLOA

*E faafofoga mai ma taliina e le Atua a tatou tatalo pe a tatou
faatinoina le faatuatua ia te Ia ma Lona Alo.*

I le aso 29 o Iulai, 1977, faatoa uma ona ma asiasi ma Sister Cook i le Misiona a Polivia Santa Cruz o se vaega o lou tofiga o se sui o Fitugafulu lea sa ma i ai i le malaevaalele i Cochabamba, Polivia pe a ma le lima itula. Sa ma matua le lavava lava, o lea sa ma fiafia ai ua maua ni nai itula e malolo ai. Ao ou faagalegale moe, sa ou maua se uunaiga malosi e tatau ona ou ala ma tusi i lalo ni nai manatu ua oo mai i lou mafaufau.

Sa ou tusitusi mo le toeitiiti atoa le tolu itula, foiaina o nisi o faafitauli tau le pulega lea sa ou tauivi ai i lau lava eria o le misiona mo le tele o tausaga. Sa ou lagonaina le liliги tele mai o le Agaga ma sa ou fiafia e tusi i lalo mafaufauga musuia taitasi.

Mulimuli ane sa ma malaga atu mo La Paz, Polivia. Sa faafeiloaia ma le faaaloalo i maua e Peresitene ma Sister Chase Allred i le malaevaalele ma aveina atu i le la veni i le ofisa o le misiona. Sa matou lokaina le veni, tuu a ma atopau ma lau tamai ato i totonu, ma sa talosagaina e Sister Allred se alii faifeautalai e vaai le veni.

I le ulufale atu i le ofisa, sa faafetaui le peresitene e se tamaitai ua lata ina oti lana tane. Sa ma faafilemuina uma ma le peresitene o ia ma fesoasoani i mea na ia manao ai. I lena taimi, na malaga atu ai Sister Cook ma Allred i le fale o le misiona.

Ina ua ma toe foi ma le peresitene i le veni, ua leai uma a ma meatotino. Sa ou faapea ua alu Sister Cook ma ave mea i le fale o le misiona. Ae ao matou agai atu i le fale, sa ou iloaina le tamai faamalama i le taumatau pito i luma ua faaleagaina ma ua amata ona popole masalo ua gaoia a ma meatotino.

I le taunuū ai i le fale o le misiona, sa ma iloaina e moni lava ua gaoia uma a ma mea totino. O le leiloloa o lavalava na tulai mai ai se faafitauli faafuasei ae e le tumau. O le mea na sili ona faanoanoa ai o au tusitusiga paia ia sa i totonu o le ato lea ua gaoia faatasi ai ma manatu musuia ia na faatoa maua i Cochabamba. Sa loftuina au i le faanoanoa, ita, ma lagona o le leai o se faamoemoe.

Ina ua uma ona matou tatalo uma mo le toe mauaina o a maua meatotino, sa ma taumafai ia maua le fiafia i la matou taumafataga o le afiafi ae sa lei mafai. O au tusitusiga paia na tuuina mai ia te au e ou matua, faatasi ma se tusigma paia ia te au mai lou tina ma lou tama ae lei maliu o ia. Sa ou faaaluina le afe o itula i le makaina, faafesootai mau, ma le alofa naunau ua pau ia o mea totino faalelalolagi na ou manatu e sili le taua.

E ui na tele se ma talanoaga ma Peresitene Allred, na ou maua se uunaiga malosi e tatau ona matou faia mea uma i lo matou malosi ia toe maua ai tusitusiga paia. O lea ina ua maea le taumafataga mama o le po o i latou uma na faatasi ai na toe tootutuli tasi lava. Na matou augani atu i le Alii ina ia toe faafoi mai tusitusiga paia, ina ia taitaia le tagata na avea ia ona iloa la latou amioletonu ma salamo, ma ia avea le toe faafoi mai o tusi ma auala o le aumaia o se tasi i le Ekalesia moni.

Na matou naunau e sailia le eria i tafatafa o le ofisa o le misiona ma le laufanua lata ane, ma le faamoemoe o le gaoi po o tagata gaoi o le a aveina mea e mafai ona faatau ae tiasi tusi faa Peretania.

Ona matou o atu lea pe a ma le toasefulu o i matou i le veni ma moli uila ma lavalava mafanafana. Na matou tietie atu i luga ma lalo o auala, ma auiliili uma nofoaga avanoa ma talanoa i tagata seia leai se avanoa na tuua. Sa leai se isi na vaai pe na faalogo i se mea. Na iu loa ina matou toe foi i le fale ua le faamanuiaina. Na ma faauma ma Elder Allred a ma pisinisi ua leva le po, ma o le aso na sosoo ai na ma felelei atu ai ma Sister Cook i lo matou aiga i Quito, Ekuatoa.

I isi vaiaso na sosoo ai, na faaaauau e faifeautalai i Polivia ona sailili. I le leai lava o se faamoemoe, na latou filifili ai e tuu se faaliga i nusipepa e lua o aso taitasi ma ofoina atu se taui.

O le taimi lea, i Quito, sa ou faia ai se tauiviga. Ou te lei toe suesue i tusitusiga paia talu mai ona leiloloa au tusi. Sa ou taumafai e suesue, ae o taimi uma lava ou te faitau ai i se fuaiupu, ou te manatua lava na o ni nai mau fesootai na ou faia i le silia ma le 20 tausaga. Sa ou lotovaivai, faavauvau, ma na leai se manao e faitau. Na ou tatalo mo le tele o taimi ina ia maua au tusitusiga paia. Na tatalo foi lou toalua ma tamaiti laiti i aso uma mo le tolu vaiaso, ma faapea atu, "Tama Faalelagi, faamolemole toe faafoi mai tusitusiga paia a Tama."

Ina ua mavae le tolu vaiaso na ou mauaina se uunaiga faaleagaga malosi lava: "Elder Cook, o le a le umi o le a e faaaauau ai e aunoa ma le faitau ma le suesue?" Na maatiati mai le vevela o upu, ma na ou filifili ai ua tatau ona lava lou lotomualalalo ma lava le usiusitai e toe amata uma ai. I le faaaogaina o tusitusiga paia a lou toalua, na ou amata ona faitau i le Kenese i le Feagaiga Tuai, ma faatasi ai ma lana faatagaga, ma toe makaina ma faafesootai mau.

Ia Aokuso i le aso 18, na taunuū mai ai se tagata faigalugega o le Ekalesia, o Uso Eb Davis, i Ekuatoa mai Polivia ma se afifi mai le peresitene o le misiona i La Paz. Na ia faataatitia au tusitusiga paia i luga o lau kesi faatasi ma faamatalaga na ou faia o au uunaiga faaleagaga.

O le olioli na ou oo i ai e le mafai ona faamatalaina. I le iloaina faapea o le Alii, i ni auala faavavega, e mafai ona aveesea mai na tusi mai La Paz, o se aai e 700,000–800,000 tagata, mai lima o tagata gaoi ma toe faafoi mai ma le atoatoa—leai se laupepa na toesea, masae, pe palapala—e le oo lava i ai lou malamalamana. I lena aso, na ou folafola atu ai i le Alii o le a ou faaaogaina ia sili atu le aoga o lou taimi ma au tusitusiga paia nai so isi lava taimi muamua.

Na ou iloaina mulimuli ane faapea o se tamaitai na i ai i le maketi—o se tasi mai le fia selau i La Paz—na vaai i se tamaloa ona o loo talotalo solo se tusi lanu uliuli. O ia o se tasi o le lotu porotesano ma na maua se uunaiga malosi faapea o se mea paia o loo faia ma le le faaaloalo. Na ia agai atu i le tamaloa ma fesili atu po o le a lena mea. Na te lei iloaina ae na ia faaali atu ia te ia le tusi. Sa fesili atu



o ia pe i ai se isi mea. Na ia toso ane i luga se isi tusi lanu uliuli. Na ia fesili atu pe i ai se isi mea. Na ia toese mai se faila e tumu i pepa ma faapea mai o le a ia susunuina. Ona ia fai atu lea o le a ia faatauina na mea mai ia te ia, lea na ia malie i ai, mo le tau e 50 peso (pe a ma le I.S. \$2.50).

Mulimuli ane, na ia le mautinoa pe aisea na ia faatauina ai tusi. Na faaPeretania, ae na te le iloa lava se Igilisi. Ma na taugata tele—toeitiiti lava 10 pasene o lona totogi i le masina. Sa leai le mafuaaga na te faatauina ai tusi sei vagana ai lana uunaiga faaleagaga. Sa ia vave amata loa se sailiga mo le lotu lea na tusia i luma o tusi: O le Ekalesia a Iesu Keriso o le Au Paia o Aso e Gata Ai.

Ina ua mavae le fesili atu i ni nai lotu, na iu ina taunu o ia i le ofisa o le misiona a le Ekalesia i La Paz. Na te lei faalogo e uiga i le taui pe vaai i le faasalalauga i le nusipepa, lea na tatau ona faaalia i lena aso. Na te lei fesili mo se tupe, e oo lava i le toe totogiina o le 50 peso na ia totogia. Na taliaina e faifeatalai tusi ma le olioli ma totogi atu pea ia te ia le taui.

Na ia tau i faifeatalai o loo faatasi o ia ma se vaega Penetekoso ae na faalogo ma le filiga ao latou tau atu ia te ia e uiga i le talalelei. Na ia manatuaina le faitau i se mea e uiga ia Iosefa Samita mai se tamai tusi na ia pikiina i le auala i le lua pe tolu tausaga talu ai. Na ia taliaina lesona a faifeatalai, ma i le maea ai o le lesona lona lua, na ia tau-tino mai e papatiso. I le lua vaiaso mulimuli ane, ia Setema aso 11, 1977, i se Aso Sa i le aoauli i se paranesi i La Paz, Polivia, na papatiso ai Maria Cloefe Cardenas Terrazas ma lana tama tama o Marco Fernando Miranda Cardenas, e 12 tausaga.

Na suia e le Alii ou lagona malolosi o le leai o se faamoe-moe ina ua leiloloa au tusitusiga paia i ni lagona maoae o le olioli i le vaaia o Lona aao ua faaalia. Na fetalai mai le Alii, “O le mea lea ou te fai atu ai ia te outou, o mea uma lava tou te ole mai ai ia outou tatalo, ina faatuatua ia o le a maua e outou, ona faia lava lea mo outou” (Mareko 11:24).

E faafogofaga ma tali mai le Atua ia tatou tatalo pe afai tatou te faia i le faatuatua ia te Ia ma Lona Alo, o Iesu Keriso. ■

O le ola tutoatasi e tele ona ituaiga. Faatasi ai ma le fesoasoani a le Alii, tatou te tuputupu a'e ai i le tino, mafausau, ma le agaga—ma fesoasoani ai i isi ia faia foi faapena. O tala nei e ono o loo faaalia ai le ala ua faamanuiaina ai tagata o le eklesia e ala i le mafai ona ola tutoatasi atili.

SAUNIUNIGA MO NI FAALAVELAVE FAAFUASEI: MAFUIE MA FAGU TAMIONE [DEMIJOHNS]

Ina ua iva masina o lo'u matua, sa maua ai o'u matua—o se ulugalii talavou, ma ni tamaiti se toatolu ma le isi sa maitaga ai [tina]—i se mafuie e 7.5 le malosi i Atenitina. A o amata ona pau i lalo le matou fale, sa toso mai i matou e lo'u tama ma lou tina ma taufetuli loa. Ina ua uma ona siaki e vaai pe le o afaina i matou, sa laua fetilotlofa'i solo loa i le faatamaiaga. Sa vave ona iloilo e lo'u tama mea na faaleagaina ma le aoga, ma iloa ai, o le a leai ni a matou vai mama mai le alavai faitele. Sa lei lava foi ni vai e fufulu ese ai le pefu mai fale na pauu!

Ina ua aluese atu le lagona o le faate'ia, sa toso mai e lo'u tama lana

ula ma alu loa e siaki lona tina, o le sa nofo i se pitonuu e le mamaeo ese atu. Ina ua oo atu i le fale ua faale-againa a lona tina, sa savali atu i le pito i tua i le mea sa saofai ai [lona tina] ma ni nai ona maosiosia.

Sa fai atu lo'u tinamatua i lo'u tama e faasao mai nisi o mea mai mea na faaleagaina, ao ia faia lea mea, sa tau ai i ni fagu tamione se lua (o ni koneteina mata'eta'e sa faatau mai ai le 5 i le 15 kalone [20 i le 60 L] o le uaina) na tumu i le vaiinu mama. Sa le'i faaleagaina ia [fagu].

O ni nai masina a o le'i oso le mafuie, sa faatonuina ai e Peresitene

Spencer W. Kimball (1895–1985) le Au Paia i le lalolagi atoa e teu ni meaai ma ni vai. Sa faalogo lo'u tinamatua, o se tagata fou liliu mai. Mai i na fagu tamione e lua, sa mafai ai ona taulima manaoga o lo'u aiga mo ni aso se lua seja oo ina taunu mai le fesoasoani.

O lenei faataitaiga o le usiusitai o lou tinamatua, sa o se molimau i lo'u tama, o le na liliu mulimuli ane i le talalelei. Talu mai lena taimi ua faamauina lo'u aiga i le malumalu. Ou te matuai faafetai i le faatuatua ma le usiusitai o lou tinamatua i le valaau e saunia. ■

Ricardo Sosa, Santa Lucia, Atenitina

Sa faalogo lo'u tinamatua i le perofeta ma faasuasua ni fagu tamione se lua i le vaiinu mama, lea sa taliina ai manaoga o lo'u aiga seja oo ina taunu mai le fesoasoani.



SOIFUA MALOLOINA FAALETINO: PA'Ū O PAUNA MA LE UPU O LE POTO

le 60 ma ona tupu o o'u tausaga, sa atili faigata ai ona ou feosofai. Sa toeitiiti a 300 pauna (136 kg) lo'u mamafa. Sa tau leai so'u malosi ma se lavatia ma na oo lava ina aumai se pemita i paka a tagata e le atoatoa le malosi ina ia mafai ona ou paka latalata atu ai i faleoloa.

Sa tonu loa ia te a'u ua oo i le taimi e faapa'ū ai ni pauna. Sa ou susue i le Mataupu Faavae ma Feagaiga 89 ma tatalo atu i le Tama Faalelagi, "Fesoasoani mai ia ou malamalama i le mea tonu o loo ta'u mai e lenei [mau] ia te a'u." I le aluga o se vaitaimi umi, na faapea ona amata ai ona i ai se faa-uigaga fou o upu taitasi. E ui lava ou te le inu ava malosi, lauti, po o le kofe, ma ou te le ulaula, ae sa ou le malamalama i le savali atoa. Na ou iloa o le Upu o le Poto o se taiala o le soifua maloloina, ae ou te le'i mafaufau muamua lava i ai o se ituaiga o olaga.

Mo le taimi muamua lava, na ou lagonaina moni ai e mafai ona ou suia

le sitaili o lo'u olaga. Sa ou faatuina se sini moni ia faapa'ū ni pauna se 50 (23 kg) i totonus o le 50 vaiaso.

Sa ou mataituina tele le malosi o [calories] ma niutirene o a'u meaai. Sa ou sailili i aoga faalesoifua maloloina o mea uma na ou aiina. A o ou aiina meaai maloloina, sa ou lagonaina le faamalieina. Sa leai ni meaai na ou momoo i ai. Na foliga mai ua iloa e lo'u tino mea sa ia manaomia. O meaai le maloloina sa masani ona ou fiafia i ai ua le toe mananaia. Sa tuu lo'u ai mea suamalie. I le aluga o taimi, sa tuu ai lo'u fatauina o le tele o le malosi o [calories] ae ai meaai e maua i laauiti, e pei ona fai mai le Upu o le Poto "o mea uma e fua mai, pe e i totonus o le eleele po o luga o le eleele" (MF&F 89:16). Sa ou ausia la'u sini ma na sili atu. I le silia teisi ma le 23 masina, ae ua pa'ū le silia ma le afa o le mamafa o lo'u tino. Ua 12 fua o ofu ua laitiiti ai! Ua silia ma le tolu tausaga o o'u tausisia lena mamafa.

Ua ou lagona le maloloina. Ua le toe i ai ni faafitauli i le tausisia o le tulaga e tatau ona i ai le suka pe a ou fiaai, ma ou te le manatua le taimi mulimuli na tiga ai lo'u ulu. Ua le toe manaomia ona inu ni a'u vai po o ni fualau. A o saofaga le pa'ū o pauna i le aotelega o o'u faalogona i le ola manuia, ua faapena foi ma le sitaili fou o lo'u olaga.

O le puleaina o mea ou te aia o se vaega o le faatoilaloina o le tagata o le lalolagi (tagai Mosaea 3:19). O le tau-nuuga o lena mea, ua faaleleia ai lo'u iloatino faaleagaga, ua mafai ai ona ou maua le folafolaga e faapea, "o le a [ou] maua le poto ma oa silisili o le malamalama, o oa natia lava" (MF&F 89:19). O le lafoai o meaai e le maloloina e faigofie ma vave ona maua mo le poto o se fesuiaiga lelei lea.

E sili ona ou faafetai i se Tama Faalelagi agaalofa o le na faafogofa i la'u augani faatauvaa ma tuuina mai ia te a'u se vaaiga manino i le Upu o le Poto. Ua ou iloa o le Upu o le Poto o le faaaliga. Ua ou iloa e mafai ona suia ai olaga. ■

Carol E. Wolf, Iuta, ISA



FAIGALUEGA: TELE O LE FAATUATUA, MA MEAAFALE ITIITI

Ina ua ma faaipoipo ma lou toalua, sa ou le faigaluega. Sa laiti lava ni a ma'ua meaafale, ae sa tele lo ma alofa ma tele lo ma faatuatua.

Ina ua iu ina maua la'u galuega, sa manaomia ai ona ou faigaluega i afiafi o Aso Sa. Sa ou folafola atu i le Alii o le a ou le faigaluega i Lona aso. Ae sa ou nafa lava ma le tuuina mai o mea e manaomia e lo'u aiga. Ae ui lava i lea, sa le'i aluese mai lo'u mafaufau i la'u folafolaga sa fai.

Na oo mai la'u tali i le Aso Sa na sosoo ai a o usuina le "Faafetai mo le Sapati" (*Viga*, nu. 177) ma iloa ia le taua o le aso Sapati. Ina ua ou iloaina o le fetuunaiga o se taimi faigaluega fou sa le o se filifiliga, na ou faamavae ai loa mai la'u galuega. Sa faasolo pe a le olaga, ma le talitonu o le a tausia i ma'ua e le Alii. Sa faigaluega lo'u toalua e tausai i ma'ua, ma sa maua le ma tama teine muamua o Saria.



O le taimi lea, sa ou aveina ai se kosi enisinia o mea tau eletonika, na faaogaina ia le Tupe Faaagaga mo Aoga. Ae sa leai lava se galuega na maua.

Sa faapea ona toe foi lo'u toalua e faigaluega ina ua tolu masina talu ona fanau Saria, ae sa matuai misia tele o ia e Saria. Sa ma tatalo ina ia iloa ai le mea e fai, ma tonu ai e nofo o ia mai le galuega. Sa pei sa le faautauta, ae sa ma lagona o le mea lea na tatau ona ma faia. E fa masina o matou maua se tupe maua mo tagata e le o i latou lava ua mafua ai ona leai ni galuega, ina ia su'e ai sau galuega, ma i se taimi talafeagai lava, na maua ai sa'u galuega le tumau.

Ina ua fanau le ma tama teine lona lua o Amanda, sa iu loa ina ou maua se galuega faataitai e aoao ai, ae sa tumau lava le tulaga faigata. Sa itiiti lava a matou meaafale na i ai ma leai se galuega mautu. E faalua ona ou auai i le kosi o le tomai faapitoa o le ola

Sa ou folafola atu i le Alii o le a ou le faigaluega i Lona aso. Sa ou faamavae mai la'u galuega, ma le talitonu o le a la tausia i matou.

tutoatasi na ofoina mai e le Ekalesia. Sa ou faia le mea na sili ona lelei, e ui lava na le a'ua'u si tupe itiiti na ou mauaina mo mea autu sa matou manaomia.

E sefululima masina talu ona amata la'u galuega faataitai e aoao ai, ona maua ai lea o la'u galuega o loo i ai nei. O loo avea nei a'u o se enisinia i le fuaga o le malosiaga tau eletise i se nofoaga fai faatau tele. Ou te faigaluega i le Aso Gafua e oo i le Aso Faraile, lea ou te ta'u o se vavega i lenei ituaiga falefaigaluega. O isi a'u soagalulue e faigaluega i Aso Sa ma aso malolo. Ua i ai se matou fuafuaga faataatia mo le soifua maloloina ma meaafale! Ua ou iloa o le Alii ma le Tupe Faaagaga mo Aoga na alai ona ou oo mai iiinei. Ua ou iloa afai e fai la tatou vaega, o le a fai e le Alii i taimi uma Lana vaega, ma o le a mafai ona tumau lo tatou ola tutoatasi. ■

Lenine Santiago Duarte Nazareno,
Salvador, Bahia, Pasila

TUPE: POLESI, FALAOA, MA LE ARAISA MA PI

O le aoga na faauu mai ai lou toalua sa taugata lava, o lea sa matou tulimatai atu ai i se galuega o le a fesoasoani e totogi uma ai a matou aitalafu. Sa ofoina mai ia i maua ni isi o tulaga ae sa sili atu ona ma fiafia i se tulaga o se polofesa i le kolisi i Hawaii. E ui i lea, ina ua taunuu mai le ma konakarate, sa maualalo ifo le totogi nai lo o le mea na matou talanoaina. Sa logoina i maua e faapea sa i ai se aiaiga fou ma o le fetuutunaiga sa le o se mea lea e filifili ai. Sa ma lagona le mautinoa i le galuega fou o lea sa ma saini ai lava le konakarate.

Sa matou fiafia lava i Hawaii, sa fiafia lou toalua i lana galuega, ma sa faamanuiaina i matou o se aiga. Sa foliga mai sa sologa lelei mea i le totogiina o le ma aitalafu a le tagata aoga, sia oo ina logoina i maua e le kamupani kata fai aitalafu, o le ma pasene fou o le a 14 pasene nai lo o le 3 pasene na i ai i lea taimi. Sa ma finau atu sa totogi i taimi uma i le taimi sao a maua peimeni ma na uma ai ona totogi le tele o le aitalafu. Peitai sa lei suia le tala a le kamupani.

O le mea muamua, sa ma faia nisi o auala fou e maua ai ni tupe, fesitai a maua paleni i kata fai aitalafu eseese e selo pasene ia tului mo ni taimi pupuu. Ona amata ai lea ona tuutuu i lalo tupe faaalu. Sa matuai tele se faaititia o le paketi o a matou meaai, lavalava ma napekini [o tamaiti] mo le matou aiga e toafitu. Sa matou ola i a matou meaai na teu. O taeao uma lava sa ai ai a matou polesi; o aoauli uma sa ai ai a matou falaoa e fai i le fale; ae o afiafi uma sa ai ai a matou araisa ma pi. Sa leai ni mea taugata e pei o pata, susu fou, po o vai suamalie. A uma ona totogi la matou sefuluai ma tupe faaalu masani, ona alu uma lea o le matou tupe maua i le totogiga faauma o a matou kata fai aitalafu.

O le ono masina mulimuli ane, sa uma ai ona matou totogia le 90 pasene o le matou aitalafu! Ua faateleina e le Alii la matou tupe maua i auala faavavega. Sa mafai ai ona matou vave totogiina uma le aitalafu na totoe, ma matou te matuai faafetai ai lava. O loo faasea pea lau tama teine e uiga i le vaitaimi sa ia aiina le polesi i taeao uma, ae ua ou iloa, o le totogiina o le matou sefuluai ma le usitai i le perofeta, sa faamanuiaina ai i matou i mea tautupe ma le faaletino. ■

Ua taofia le igoa, Hawaii, ISA



S a foliga lava sa sologa lelei peimени o le matou aitalafu a le tagata aoga sia oo ina logoina i matou e le kamupani kata fai aitalafu, ua sii i luga le totogi o le matou pasene.



S a ma mananao
ma lō'u toalua e
faaputu se sapalai
tele o meaai e teu,
o lea sa tonu ai o
le a ma faatauina
mai se mea faasili i
vaiaso uma lava.

TEUINA O MEAAI: SISI TUUAPA MA TOTOGI O LE MOKESI

Ina ua ou faaipoipo, sa amata ona ou filiga e teu meaai. Sa ma mananao ma lo'u toalua e faaputu se sapalai tele, ae sa le mafai ona ma faatau uma mai i le taimi e tasi, o lea sa tonu ai o le a ma faatauina mai se mea faasili i vaiaso uma lava. Sa ma vaavaai mo ni tau faapitoa i mea e masani ona ma faatauina mai, ae maise lava meaai tuuapa.

E ese lo'u fiafia ou te tilotilo i la'u kapoti e vaai ai i si a'u faaputuga laitiiti o meaai tuuapa ma meaai matutu ua faasolosolo lava ina tele. I se tasi taimi sa ma faia ai le mea sese o le faatau mai o sisi tuuapa, lea sa [ma] inoino tele i lona [tofo], ae sa faamalosi lava

lo'u toalua e ai ia apa i vaiaso taitasi seja oo lava ina uma. Ina ua feololo le tele o a ma meaai na teu, sa amata loa ona ma aai mai ai, ma malilie e toe sui mai aitema taitasi na ai i ni aitema se lua pe sili atu.

E le'i umi ae fai si tumu o le ma kapoti, o lea sa ma faatauina mai ai ni aitema e teu mo a ma taifau ma pusi. Sa amata foi ona ma teuina laulaau ma laulaau faamanogi meaai, o saito na teu i pepa ua mimiti ese le ea, vaiinu ma fagu suamalie, ma soo se mea sa ma faa-aogaina i aso uma sa le o ni meaai, e pei o fasimoli, mea faamanogi, ma vailaau ta lavalava.

Ona ma faatauina lea o se fale, ae e fetaui lava le sauni atu e faamautu le faatauga o le fale, ma le oso maualuga o le totogi o le mokesi. Na toeitiiti atoa le tausaga o ma ola i ma meaai na teu ina ia aloese ai mai le aveesea o le fale.

O le teuina o meaai i le taimi lenei, ua o se vaega masani o le tapenaina o le fale. Matou te faaaogaina ma ua faamanuiaina ai i aso uma lava. Ou te matuai faafetai ona sa ma faalogo le fautuaga musuia mai perofeta a le Alii, aua o lona uiga, o le taimi nei, e mafai ona ou fetilofa'i ma le loto faafetai i lo'u fale mafanafana ma nofogofie. ■

Yvonne Aston, Atumotu o Channel, Malo Aufaatasi

AGAI ATU I LE ALA O LE FAATELEINA O LE OLA-TUTOATASI

Faatulaga oe lava i nei faamatalaga ia maua ai se vaiga o le mea o loo e i ai i le malaga agai atu i le ola tutoatasi.

O le iloiloga lenei e le o se lisi atoa o taiala. A o outou suesueina ma lou aiga lenei autu ma fefau-tua'a'i faatasi, e mafai ona uunaia oe e le Agaga ia iloa ai auala e faaleleia atili ai.

I le maea ai o le iloiloga faale-tagata lava ia, mafaufau e faatutu nisi o sini i eria sa e maua ai ni togia maualalo.

Tupe

- 1. Ou te sailia ni auala e sefe ai tupe e ala i le faaititia o tupe faaalu i mea e le manaomia.
- 2. E masani ona ou tuueseina se tupe i se teugatupe po o se teugatupe e faafaigaluega [inivesil].
- 3. Ou te aloese mai le faia o aitalafu e le manaomia.
- 4. Ou te totogia se sefuluai faamaoni ma foai se taulaga anapogi ma le limafoai.
- 5. Ou te tausia lelei a'u meatotino ina ia umi se taimi o aoga.

Saunia

- 1. O loo i ai sa'u tinoitupe ua faataatia ese e faaaoga pe a i ai se mea e tupu faafuasei.
- 2. Ou te teuina i lo'u fale ia sapalai mo manaoga faafuasei (e pei o palanikeke, moligao, moliuila).
- 3. Ou te teuina pepa taua i se nofoaga malu, ma o loo ou iloa ma iloa e le matou aiga le mea e maua i ai.
- 4. Ou te faataua soo mai ma teu ni meaai ma ni vai faasili.
- 5. Ou te faaaogaina meaai e teu o loo i ai, ma toe sui mai i meaai fou ina ia le uma le aoga.

Aoga

- 1. Ou te sailia avanoa aloaia ma le aloaia e aoao ai.
- 2. Pe a saili ia maua nisi aoaoga, ou te vaavaai mo punaoa e pei o sikolasipi po o le Tupe Faaagaga mo Aoga.
- 3. Ou te taliaina le faailoa atu i manatu ma finagalo e ese mai ia te a'u.
- 4. Ou te sailia le Agaga ina ia fesoasoani ia ou iloatino ai le mea moni ma taofimau ai mea ou te aoaoina.
- 5. Ou te faaaofia ai le suesueina o le talalelei i aso taitasi o se vaega o a'u aoaoga.

Soifua Maloloina Faaletino

- 1. Ou te faia se taumafaiga e faamalositino soo.
- 2. Ou te ai i meaai maloloina ma lava vai e inu i aso uma.
- 3. Ou te ola i le Upu o le Poto ma uunaia isi ia faia foi faapea.
- 4. Ou te aloese mai le avea o vailaau faasaina ma se vaisu.
- 5. E lava la'u moe ma aloese mai le moeumi.

Galuega

- 1. Ou te faia taumafaiga e faaleleia atili ai o'u tomai faigaluega ma le faimeame'a e ala i semina ma vasega e lagolagoina e falefaigaluega.
- 2. E mafai ona ou faigaluega lelei ma isi, ma latou te faatua-tuaina a'u.
- 3. A o le'i faia le sailiga o galuega, ou te sailia ni manatu faaalia i la'u tusi talosaga ma o'u tomai i faatalatalanoaga.
- 4. Ou te agaga tatalo ma mautinoa a o sailia se galuega.
- 5. Ou te vaavaai mo avanoa e faia ai ni fesootaiga fou ma ni tagata e faamoemoe e oo atu ai ina faigaluega.

Ki o tali

1 = E le taitai lava, **2** = O nisi taimi, **3** = E masani lava, **4** = Toetoe lava o taimi uma, **5** = O taimi uma lava



Saunia e Elder
L. Whitney Clayton
O Le Au Peresitene
o Fitugafulu

| O M A U O O | O |

O se tasi o vaaiga aupito sili ona faamomoiloto i tusitusiga paia uma o loo faamaumauina i le Tusi a Ioane. Na tupu ina ua uma ona mafatia le Faaola i tiga e le mafaamatatalaina mo a tatou agasala ma vaivai o le tagata i le Faatoaga o Kete-semane (tagai MF&F 19:15–18).

O lenei foi vaaiga sa sosoo ma Lona faalataga ma le pu'e faapagotaina ma sa tupu ina ua mavae le po o le faalumaina ma sauaga mataga faaletino sa Ia puapuagatia ai i lima o taitai o sa Iutaia. Sa oo mai ina ua uma ona sasa faamo'amo'a o Ia e fitafita Roma sa faatinoina i lalo o le faatonuga a Ponotio Pilato. Sa tupu ina ua uma ona oomi le pale tuitui i luga o Lona ao.

Sa faaiuina e Pilato e faapea, e leai se mea na faia e Iesu e tatau ai ona faasatauroina. Sa ia poloaiina ina ia sasaina Jesu, o se ituaiga o faasalaga faaletino e aupito sili ona tiga ae e masani lava e le iu i le otu. Atonu sa faamoemoe Pilato e faapea, o le fattaigaga ma le faalumaina faapena o le Faaola, o le a ia tauanauina ai taitai

o sa Iutaia e faapea na aoao ia Iesu se lesona e matautia le tiga ma sa faia o se faataitaiga i le lautele. Atonu sa faamoemoe o ia ia fagua ai ni lagona o le alofa mutimutivale ia i latou. O le mea lea, ina ua uma ona sasaina, sa faatonu atu Pilato e aumai Iesu ia vaai atu i ai le lautele [o tagata].

"Faauta i le Tagata!"

"Ona maliu atu lea o Iesu i fafo, ua pale i le pale tuitui, ma ofu i le ofu pauli. Ua fai atu foi Pilato ia te i latou, Faauta i le tagata!"

"Ua vaai atu ia te ia le au ositaulaga ma auauna, ona alalaga lea o i latou, ua faapea, Ina faasatauro ia, faasatauro ia. Ua fai atu Pilato ia te i latou, Ina ave ia e outou ia te ia, ma ia outou faastauroina: aua ou te le iloa se mea e sala ai o ia" (Ioane 19:5–6).

E ui ina taua tele e pei foi ona taua le vaega atoa o le tala, ou te faagata mai i upu a Pilato: "Faauta i le tagata!"

O le augani a Pilato sa matuai amusia lava. O foliga vaaia faaletino o Iesu i lena taimi sa matuai faaleagaina,

I le tusi lenei ma le isi e sosoo ai, o loo molimau mai ai Elder Clayton ma lona faletua o Kathy, i le Faaola ma e uiga i Lona mafai ona fesoasoani i fanau a le Atua ia ausia o latou gafatia e faavavau.

Keriso



ae sa le'i i ai muamua lava seja oo mai i lena taimi, ma e le'i toe i ai lava talu mai lena taimi, se alii po o se tamaitai sa silisili ona tatau ona "vaai atu" i ai. Sa atoatoa lona soifuaga. Sa leai se tagata na tusa ma ia. E leai se tasi na ola e pei ona sa soifua ai o Ia. E leai lava se tasi o le a soifua e pei o Ia. Sa ia te ia uiga auaumama uma i lona tulaga atoatoa.

Sa i ai i le Faaola le mana uma o le loto pulea. Sa atoatoa ona faalogona ma manatu, na pei foi o Ona mafaufauga. Sa le tapulaa Lona malamalama. E na o Ia lava sa agavaa moni i le vaai atu i ai—mai vaaiga uma—ma i le suesueina, fuafaatatauina, ma viaina. E leai se vaaiga i totonu o Lona mafaufau, loto, ma lagona o le a, pe e mafai ona le fiafia. O Ona foliga vaaia sa le'i atagia ai i lena taimi, ae o Iesu

o le faataitaiga atoatoa lea o le ola faamanuina.

O lea la, e le o Ona foliga vaaia i lena taimi o puapuaga e tatau ona tatou manatua muamua ma le sili (tagai Isaia 53:2). O le ituaiga tagata sa i ai o Ia i totonu i lena tino faaletino pagatia sa faapea ona fuafuaina ai mea uma mo i tatou uma. O le ituaiga tagata sa i ai o Ia na mafai ai le mea sa Ia faia. O le matagofie o le ituaiga tagata sa i ai o Ia sa tosina atu i ai la tatou maitauga.

O le mea e tatau ona tatou vaaia a o tatou "vaai atu i le tagata" o Lona manumalo sili i autau a le tiapolo, e ui lava sa le'i foliga mai i lena taimi o se manumalo. O Lona to'a lelei i le totonugalemu o le afa sili ona malosi o le a tigaina ai soo se tagata ola. O masini leaga uma ua gaosia e le fili

sa, pe o le a le toe umi ae faaaogina e faasagatau atu ai ia te Ia. Sa ia faatoilaloina ma manumalo i na mea uma. Sa tulai filemu ma to'a lelei o Ia i luma o Pilato.

O Lana pule i luga o elemene faaletino o le lalolagi ma tulaga o le tagata soifua e le masalomia lava na faaalia ai. Sa Ia faatonuina agaga leaga. Sa Ia faamaloloina e mama'i ma faapupula i e tauaso ma faafaa logo i e tutuli. Sa Ia toe faatuina mai le oti i le ola, e aofia ai ni tamaiti sa Ia toe faafoi atu i o latou matua. Sa Ia muai silafia mafaufauga ma lagona o tagata uma. Sa Ia faamagaloina agasala ma faamama lepela. Sa Ia tauaveina le avega o agasala, tiga, ma'i, ma le atoatoa o tagata ola uma i le po a'o lumanai le vaaiga ma Pilato. O le mea e leaga ai, sa tigaina foi o Ia mo



agasala ai latou o e, i lena lava taimi sa sauaina o Ia.

E moni ai, "Faauta i le tagata." O Ia o le Alo o le Atua soifua. O Ia o le faataitaiga o le ola, o Le na auina mai e faaali mai le ala ma ia avea ma Ala. O Ia o "le ala, ma le upu moni, ma le ola" (Ioane 14:6) mo i tatou uma. O na upu e tolu, "faauta i le tagata," sa faaalia ai ma le le iloa ma e le'i faamoemoeina e Pilato le mamanu faigofie mo le mauaina o faamoemoga aupito maualuluga o le olaga.

Ina ua fai atu Pilato i tagata Iutaia e vaai atu i le Faaola, sa ia faasino atu i latou ma i tatou agai i le Toatasi, i le tagata e toatasi, e mafai ona faia o tatou olaga ia manuia ma lo tatou "faanolataga ia atoatoa."¹ O le taunuuga, o le poloaiga "Tepa atu i le Atua ma e ola ai" (Alema 37:47).

O le mea e tatau ona tatou manauia pe a tatou vaai atu ia te Ia o le, ona o Ia, ma mea uma sa Ia faia ma mea uma sa i ai o Ia ma o loo i ai, e mafai foi ona tatou manumalo. E mafai foi ona tatou faatoilaloina. E mafai ona tatou ola manuia i le totonugalemu o tofotofoga. Afai tatou te filifili e "vaai atu" ia te Ia ma talia ma faaaoga Lana talalelei faaola, o le a Ia faaolaina i tatou. O le a Ia laveaia i tatou mai aafiaga o o tatou lava natura agasala ma vaivaiga, ma o le a Ia laveai i tatou mai le agasala, mai le vaivai faaleagaga, ma mai le toilalo faaiu e faavavau. O le a Ia faamama, faaleleia, faamatagofie, ma iu ai ina faaatoatoa i tatou. O le a Ia tuuina mai ia i tatou le olioli ma le filemu. O Ia o le faavae i le ola faamanuiaina.

O Se Lauga e uiga i Fatulaau

Ma te nonofo ma lo'u toalua o Kathy i luga o se tafamauga. E ola ai iina—se ituaiga laau o le—garava akone. E le pei o isi laau garava tetele ma malolosi, o laau garava akone e le tetele lava, ae e malolosi ma aulelei.

O ni nai tausaga ua mavae sa ma tuuina ai se kate tele e toto ai laau i le auala savali e tau atu i le faitotoa pito i luma o le matou pale. Sa matou totoina ai ni fugalaau felanulanui i totonu o le kate, lea e taatia tonu i lalo o lala o se laau garava akone. Ina ua sui le vaitau ma amata le tautoulu, sa amata ona toulu ifo fatu po o akone o le garava akone i totonu o le kate fugalaau.

I se tasi aso o le tautoulu, sa ou matauina ai ni nai tama'i fatulaau ua amata ona totogo a'e. Ma te le'i mananao i se isi lava mea ae na'o fugalaau i totonu o le kate, o lea na amata ai ona ou tase'i ese ia fatulaau mai le palapala o le kate fugalaau. O le mea na faateia ai a'u, ona o aa sa ta'i tolu pe tai faafaina le uumi nai lo o vaega sa aliali a'e i luga o fatulaau i luga o le palapala.

I Iuta, ISA, e vevela lava ia taumafanafana, ma e tau le timu foi, ae o taumalulu e malulu lava ma savili ma le kiona. Ae sa vave lava ona sosolo maualalo aa o fatulaau garava akone i le palapala laualuga. O lenei mea e mafai ai e aa o loo aliali ona ao atu le susu ma niuterene mai le palapala. O aa maualalalo foi na taofia mau ai laau e tutusa'o ai ma mausali i le savili, e amata mai lava a o mu'amu'a. O le maualalalo o aa e faigofie ai le ola o le garava akone. A oo loa ina tau le

tutupu maualuga o fatulaau, e faaauau pea e o latou aa ona fafaga, puipui ma lagolago i latou.

E mafai ona tatou aoao mai i le gavara akone. Ua tofuo'o i tatou i ni aafiaga e faapei o vevela o le taumafanafana ma le malulu o le taumalulu. Sa tatou oo i ni taimi lelei ma ni taimi faigata, o manuia ma toilalo, taimi o le maloloina ma le ma'i, o taimi o le fiafia ma taimi faanoanoa. O le olaga e le tumau. E le lamolemole.

E faapena foi le olaga i ni isi o itu. O loo siomia i tatou uma i aganuu ma tu ma agaifanua o o tatou nuu ma atunuu moni. O nisi o na aafiaga e lelei, ae o nisi e leaga. O nisi o le a faagaeetia ai i tatou, ae o isi o le a faavaivaia ma faaleaga ai i tatou. E mafai ona faamanuiaina o tatou aiga i le malamalama o le talalelei pe faaleagaina e ala i le le tausia o poloaiga a le Atua. O faataitaiga a uo e mafai ona maoae pe matuai leaga lava. E leai se tasi o i tatou e iloa le mea o le a tupu ia i tatou i le olaga. E le mafai ona tatou valoia lo tatou ola maloloina po o le tamaoaiga i le lumanai. E le mafai ona tatou valoia le aafiaga o ttau po o le tau. E oomi mai e tulaga eseese e le mafai ona tatou pulea ni luitau ia i tatou uma.

Ae e le pei o laau, e mafai ona tatou filifili e atia'e ma le iloa lelei le faatulagaga o le aa faaleagaga mo o tatou olaga. Tatou te filifilia le nofoaga e taatia ai o tatou aa ae o le a foi le maualalo e tuu i ai i le palapala. O faaiuga i aso taitasi, e faia ai ni ese-esega laiti, e toetoe lava a le iloa atu, i aa o lo tatou faatuatua, o aafiaga o lena mea e avea ma faavae.

Ia Mauaa i le Faaola

Ona tatou te le iloa le taimi ma pe o le a faapefea foi ona oo mai o tatou luitau, po o le a foi le umi e oo i ai o tatou vaitau patino o le taumalulu po o le taumafanafana, o lea e tatau ai ona tatou totoina faamaualalalo o tatou aa i le mea tatou te mafaia ai, i totolu o le punavai moni e tasi o le tausiga mo o tatou agaga, o le Alii o Iesu Keriso. E finagalo o Ia ina ia manuia o tatou olaga. Ua Ia valaaulia i tatou e o mai ia te Ia. Na Ia fetalai, "Aoao mai ia te a'u, ma faalogo mai i a'u upu; savali i le agamalu o lo'u Agaga, ma o le a e maua ai le filemu ia te a'u" (MF&F 19:23).

O le tatou aoao e uiga ia te Ia, tatou te fausia ai malosiaga o o tatou agaga ina ia talitalia afa o o tatou olaga. Tatou te aoao i le suesue ma le tatalo. Tatou te aoao i le matauina o faataitiga amiontonu. Tatou te aoao a o tatou auauna atu i isi ia [tatou] auauna atu ai ia te Ia (tagai Mataio 25:40). Tatou te aoao a o tatou saili e faataitai ia te Ia i soo se mea tatou te mafaia.

O le faalogo o lona uiga o le usitai ma fai loa, ae le na o le faalogo. Tatou te faalogo atu ia te Ia i suesuega patino o tusitusiga paia. Tatou te faalogo i sauniga faamanatuga ma i le malumalu. Tatou te lagona o Ia i le "leo filemu ma le itiiti" (1 Tupu 19:12). Tatou te faalogo atu ia te Ia i le siufogoa o perofeta ma aposetolo soifua.

O le faalogo ma le toto'a e faamanatu mai ai ia i tatou e faapea, "e le na o mea e ai e ola ai le tagata, a o afioga uma e tulei mai i le fofoga o le Atua" (Mataio 4:4). Tatou te faamalolosia o tatou aa i le tuputupu a'e faifaipea i laa

laiti. A o tatou faalogo, ua tatou mulimuli i le ala na Ia femaliuai ai. O Ia o le ala e tau atu i le ola faamanuiaina, ma o Ia o le malamalama e suluia ai (tagai Ioane 8:12).

Tausi Poloaiga

E leai se mealilo po o se mea e te'i ai e uiga i le mea e mafai ma e tatau ona tatou faia e faamalosia ai o tatou aa: o le tatou tausia o poloaiga a le Atua. O le a tuputupu a'e lo tatou gafatia e fai ai Lona finagalo a o tatou faia Lona finagalo. E iu ina faigofie atu aua tatou te tuputupu a'e i le talitonu ma le faatuatua. A tatou finafinai pea ma le faatuatua i le faaaogaina o mea ttau o le talalelei i o tatou olaga, e faamanuia i tatou e le Alii i le faateleina o le malosi [o le agaga].

O tapuaiga tatau ma le magafagafa e faia se sao ttau i le loloto o o tatou aa faaleagaga. O le auai ma le migao i sauniga faamanatuga ma le tagofia o le faamanatuga ma le manatu tonu i ai, e faia ai le aso Sapati o se aso e sili atu nai lo na o se isi lava aso Sa. E le mafai ona tatou faamaualaloina moni o tatou aa sei vagana ai tatou "manatua pea o ia" (MF&F 20:77, 79). A tatou sauniga i tatou lava a o le'i faia a tatou sauniga, e faapea ona avea ai le Sapati o se aafiaga anoa mo i tatou. A o tatou manatunatu i lo tatou manaomia o le faamagaloga ma le faamanuiaga o le i ai pea o Lona Agaga e faatasi ma i tatou, e amata ona tatou vaai atu i le falesa o se malutaga ae o le faamanatuga o se taimi o le faapaiaga.

Mo lena mafuaaga, e i ai nisi o mea e tatau ona tatou aveina atu i taimi uma tatou te o atu ai i le lotu.

O le mea muamua lava ma ttau o nei mea o se loto momomo ma se agaga salamo. E tatau ona tatou aveina atu se naunautai e saili ma lagona faamanuiaga o le Togiola a le Faaola. E faapena foi, e tatau ona tatou tuua i taimi uma i le fale ia nisi o mea. O le mafaufau i taaloga, galuega, faafiafiaga, ma faatauga e tatau ona tuu e loka i totolu o se kapoti i totolu o o tatou fale faatoa tatalaina i isi lava aso ae le o le aso Sapati. O le tapuai faamaoni e uunaia ai le liua moni. E fesoasoani tatou te auina atu maualalo ai aa o lo tatou faatuatua, i le mea tatou te maua ai se faatanoa faaleagaga, lea "e avea i totolu ia [i tatou] o le vaipuna, e puna i luga i le ola e faavavau" (Ioane 4:14).

Sa tusia e Paulo:

"O lenei faapei ona outou talia o le Alii Keriso Iesu, ia savavali ai outou o ia te ia:

"Ia mauaa outou ma ia atiina a'e ia te ia, ma ia faatumauina i le faatuatua, faapei ona aoaoina o outou" (Kolose 2:6–7).

Afai tatou te le oo i afa ma mala patino, e le taitai maua e o tatou aa le avanoa e malolosi ai. O le mea e leaga ai, o le folau ai saogalemu o lana lava tofotofoga—ma o se tofotofoga faigata. O le leai o ni faafitaui e mafai ona faavaivaia ai i tatou pe afai tatou te le mataala. Atonu tatou te "le vaavaai [tatou] lava, ma o [tatou] mafauauga, ma a [tatou] upu, ma a [tatou] galuega, ma tausi i poloaiga a le Atua, ma tumau pea i le faatuatua" (Mosaea 4:30) e aunoa ma se tofotofoga e faalotomaualaloina ai i tatou ma galue i o tatou loto.

E i ai i le olaga se auala e aumai ai le atuatuvala ia i tatou uma e tusa lava pe o tatou faia le mea sili tatou te mafaia. Seiiloga tatou te faia ni filifiliga sili ona le lelei, lea o taimi uma e oo ai i le pagatia, ae e le masani ona tatou filifili po o le a le taimi pe faapefia foi ona oo mai faafitauli o le olaga i o tatou olaga. Ae e mautinoa lava tatou te filifili i aso taitasi i le ala o le a tatou saunia ai mo i latou. O le mea lea ua faamanatu mai ai e Iosua: "Ina filifili ia o outou i le aso nei po o ai tou te auauna i ai" (Iosua 24:15).

O le isi lea faamanatu:

"Ia outou ulu atu i le faitotoa vaapiapi: aua e vatele le faitotoa, e lautele foi le ala, e tau atu i le malaia, e toatele foi i latou o e ui atu ai:

"Aua e vaapiapi le faitotoa, e lauitiiti foi le ala e tau atu i le ola, e

toaitiiti foi i latou o e maua" (Mataio 7:13–14).

E le tatau ona tatou tete'i pe afai e le lava le malosi o o tatou faatuatua pe a tatou savavali i augutu o le ala vaapiapi ma lauitiiti. E le afaina tele mea tatou te faia ma mea tatou te le faia aua e i ai taunuuga o faatinoga, e faapena foi i le le faia. Afai tatou te le nofouta i faatinoga laiti, i aso taitasi, ma faifai soo ae taua o le talitonuga, ua tatou faavaivaia o tatou aa. I le aluga o le taimi, e faifaimalie ai lava ona tatou o ese atu mai le Atua.

O lea la, o le ala tatou te tautatala atu ai i le tasi ma le isi, o tusi ma tusiga tatou te faiatau i ai, o ata o le televisi ma ata tifaga tatou te matamata ai, o mea tatou te le faiatau i ai, ma o le a le matamata lava i ai, ma tausuaga tatou te filifili e le faalogo i

ai pe toe faia, o ia mea uma e atagia ai le tulaga o loo tatou i ai i luga o le ala vaapiapi ma le lauitiiti—i le ogatotonu po o luga o augutu. E le mafai ona tatou faapea mai o loo tatou fafagaina o tatou aa, pe afai o mea tatou te faia ma le faia e le'i faamoemoeina e avea ai i tatou o ni tagata lelei o le Au Paia. Na pau lava le mea e mafai ona maua ai le saogalemu, o le ogatotonu o le ala vaapiapi ma le lauitiiti.

O Le Ala i le Filemu

E leai se isi mea e sili atu ai le lelei o le mamanu o le olaga, leai se auala mautinoa e maua ai le filemu ma le auala agai i luma, nai lo o le mulimuli i le Alii o Iesu Keriso. Ua na o Ia le tagata i lalo o le lagi e i ai le mana e fai ai o tatou olaga ia sili ona faalelagi (tagai 2 Nifae 31:21;



Mose 6:52). E leai se isi tagata e mafai ona tatou “vaai atu” i ai ua i ai le mana laveai, faafouina, ma liua lea o loo i ai le Faaola.

Na maua tonu lava e upu a Iuta le le maalofia o le gaogao ii o le olaga lea sa faapea ona siomia ai i latou o e e filifilia se isi lava tagata po o se isi lava mea e ese mai nai lo le Faaola: “O ao i latou e le o i ai se vai, ua feleleiaina i matagi; o laau ua malili o latou lau, ua le fua, ua mate faalua, ua liaiina lava” (Iuta 1:12).

E tatau ona matuai mauaa lelei o tatou agaga ia Keriso, ina ia mafai ona tatou onosaia soo se luitau, manumalo i soo se faafitauli, talitalia soo se osofaiga i lo tatou faatuatua, ma avea ai e pei o laau garava—e malosi, mau-sali, ma tumau. O lena ituaiga o mauaa e fuaao i le taimi ma ola umi atu nai lo

o fili uma, e oo lava i mea e aupito sili ona maaleale, le vaaia, ma leaga.

Tatou te aoao mai ia Helamana le ala e faalagolago ai le folafolaga o le malosi e pei o le papa, i lo tatou atiina a'e o o tatou olaga i le Faaola, “o se faavae lea afai e atiae ai tagata e le mafai lava ona pauu i latou” (Helamana 5:12). Sa maua e Isaia i na o nai upu le aano o le uiga, ia mauaa i le Alii o Iesu Keriso ma ia fua mai o tatou agaga i uiga auaumama o le Faaola. Sa ia tusia, “E taitaina foi oe e le aunoa e Ieova; e faamalie foi o ia ia te oe pe a oge vai, ma faamalosia ou ivi; e avea foi oe e pei se fanua ua faasūsūina, e pei o le punavai foi e le mate ona suavai” (Isaia 58:11).

O le Faaola o Iesu Keriso o le faataitaiga o mea mama uma. O Ia o le tagata atoatoa e toatasi ua soifua

[i le lalolagi]. Sa Ia togiola mo a tatou agasala. O Lana Togiola e mafai ai ona avea i tatou o ni tamaitai ma alii o Keriso. E mafai ona faamamaina, suia, faamaloloina, ma faaleleia i tatou. E mafai ona avea o tatou agaga o ni mea matagofie.

Tau ina ia tatou “vaai atu i le tagata” ma le atoatoa faateleina. Tau ina ia tatou faataitai ia te Ia ma le migao faateleina. Tau ina ia tatou mulimuli ia te Ia ma le nau-nautai faateleina. Tau ina ia tatou faalolotoina o tatou aa i le eleele o le faaolataga seja oo ina tatou malolo ia te Ia, o le Papa o lo tatou Togiola. Tau ina ia faateleina lo tatou olioli i le faamanuiga o le ola manuia ua Ia ofoina mai. ■

FAAMATALAGA

1. Tagai “Le Atua, le Tama e,” *Viiga*, nu. 97.



O OE E TAUTUPU

Saunia e Kathy Kipp Clayton

Ola e tusa ma lou taua e faavavau.

Ao i ai lo matou aiga i Atenitina i se tofiga mai le Ekalesia, sa masani ona ma asiiasi ma la'u tama tama i nofoaga taua i o ma'u taimi avanoa. O se tasi o na nofoaga o se pa manu e le pei o se isi lava pa manu na ma vaai muamua i ai.

Nai lo o le ui atu i autafa o pa o manu tautulemomoe, sa valaaulia tagata asiiasi e o atu i totonu o pa e milimili ia manu. O le mulimuli ai i le tagata e aoaoina manu, sa matou o atu ai i totonu o se lotoa na saunia mo leona ma milimili i latou a o foliga mai sa latou le ano mai ia i matou.

Sa ou fesili atu i tagata e aoaoina manu pe na faapefea ona latou tauanauna na manu sauai ia le aia i matou. Sa latou tatai atu lou mafaufau i ni tamai taifau malomaloa sa faapena foi ona nofoia ia pa. A o laiti ia liona, sa fetulina'i solo ma le faalealofa e na tamai taifau ia leona ma gali o latou mulivae. Na oo ina masani tamai liona i le faapupuu i le tulimanu, i le fefefe i taifau.

A o ola a'e liona, sa faaaau ona latou faapupuu i le fefefe. O le minoi lava o se alofilima po o se alofivae o se manu, e faigofie ai lava ona taufetuli atu na taifau, ae sa le'i iloa e leona i latou lava i le ituaiga manu e i ai moni i latou. Latou te le'inofouta i lo latou faasino-maga mamalu ma gafatia.

Tatou te feagai uma lava ma ni faalavefau e faoa lo tatou talitonu ia i tatou lava ma tumau ai ona tatou faapupuu i tulimanu fafaatusa. Ou te ta'uua ni mea se tolu.

Lei o se Talitonu ia i Tatou Lava

O le toatele o i tatou e matele i le faavasega o a tatou faatinoga e ala i mea tatou te toilalo ai nai lo o mea tatou te manuia ai. Afai e sa'o ni a tatou fesili se 80 mai le 100, tatou te ioe ma le faanoanoa ua tatou misia fesili e 20 nai lo o le matauina ma le mitamita o le 80 na sa'o. O le lei o se talitonu i o

tatou gafatia ma ia i tatou lava, e mafai ona faatauaso ai i tatou i lo tatou agavaa ma gafatia moni.

Le Atoatoa o le Malamalama

Sa vaai Nifae i se faaaliga i le tina o le Faaola, ae ina ua fesiligia pe ua malamalama i le afio ifo o le Atua, sa ia ioeina na te le'i iloa le uiga o mea uma. Ae sa ia ta'uua muamua le mea na ia iloa: "E alofa le [Atua] i lana fanau" (tagai 1 Nifae 11:12–17). O le mea aupito taua lena ia iloa. E taofia ai i tatou mai le faatagaina o faalavefau o le le atoatoa o le malamalama ia fetuunai lo tatou mautinoa o le moni o le Ekalesia ma lo tatou sootaga ma le Atua ma Lona alofa tumau ma mamana mo i tatou.

Faatamala po o le Le Mataala

O filifiliga leaga po o le le ano i filifiliga lelei e faasese ai le uiga o lo tatou vaaiga o le mea moni. Sa i ai se mafuaaga faafailoga sa tatau ai i le fanauga a Isarael ona ao mai le manai i aso uma (tagai Esoto 16:4). O le matafaioi i aso uma o le ao mai o meaai sa fesoasoani ia i latou e manatua ai le Atua. O aso nei, o le faiatauga o tusitusiga paia, tatalo, auai i le lotu, ma le auauna atu i le tasi ma le isi, o a tatou manai ia i aso taitasi o ni fanau a le Atua, e fesoasoani ina ia tatou manatua ai le Alii.

Ua ia i tatou le DNA faaleagaga a le Atua o loo fealuai solo i o tatou alatoto. O i tatou o Ona atalii ma afafine ma o Ona tofi. Tia'i ese soo se savali, talitonuga, po o mausa taufaasese, lea e mafua ai ona e faapupuu i tulimanu o lou olaga. Aua ne'i faatagaina i latou e gali i ou mulivae ma e lagona ai le fefe po o le tiga. Ola e tusa ma lou taua e faavavau.

O oe e tautupu. ■

Mai i saunoaga a le Ofisa o Aoga a le Ekalesia, "Like a Watered Garden" ma le "A Regal Identity," na fofogaina i Niu Ioka, ISA, i le aso 13 o Setema, 2015.





LAVEAIINA e Lo'u Tuagane

Ina ua atoa le 12 o lo'u tuagane o Tana, sa ou valaauliaina o ia e amata ona ma o i le malumalu. Ae ou te le'i iloa o le a ma matuai manaomia le lagolago a le tasi ma le isi i tausaga i le lumanai.

Saunia e Brittney Ann Harman

Na toeitiiti lava atoa lo'u 12 i le taimi na faapaiaina ai le Malumalu o Twin Falls Idaho. Sa matuai ou fiafia lava ina ua fai mai lo'u uso matua ia te a'u mo le taimi muamua, pe sa ou manao e amata ona matou o soo ma lana uo i le malumalu.

Sa ou fiafia ina ua atoa le 12 tausaga o lo'u tuagane laiti-iti o Tana i le tolu tausaga mulimuli ane aua ua mafai ona ou valaaulia o ia ma te o atu i le malumalu.

O taeao uma lava sa ma o ai, ma te fesoasoani i le tasi ma le isi e fafagu i luga ma ma o, ma pe a ma lelavava, e fai e Tana ni tala malie e fesoasoani ma te feala ai i luga. A uma

ona ma o i le malumalu, ma te faaalu ni taimi e talanoa ai e uiga i o ma lagona i totolu o le malumalu ma mea sa ma mafaufau i ai.

O le o atu i le malumalu ma Tana sa avea ma faatumutumuga faaleagaga o lo'u vaiaso. E ala i a ma asiasiga faisoo i le malumalu, sa oo ai ina avea i ma'ua ma se uo lelei atu, lea sa faamalosia ai a'u nai lo o mea e mafai ona ou mafaufau i ai, pe a oo mai nisi o tofotofoga i lo'u ala. Sa o ese atu o ma uso matutua e toalua mo le kolisi, ma na faatoa uma lava ona vaelua le matou uarota, na tuua ai i maua ma Tana ua na o nisi o le autalavou malolosi [i le Ekalesia] a le matou uarota.



Sa ma faaaluina ma Tana ni itula e telefoni ma valaaulia ai le autalavou le toaaga i le lotu ma le Mutuale. E masani ona pei o se taumafaiga e leai se faamoemoe, ona e leai se tasi na sau e tusa lava pe toafia ni teineiti sa ou taumafai e faauo i ai.

Sa taumafai foi o ma matua e fesoasoani mai. La te moli-mau mai ia i maua pe a ma lotovaivai, ma tuu mai ia i maua e talanoa atu e uiga i mea ma te feita ai pe a ma o mai i le fale ma le le fiafia. Ae e ui lava i lea, sa le'i faafuasei ona toatele ni a ma uo i le lotu, ma sa atili faigata foi le manao e alu ae sa na o a'u le teine talavou iina. Sa amata ona ma tau le o sio i le malumalu ona o le pisi o a ma fuafuaga o le aoga.

Sa ou faaaluina le tele o le taimi e faitau ai a'u tusitusiga paia ma aioi atu i le Alii e fesoasoani mai ia ou malosi. Sa ou lagona le tuua na o a'u ma lelava—lelava i le tuua na o a'u, lelava i a'u taumafaiga ae leai se eseesega na tupu ai, lelava i le tauiviga faaleagaga ma le faalelagona.

I le taimi lenei, sa ou faigaluega ai o se tagata laveai i le vaitaele a le aai. Sa tele atu lo'u fiafia e i ai iina nai lo o le i ai i le lotu, ona o a'u soafaigaluega o a'u uo ma sa latou fiafia i

taimi uma pe a vaai mai ia te a'u. O se tasi aso, sa ou filifili ai o le a ou le toe alu i le Mutuale ona sa sili atu le malie ma sili atu le aoga o le galuega ia te au i tulaga faaletupe.

Sa ou filifili na sili atu le malie o le galuega nai lo o le Mutuale.

Sa ou le manatu o se mea taua seia oo ina ou matauina a'u lava, ua tuutuu maualalo o'u tulaga faatauaina. Sa leai sa'u tala na fai atu i le palalauvavale a a'u uo, ma i se tasi aso sa ou te'i ai i lo'u faalogo atu ua oso faafuasei la'u palauvavale ae ou te le'i faia muamua lava. Sa faapea foi ona ou matamata i se tifaga le talafeagai i se tasi o po i se pati ma a'u uo faigaluega laveai. Sa ou lagona le faanoanoa tele ma mafaufau po o le a la'u mea na fai.

O le taimi lea, sa fai mai ai o'u matua i le sili atu o le tuuatoatasi o Tana talu mai ona ou le toe alu i le Mutuale. O vaiaso taitasi e fesili mai ai o ia ia te a'u, "Ei, e te alu i le Mutuale nanei?" A foi mai o ia mai le Mutuale, e faasasao



lava i lona potu ma faitau ana tusitusiga paia mo se taimi umi. Sa le toe tautala tele foi, ma a ou fesili atu ia te ia pe o Fafia, pau lava lana tala o le, "Leai" ma savali ese.

O se tasi po na sau ai i le fale ma le tagi ona sa ia lagonaina le matuui tuuatoatasi.

O le taimi lena na ou filifili ai loa e tatau ona ou toe foi. E le afaina po o le a le faigata mo a'u; sa manaomia a'u e Tana.

Sa ave e Tana se kosi o talafaasolopito o aiga i le lotu, ma sa ou filifili ai ou te alu ma te o faatasi ai. Sa ma mananao e toe amata ona ma o soo i le malumalu, ma o lenei la o le a mafai ona maua ni a maua lava igoa.

Sa ma fafia e o faatasi i le vasega i Aso Sa. Pe a tuua le lotu, ma te sueina faatasi ni igoa. O le mea e sili ona manaia ai le ave o o maua lava igoa i le malumalu, ona sa ma mauaina faatasi, ae maise foi, sa mafai ona lagolago ai e le tasi le isi i le lotu, ma fafia ai i le lotu ona sa ma faia le galuega a le Alii.

O le filiga o Tana e auai i le lotu ma le Mutuale sa o se faataitaiga mamana ia te a'u. Sa i ai sa'u molimau

i le talalelei, ae sa ia fesoasoani ina ia ou maua se molimau o le auai i le sauniga ma gaoioiga a le ekalesia.

Sa ma mafai faatasi ona faamafanafana le tasi ma le isi ma faaaoga a maua molimau o le malumalu e fesoasoani

**O a ma'u molimau i le malumalu
sa fesoasoani ia ma malolosi
ai i le Eklesia.**

ai i le tasi ma le isi ia malosi i le Eklesia. Sa le'i lelei tele le auai a le autalavou i le lotu ma le Mutuale, ae na faapea ona ma malolosi atili ai ma Tana ma faateleina le mafai ona tauave a ma'uave avega a o ma fesoasoani i le tasi ma le isi e fetaomi atu pea i luma.

E ese lo'u fafia ona sa ou valaaulaina o ia e sau ma te o i le malumalu. E ui ou te mautinoa sa fesoasoani ia te ia, ae ou te iloa na laveaiina ai a'u. ■

E alaala le tusitala i Idaho, ISA.

AUA LE AAFIA FUAI

Gauai atu i lou aiga ma uo.
E mafai ona faatali le faafouga o lou tulaga.



FAIA O SE OSO I LONA LUMANAI

Saunia e Miriam Bay

Auaunaga o le Ola-Tutoatasi a le Ekalesia

O se manatu, o se
tapoleni osooso, ma se
manao e fesoasoani i
isi na faaosofia ai se
teineitiiti e 11 tausaga
le matua i lesona maoae
e uiga i le ola tutoatasi
ma le auauna atu.

O le tele lava o tamaiti e ta'i 11 tausaga ua pisi i le aoga, feau i le fale, ma gaoioiga ma uo. Peitai o Alexandra C. mai le setete o Durango, Mekisiko, sa le o se [tamaititi] 11 tausaga masani. E faaopoopo atu i mea uma e masani ona fai e tagata talavou o le vaitausaga lena, sa maua e Alexandra ni tupe mai lana ia lava pisinisi ma auauna atu i lona nuu.

Ia, e faapefea la ona amata e se teineitiiti laitii lana ia lava kamupani?

Amatalia i se Manatu

Sa amata ina ua faalogo Alexandra e uiga i nisi o vasega sa faia e le Ekalesia e fesoasoani ai i tagata ia iloa ona ola tutoatasi. O le vaega sa matele lava mo tagata e 18 tausaga ma matutua atu, ae sa naunau Alexandra e auai. Sa fiafia o ia i le manatu o le aoao i le auala e maua ai se galuega pe amata ai sana ia lava pisinisi.

Mata e mafai e ia, o se teineitiiti sa i ai lava i le aoga tulagalua, e le gata ina mamanu lona lava *ia* lumanai, ae fesoasoani foi i tagata e itiiti ni mea o latou maua nai lo o ia? O le mea taua, e toatele tagata o le Ekalesia na te iloa mai lona nuu na itiiti ni aoaoga ma i ai ni nai punaoa.

Sa auai Alexandra i se vaega na ta'ua o le "Amatalia ma le Faateleina o La'u Pisinisi," o se tasi mai le tolu mataupu na tuuina atu. Nai lo o le aoaoina e se faiaoga, o le vaega sa taitaia e se taimua—o se sui o le vaega e taitaia isi sui i le aoaoga ma uunaia talanoaga. E fono Alexandra ma lana vaega i vaiaso uma lava mo le tolu masina.

A o aoao Alexandra i auala e ola tutoatasi ai faaletino ma faaleagaga, sa amata ona tilotilo solo o ia i manaoga o loo i totonu o lana eria. Sa ia matauina, sa le lava ni gaoioiga faafafia mo tamaiti uma i le latou aai, o lea sa ia sefeina ai se tupe ma faatau ai se tamai tapoleni osooso. Sa tuu e Alexandra le tapoleni osooso i se nofoaga faitele ma amata ai ona nono atu i tua, e faaaoga ai manatu sa ia aoaoina i lana kosi e uiga i le faalauiroaga ma mea tautupe.

Sa oo ina lauloa le tapoleni osooso i totonu o lona nuu.



*Sa matuai lelei
lava Alexandra i le
faapaleniga o meaaoga,
le pisinisi o le tapoleni
osooso, ma lona
matafaioi o le taimua.*



FAAMANUIAGA O LE GALUE

“O le atiina ae o le tomai e galue ai o le a fesoasoani ia te oe e saofaga ai i le lalolagi o loo e ola ai. O le a ia aumaia se lagona faateleina o le taua-faaletagata. O le a ia faamanuiaina oe ma lou aiga, i le taimi nei ma le lumanai....

“Ina ia ola faalagolago moni ia te oe lava ia, e tatau ona e aoao e galulue faatasi ma isi ma liliu atu i le Alii mo Lana fesoasoani ma le malosi.”

Mo Le Malosi o le Autalavou (2011), 40, 41.


O Faamanuiaga o le Auauna Atu ma le Galue Malosi

Sa amata foi ona faaaoga e Alexandra ona tomai i isi auala. Ona sa ia faaalialo tele i tagata uma o lana vaega, ma sa ia faia uma mea sa ia tautino ai, sa faatuatuaina ai Alexandra e taimua i se vaega fou—o se tulaga sa masani ona umia e tagata e 18 tausaga pe matutua atu.

Ina ua avea Alexandra ma se taimua, sa avea o ia ma tagata auai aupito laitiiti i lana vaega e toaono. Sa ia suesueina ma le toto'a ia mea e faaaoga a'o le'i oo i fonotaga taitasi a le vaega, ina ia ona mailoa le auala sili ona lelei e fesoasoani ai i tagata o lana vaega. Sa ia faia lana matafaioi ma le manatu mamafa i ai. “E popole o ia pe a le taunuu atu lana vaega i le taimi sa'o po o le, pe a le ola le masini vitio,” na fai mai ai lona tama o Tavita.

Sa matuai lelei lava Alexandra i le faapaleniga o meaaoga, le pisinisi o le tapoleni osooso, ma lona matafaioi o le taimua. Ma o lona manatu sa matuai aoga lava. Na fai mai o ia, “sa faamanuiaina a'u e le Atua ina ua Ia faia a'u o se taimua.” Mo ia, o se tasi o faamanuiaga o le aoao lea e uiga i le alofa ia i latou e te auauna i ai.





*"Na ou aoaoina e mafai
ona ou faaleleia atili a'u
lava.... Ou te iloa na
valaauina e le Atua le
perofeta, ma o le aoaoga
o le ola tutoatasi o se
faaaliga mai ia te Ia."*

Ina ia aoao atili e uiga i vasega o le ola tutoatasi, asiisi i le [lds.org/go/816000](https://www.lds.org/go/816000).

O lena alofa na taitai atu ai o ia e aapa atu i lana vaega ma se manao moni mo i latou ia manuia. Mo se faataitaiga, o taimi taitasi sa latou fono ai, sa fai ai e tagata o le vaega ni tautinoga faalevaiaso e faaaoga mea na latou suesueina i a latou pisinisi ona aoao lea o o latou aiga i matapu faavae o le talalelei na latou aoaoina. Pe a le ausia e tagata auai o le vaega a Alexandra a latou sini pe misi se vasega, sa asiisi atu o ia i o latou fale e vaai pe na a mai i latou ma ia uunaia i latou e faataunu a latou tautinoga. “E ese lo’u fafia e asiisi atu i tagata o la’u vaega,” sa ia fai mai ai.

Sa faaopoopo mai le tama o Alexandra, “Ou te ofo i le vaaia o le malosi o lagona o lo’u afafine laitiiti i le manuia o i latou e limavaivai. E agaalofa tele o ia ia i latou o loo ia tautua i ai.”

O loo avea nei ma se Ofagapi i Tamaitai Talavou, ae ua i ai fuafuaga a Alexandra e faalautele atu lana pisinisi o tapoleni osooso i se nuu latalata ane. O le aoao ia faateleina le ola tutoatasi ma fesoasoani atu i isi ia faia foi lea lava mea, na fai mai ai o ia, ua amata ona ia vaaia ni suiga ia te ia lava ma ana uo fou i lana vaega. Na fai mai Alexandra, “Ua tuputupu a’e la’u molimau.” “Ua faateleina lo’u talitonu ia te a’u lava, ma ou te fia auauna atu.”

Na fai mai Alexandra, ona o lenei kosi faaleaoaoga, ua ia iloa atili ai lona tagata moni ma auala e mafai ona ia auauna atu ai. “Na ou aoaoina e mafai ona ou faaleleia atili a'u lava. Ma ou te fafia e vaai atu o alualu i luma tagata uma o le vaega. Ou te iloa o le a tulaga lelei i le taimi nei; o le a alualu i luma a latou pisinisi. Ou te iloa na valaauina e le Atua le perofeta, ma o le aoaoga o le ola tutoatasi o se faaaliga mai ia te Ia.”

Mo Alexandra, o lana molimau, taua o le tagata lava ia, ma le auauna atu i isi, o mea mautinoa ia ua aoga ai le galue. ■

**“E i ai sau uo e lagonaina e pei e
leai ni ana uo i le lotu sei vagana
ai a‘u. O le a se mea e mafai ona
ou faia e fesoasoani ai ia te ia?”**

le tulaga lenei, atonu o loo ia lagonaina le le amanaiaina, tuua toatasi, po o le vaivai. O le mea e lelei ai, ona o lau faauoga, e i ai ni nai mea e mafai ona e faia e faamalosiau ai ia te ia:

- Fesoasoani ia te ia e faauo atu i isi tamaiti o le autalavou. Faailoa atu o ia ia i latou, ia faaaofia o ia i au talanoaga ma i latou, ma fautua atu gaoioiga mo le autalavou o lau uarota e faamasani lelei ai le tasi i le isi. Ma le isi, e mafai ona e talanoa i lou peresitene o Tamaitai Talavou ina ia mafai ona fesoasoani mai o ia ma isi taitai.
- Fesoasoani ia ona iloa lona taua e faavavau. E mafai ona e ta‘u atu ia te ia nisi o uiga lelei o loo e vaaia ia te ia.
- Fesoasoani ia ona manatu le alofa o le Faaola ma lou alofa. Na fetalai le Faaola, “O au nei o le leoleo mamoe lelei, ua ou iloa au mamoe, ua iloa foi a‘u e a‘u mamoe” (Ioane 10:14). E tusa lava pe manatu o ia e leai se tasi e malamalamama, peitai, o le a silafia lelei e le Alii ona lagona. Tatalo mo ia, ma ioe, faaali atu lou alofa mo ia e ala i le faaaofia o ia i gaoioiga ma talanoa ia te ia i le lotu.
- Fautua atu i ai, ia liliu atu i tusitusiga paia ma le tatalo e faamalosia ai lo latou sootaga ma le Tama Faalelagi ma Iesu Keriso.
- Ae o le mea taua lava, ia uunai o ia e auai e le aunoa i le lotu, e tusa lava pe faigata ia te ia. Faamanatu atu ia te ia le taua o le tagofia o le faamanatuga ma le aoaoina o le talalelei i sauniga Lotu.

Afai e le vave ona aoga ou manatu, ia faaaauau pea ona e i ai iina mo lau uo ma faamalosiau o ia e fai le mea sa‘o.



la Malolosi Atu Faatasi

Ia uunaia ma fesoasoani ia te ia e fai atu i isi tagata talavou. Tatou te malolosi pe

a na o i tatou taitoatasi, ae tatou te malolosi atu pe a faia faatasi. Fai atu i au uo o le a lelei atu ona ia fesoasoani i le faatupulaia o le malo o le Atua pe afai e i ai ni ana uo se toatele, o e o le a aoaoina o ia, avea ma se lagolago i lona olaga, ma fesoasoani ia te ia ia alofa ia Iesu Keriso ma Lana talalelei!

Scarlet M., 16 tausaga, Cautín Province, Chile

Valaaulia o la i Gaoioiga

Ina ua ou auai i le Ekalesia, sa ou lagona le tuuatoatasi, e ui ina sa taumafai nisi o le autalavou ia matou fegalegalea’i. Sa ou alu i gaoioiga o le Mutualie ma atili ai ona ou aofia i a latou talanoaga. Sa ou faalogo ia i latou ma tuuina atu lo‘u sao. Sa ou ataata atu ia i latou ma faaali atu le fiafia moni ia i latou. O la‘u fautuaga, ia e fesoasoani i lau uo e faasoa atu ona manatu ma lagona. Fesoasoani ia te ia ia auai i soo se gaoioiga a le Ekalesia, ma o le a amata ai ona fiafia i le faauoga a ni uo se toatele.

Faith O., 17 tausaga, Abia, Nigeria



la Faaaofia o la

Ou te taumafai e fesoasoani ia faaaofia lau uo i talanoaga ma gaoioiga faatasi ma isi talavou i le lotu. E

mafai foi ona fesoasoani le talanoa atu i isi uo lelei e uiga i lagona o lenei uo. O le talosaga atu mo le latou fesoasoani ia faaaofia o ia e ono aumai ai



le nefouta i isi uo i manaoga o lenei tagata, ma fesoasoani ai ia latou ia agalelei atili ma faaaofia o ia i talanoaga ma gaoioiga.

Trevor C., 14 tausaga, Idaho, ISA

Ta'u Atu ia te la Lona Taua ia te Oe

Sa faapena uma lava o'u lagona ina ua suia la'u uarota. E faigata tele lena tulaga. E taua le ta'u atu i lau uo lona taua tele, le tele o lona taua ia te oe, ma ona uiga lelei o loo i ai, ina ia ona lagona ai le lototele ma e le tatau ona fefe o ia. E taua uma lava i tatou. Uunai o ia e talanoa atu i se taitai, tatalo, ma faitau i tusitusiga paia e iloa ai e le o tuua na o ia.

Sharon G., age 14, Yucatán, Mekisiko

Ia Saunia e Fesoasoani Atu

E mafai ona e fesoasoani ia malamalama o ia, o i tatou uma o tagata o le aiga o le Atua, o uso ma tuagane, ma e tatau ona ia faaali atu le alofa ma fegalegalea'i ma tagata uma. Ma le isi, ta'u atu ia te ia, i totolu o le tatou aiga faaleagaga toatele, tatou te saunia i taimi uma e fesoasoani ma faamalosi i le tasi ma le isi. E tutusa uma lava la tatou sini o loo tatou taumafai i ai. I totolu o le talalelei, tatou te le lagona ai lava le tuuatoatasi.

Sister Anna Kaigorodova, Misiona a Moscow Rusia

Faalogo i le Taitaiga a le Alii

Tatalo mo ia ma ole atu i le Tama Faalelagi e fesoasoani ina ia e iloa le ala e mafai ona e fesoasoani ai ia te ia. Talanoa i ou taitai ma tau-mafai e faaaofia o ia i talanoaga ma isi teineiti i le lotu. Ia faaauau ona avea ma ana uo ma fai le mea sili e


te mafaia, ma o le a fesoasoani atu le Alii ina ia e iloa le ala e fesoasoani ai ia te ia.

Anastasia B., 18 tausaga, Iuta, ISA

Talimalo i se Pati

E mafai e oe po o ia ona talimalo i se pati ma na o ni nai tagata mai le lotu. E lelei atu le faamasani i isi pe a o se vaega toalaiti.

Travis H., 13 tausaga, Idaho, ISA



Ta'u Atu ia te la E Le Tuua Lava Na'o la

O le mea muamua, tatou te tatalo mo lena tamaitai talavou ma valaaulia o ia i gaoioiga taitasi po o galuega fesoasoani, ina ia mafai ona ia lagona o ia o se tasi o le vaega. Ia aua ne'i o tatou tuuina soo se tasi e pau! Lona lua, Tatou te fai atu ia te ia, e le o tuua lava na o ia, o loo faatasi e le aunoa le Tama Faalelagi ma i tatou ma e alofa tele ma faavavau o ia ia i tatou. Tatou te faamanatu atu ia te ia le upusii mai lo tatou perofeta: "O le a i ai se aso tou te mafaufau ai i o



O SE UO MONI

"Tatou te taufai manaomia uma lava ni uo moni e alolofa ia te i tatou, e faalogo

mai ia i tatou, e faasino mai ia i tatou le ala, ma molimau mai ia i tatou i le upumoni, ina ia mafai ai ona tatou faatumauina le mafutaga ma le Agaga Paia. E tatau ona avea oe o sea ituaiga o uo moni."

*Peresitene Henry B. Eyring, Fesoasoani Muamua i le Au Peresitene Sili, "O Uo Moni," *Liahona*, lulai. 2002, 32.*

outou olaga ma toe tepa i o outou taimi faigata, ma o le a outou iloa ai na i ai lava o Ia iina e le aunoa i ou autafa." (Thomas S. Monson, "E Le Tuua Lava Na o i Tatou," *Liahona*, Nov. 2013, 124).

Yenifer S., 18 tausaga, ma Fernando P., 18 tausaga, Tacuarembó, Iurukuei

FESILI O LE A SOSOO MAI

"E mafai faapefea ona ou fesoasoani i au uo e faatoilalo ia faafitauli e pei o le palauvale po o le tele o taaloga faavitio?"

Auina mai lau tali ma, afai e manaomia, se ata manino lelei ae lei oo i le aso 15 o Setema, 2016, i le liahona.lds.org po o le i-meli i liahona@ldschurch.org.

Faamolemole ia aofia ai faamatatalaga nei: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 o tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

E ono faapupuuina tali mo le uumi po o le manino.



Saunia e Elder
Timothy J. Dyches
O Le Fitugafulu

Pe a tatou
iloaina tatou
te faalagolago
i le Atua, tatou
te iloa foi o loo
naunau o la e
fesoasoani ia
i tatou.

UA NA OLE FESOASOANI MAI LE ATUA

Olo'u tausaga faai i le aoga maualuga na aumaia ai se luitau ou te le faamoeoeina. E lei leva ona amata le aoga, ae tofia au e lou faiaoga o lauga e auai i se talanoaga faafinauga. Sa matou suesue, faataitai, ma tauva, ma sa ou aoaoina ma le lotomaualalo le tele o lesona taua.

I ni masina mulimuli ane, ma le fa vaiaso ao lumanai le tauvaga lauga a le setete, sa na ona faailoa mai lava e lo'u faiaoga ia te au faatoa ia faauluina foi lo'u igoa e tauva i le tauvaga lauga e nao le 30 minute e saunia ai. Sa amata ona ia faamalamalama mai faapea i le aso muamua o le a ou manaomia e tuuina atu e le itiiti ifo ma le tolu lauga eseese e tai fitu minute i luma o se au faamasino.

Ma sa i ai se isi faafitali—o autu o lauga o le a tofia e piki mai i ni mataupu i le taimi lava lena, ma na o le 30 minute e saunia ai. Sa ou ofo lava; ou te lei vaai muamua lava i se tauvaga lauga puupuu faapea.

O le sauniuniga i vaiaso o totoe, i le faitauina o le tele o tusiga e faatatau i faafitali o aso nei ou te mafaia, sa ou lagona lava le lofituina i le masalosalo ma le popole patino. I le aso o le tauvaga, sa ou fesili atu i taitai, "Ua uma ona ou seiina lau autu, ae pe mafai ona ou alu i totonu ma faalogo mo se lua minute i se tasi o loo faia moni lava se lauga?" Na latou tali mai, "E na o le 30 au minute. Afai e te manao e faaalu ai e faalogo, pule a oe."


Fesili atu mo se Fesoasoani

O le taimi muamua lava lena, sa ou alu ai ma faalogologo mo ni nai minute e sili ona

tauau. Sa ou iloaina sa manaomia ona ou nofo toatas i tatalo i lo'u Tama Faalelagi. Sa ou iloa atu se togalaau tuufua i le lotoa o le iunivesite i autafa o se vaituloto e mafai ona nao au ai lava, i ou tulivae.

Ou te aioi atu i le Tama Faalelagi mo se fesoasoani. Sa le o se tatalo ia manumalo —o se tatalo faatauanau mo le fesoasoani a le Agaga Paia ina ia ou mafai ona faia se mea ou te lei faia muamua ma ia manuia mai i lenei luitau. Sa ou iloaina sa ou manaomia le fesoasoani a le Atua.

Sa tali mai le Tama Faalelagi i la'u tatalo. Sa ou manatuaina mea sa ou suesueina ma sa mafai ona fesootai atu mea moni ma uunaiga. Faatasi ai ma autu fou taitasi e pikiina, ou te



muamua lava alu e tatalo. Ona ou alu ai lea e galue. Na matuai ofo lava i le aso na sosoo ai i lou oo atu i le taamilosaga faaiu.

Sa atiina ae lo'u faatuatua i le Atua i totonus o la'u molimau, ma o lo'u faatuatua na tuputupu ae malosi a o ou lagonaina o Ia ua latalata mai. Ou te faafetai i le Tama Faalelagi mo le fesoasoani sa ou mauaina, aua ina ua uma ona faia mea uma e mafai ona ou faia, na Ia faia le mea e sili atu mo au nai lo le mea e mafai ona ou faia e au lava ia (tagai i le 2 Nifae 25:23).

I lo'u olaga faalegaluega, sa ou fomai tipitipi mo taliga, isu, ma le faai. I se tasi taimi i Reno, Nevada, ISA, sa valaauna a'u e fesoasoani i se vaega o galulue i le falemai mo tamaiti tigaina ao latou togaftia se pepe tama augapepe na wave tele ona fanau mai. O lena alii laitiit na faatoilaloina nisi o luitau faigata i nai masina muamua o le olaga ma lava ai le malosi e alu ai i le fale ma ona matua ma le aiga.

Ae paga lea, ina ua mavae le i ai i le aiga mo le lua masina, o lenei ua toe foi mai i le falemai ma se siama matuia i lona māmā agavale, ma sa le manuia vailau malolosi.

O tagata tomai faapitoa mo le vaega tigaina sa masalosalo o le pepe na manavaina se mea lea na mau i lona māmā, ae sa le o faaalia mai i soo se faaata. Ona o lona tulaga ua tigaina tele, na latou fautuaina ou te vaai atu i totonus o ona māmā ao moe o ia i le potu tipitipi.

I le taimi matou te le'i maua le teknolosie vaai mamao lelei ai i lalo i ala ea laiti o tamaiti laiti. A o matou galulue ai e tape le siama mai lona māmā agavale, mo sina taimi puupuu lava sa ou vaai ai i le mea sa ia manavaina i totonus—o se fasi valigao samasama malosi, o loo lavea e matuai mamao ese mai lava e le mafai e soo se meafaigaluega ona aumaia.

O se tausimai i le potu tipitipi ma iloaina le ogaoga o le tulaga

Sa le o se tatalo ia manumalo. O se tatalo ia ou mafai ona faia se mea ou te lei faia muamua.



Na oo mai le manatu i lo'u mafaufau: "E te faia le mea sili. Ona mafai lea ona ta faia faatasi lenei mea."

ma ta'ua ai sa ia vaia se meafaigaluega umi, ma lauiti na faaaoga i le aveeseina o maa o fatugao mai ni nofoaga vaiti. Sa vave ona ia aumaia se tasi, o se ato e fai i uea e lauiti ma fegauigauiai ma taamilomilo e mafai ona matala le taamilomilo e lava lelei pe a faaogaina e aumai ai se tamai maa e aunoa ma le faaleagaina o vaega o siomia ai. Ae faapefea ona oo i ai?

"Ou te le Mafaia Lenei Mea na o Au"

Sa ou fesili atu i le fomai o le vaigase e faaauau pea ona galue i le matou mai laitiiti mo sina taimi, ao ou alu atu i le tulimanu o le potu tipitipi. "Tama Faalelagi, ou te le mafaia lenei mea nao au." Na oo mai le manatu i lo'u mafaufau: "E te fai le mea sili. E mafai ona ta faia faatasi lenei mea."

Sa ou faataitaia mo ni nai taimi le tatala ma faamau le ato e fai i uea i o'u lima i ni tulaga eseese. I le

matuai faaeteete lava, na aveina atu le ato e fai i uea e le meafaigaluega seia oo tonu atu i le valigao. Faatasi ai ma ni gaoioiga agavaivai maaleale, sa oo atu i lalo, matala, ona faatagaina lemu lava lea e tapuni. O lenei la ua manino ma mama le ala ea.

I le aveesea ai o le vali gao, o le tamaitiiti sa vave ona toe manuia ma malosi. Sa tea o ia i tua i totonus o le vaiaso ma se fagu laitiiti o loo i ai se faamanatu e lanu samasama malosi.

Ou te iloa sa ou mauaina le fesoasoani faalelagi, e moni lava ia te au e pei lava o se lima alofa na taialaina lou lava lima.

Ou te tuuina atu molimau faatauvaa o le fautuaga ma le taitaiga e tuuina mai e le Tama Faalelagi. E i ai taimi faatoo mafai ona e faia se mea e tatau ona e faia i le fesoasoani a le Atua. I ia taimi faapea, i taimi uma, "e manatua o ia o ou ala uma ona faatonuina ai lea e ia ou lava ala" (Faataoto 3:6). ■





Saunia e Peresitene
Thomas S. Monson

AUALA IA TUMAU AI LE AGAVAA

Ua lava le umi ua ou ola ai e molimauina ai le tele o le suiga o le uiga mama o malo. I se tasi taimi na tele lava ona tutusa tulaga faatonuina o le Ekalesia ma tulaga faatonuina o malo, o lea ua i ai se vā tēle i lo tatou va, ma o loo faatupulaia pea lena va.

O le tele o ata tifaga ma televise o loo faaalia ai ata o uiga ia e faasagatau tonu lava i tulafono a le Atua. **Aua nei noatiaina oe lava ia i mea eleelea taumatemate ma manino** ia e masani lava ona maua iina. O upu i le tele o musika o aso nei ua i ai foi i le faavasegaga lava lea e tasi. O gagana masoa ua matua taatele ia i tatou i aso nei sa lei taliaina i se taimi e lei mamao tele atu. Ou te aioi atu ia te outou **ia aua nei tautala ai pe faia soo se mea tou te le mitamita ai.**

la matuai alu ese lava mai ponokalafi. Aua lava e te faata-gaina oe e matamata i ai. Ua faama-onia lona avea ai ma se vaisu lea e matuai faigata lava ona faatoilaloina.

Aloese mai le ava malosi ma le tapaa po o soo se isi lava fualaau faasaina, e faapena foi vaisu ia o le a faigata ona e faatoilaloina.

O le a le mea o le a puipuia oe mai le agasala ma le leaga ua siomia ai oe? Ou te folafola atu o se molimau malosi o lo tatou Faaola ma Lana talalelei o le a fesoasoani e taitai oe i le saogalemu. Afai e te lei **faitauina le Tusi a Mamona**, faitau i ai. Afai tou te faia ma le agaga tatalo, ma se naunautaiga faamaoni ina ia iloa le upu moni, o le a faa-ali mai e le Agaga Paia ia te outou lona moni. Afai e moni—ma e moni lava—o lona uiga o Iosefa Samita o le perofeta na vaai i le Atua le Tama ma Lona Alo o Iesu Keriso. E moni le Ekalesia. Afai e te lei maua lava se molimau o nei mea, ia e faia mea e tatau ai ina ia maua ai se molimau. **E ttau mo oe le i ai o sau lava molimau**, aua o le molimau a isi e faatapulaa lona aoga mo oe. A maua loa, e manaomia e se molimau ona



faatumauina le taūa ma le ola e ala i le usitai i poloaiga a le Atua faapea ma le tatalo e le aunoa ma le sueue i tusitusiga paia. Auai i le lotu. Auai i le seminare.

Afai o i ai se mea e le talafeagai i lou olaga, ua i ai se auala e faatoilaloina ai. **la taofi soo se amio-letonu.** Talanoa i lou epikopo. Pe o le a lava le faafitalui, e mafai lava ona faaleleia e ala i le salamo tatau. E mafai ona toe faamamaina oe (tagai MF&F 58:42).

Na faamatala e le Faaola o tagata, o ia lava sa i ai i le lalolagi ae lē o se tasi o le lalolagi. E mafai foi ona tatou i ai i le lalolagi ae le o ni o le lalolagi pe a tatou teenaina manatu faavae sese ma aoaoga sese. Tumau ma le faamaoni i mea ua poloaiina ai i tatou e le Atua. ■

Mai se saunoaga i le konafesi aoao ia Aperila 2011.

SAILIGA MO LE ATUA



Ou te le'i lagonaina lava se faalogona malosi o le toafilemu e pei ona sa ou lagonaina ina ua ou auai mo le taimi muamua i le seminare.

Saunia e Ismael Ezequiel

Polanco Almonte

Pe tusa na'o le valu o ou tausaga, sa ou mafaufau ai e uiga i le natura o le Atua. I se tasi aso, sa faitau ai e lo'u tama le mau mai le tusi a Iakopo lea o loo folafola mai ai, afai e leai so tatou poto, e mafai ona tatou "ole atu i le Atua, e foai tele mai . . . i tagata uma, ma le le toe ta'uta'ua; ona foaiina mai ai lea ia te ia" (Iakopo 1:5). O na upu sa faatumulia ai lo'u loto ma sa tusia i lo'u mafaufau.


Ina ua na o a'u i totonu o lo'u potumoe, sa ou tatalo i le Atua, ma fesili atu ia te Ia e ta'u mai ia te a'u pe na sa'o le lotu sa ou auai. Sa ou manao ia te Ia e tali vave mai. Ae sa lei tupu lena mea. Sa le'i faia e le Atua le mea na ou manao i ai, ma sa ou

faanoanoa ona sa le'i vave tali mai o Ia i la'u tatalo. Sa ou fia iloa! Sa ou faia le mea sa ou manatu ua lava.

O le tuputupu a'e, sa ou maua ai le avanoa e saili ai i le tele o lotu mo le tali. A o ou faia, sa atili ai lava lo'u fenumia'i. Sa feteenai le tasi ma le isi, ma sa na ona latou sopo loa i a'u fesili e uiga i le natura o le Atua.

I tausaga mulimuli ane, ona o le lelava i le sailiga, sa ou faapea ai, "Ua leai se tali."

Sa amata ona ou faia mea sa faia e le autalavou i aso nei, e pei o le alu i pati ma le auai i le tele o mea fiafia a le lalolagi. O vaiaso taitasi sa atili ai ona ou magoto atu i le pogisa ona sa le lelei a'u faaiuga. O mausa leaga sa faapea foi ona ou taumamao ai mai lo'u aiga, o e sa lagolagoina a'u i taimi uma.



Peitai sa toe foi mai ia te a'u le manao e ole atu i le Atua. Sa ou tatalo, "Le Tama e, o loo o'u faatalitali atu iinei. Sa ou sailili, ae ou te le'i mauaina lava. O loo folafola mai e tusitusiga paia ia tali, ae e leai se mea o oo mai. Silasila mai ia te a'u. Ua na o a'u. Ou te fia iloa, ae ou te le iloa pe faapefea ona maua Oe."

I le na lava taimi—e le'i tupu muamua pe na toe tupu mulimuli ane, ae i le taimi tonu lava na ou manaomaiina ai—sa ou lagonaina le malosi o le mu o lo'u fatafata e pei sa i ai i totonu o a'u se maugamu. Sa le mafai ona ou taofiofia loimata. Sa ou iloaina o le tali lea i la'u fesili.

I le aoauli, a o ou i ai i le aoga, sa ou mafaufau ai e uiga i la'u tali, ae fesili mai loa la'u uo lelei ia te a'u, "O le a le mea o loo e mafaufau i ai, Isamael?"

Ou te le'i tuuina atu ia te ia se tali sa'o, ma fai atu ia te ia sa ou mafaufau i le matafaga ma sa ou fia alu e vaai i le oso a'e o le la i le taeao. Sa ou valaau-liaina o ia ma te o.

"E le mafai," sa ia fai mai ai, ma ataata.

"Aisea?" Sa ou fesili atu ai ia te ia. "O a au mea e fai i le taeao po?"

"Seminare" sa ia fai mai ai.

"Seminare? O le a le seminare?" Sa ou fesili atu ai ia te ia. Sa ia faamatala mai ia te au, o ni vasega sa fai e lana ekalesia.

"O le a le umi talu ona e alu i se lotu?" Sa ou fesili atu ai ia te ia, ma le te'i.

"O le umi lava e mafai ai ona ou manatua. O au o se tagata o Le Ekalesia a Iesu Keriso o le Au Paia o Aso e Gata Ai."

Sa ou fai atu ia te ia ou te fia alu e vaai. Sa ou iloaina i totonu [o lo'u loto] o le tali lea i tele o tausaga o o'u tatalo.

O le aso na sosoo ai, sa ou ala i le 5:30 i le taeao ma alu atu i le seminare. O le mea na sili ona ou te'i ai, ona sa latou suesueina le Tusi Paia. E mafai ona ou faapea atu, ou te le'i lagonaina muamua lava se faalogona malosi o le toofilemu e pei ona sa ou lagonaina ina ua ou ulu atu i le falelotu o le paranesi i Matancita, i le Dominican Republic, lea sa faasoaina ai aoaoga faavae mama, e matagofie i se agaga sa faapea ona sailia ma le naunautai. O viiga sa faatumulia ai lo'u mafaufau ma lo'u loto i se manatu: "O le mea moni lenei."

Sa ou faapea, "Oka, ou te manao e lagona lenei mea i aso uma." Sa ou fesili po o afea e mafai ona ou toe sau ai, ma sa tuu mai e le faiaga, o le uo a lo'u tina, aso ma taimi faatulagaina o le vasega ma valaaulia foi a'u ou te sau i sauniga a le paranesi i le Aso Sa.

Talu mai lava lena taimi, o Aso Gafua e oo i Aso Faraile uma lava, ou te ala ai i le 5:30 e alu i le seminare ma Aso Sa uma i le lotu. Sa le mafai ona ou misia. Na ou mauaina le mea sa ou sailia i taimi uma lava.

O le mea e faanoanoa ai, sa leai ni faifeautalai e aaooina ma papatisoina a'u. Ina ua mavae se tausaga ma le afa ma le tele o tatalo, sa taunu mai loa faifeautalai ma aaooina au i lesona uma a faifeautalai i totonu o se vaiaso. Ou te manatua le taimi na loloina ai a'u i totonu o vai lanumoana o le matafaga matagofie a le matou nuu.

O lenei ua ou fiafia i le faamanuiaga o le le toe avea ma se tagata ese po o e aumau (tagai Efeso 2:19 ae o se uso o i latou uma o e ua ui atu i le ala a le Alii, le ala sa'o ma le vaapiapi. ■

*E alala le tusitala i Santiago,
Dominican Republic.*



Saunia e Elder
Randy D. Funk
O Le Fitugafulu



Ia I Ai ile Mea e Ao ona Tatou IAi

Sa ou nofo i Manti, Iuta, ISA, ina ua 11 o'u tausaga. I le amataga o le tausaga, sa aumai ai e lo'u faiaoga Peraimeri se tama'i to'i manaia e mafai ona e tata fafie ai.

"O ai lava e sili ona tele ana sau i le Peraimeri i le tausaga lenei, e avea ma ia le to'i," sa ia fai mai ai. O le taimi lava lena sa ou filifili ai e sau i vайaso uma. I le faaiuga o le tausaga, sa ou mauaina ai le to'i!

E le'i leva ae oo mai lo'u aso fanau e 12 [ai o'u tausaga]. Sa faauuina a'u o se tiakono. I le vaitaimi foi lea, sa siitia atu ai

lo'u aiga i Madison, Wisconsin, ISA. Sa ou misia a'u uo, ae sa ou fiafia e faia ni uo fou. Sa sili atu le tele o Madison nai lo o Manti. Sa toatele foi la'u aoga fou. Sa le'i toatele ai ni tagata o le Ekalesia. I se tasi aso na valaaulia ai a'u e ni tamaiti lauiloa i se pati. Peitai, sa faia le pati i le po lava lea e tasi sa fai ai se gaoioiga a le Ekalesia. Sa ou aoaoina mai i lau aafiaga i le Peraimeri e tutupu mea lelei pe a ou faamaoni i le auai i au sauniga o le Lotu. Sa ou faafetai ia i latou mo le valaauliaga o a'u, ma sa ou

faamatala i ai le pogai na le mafai ai ona ou alu.


O le aso na sosoo ai ina ua uma le pati, sa talanoa ai tagata uma i le aoga e uiga i ai. Sa inu a latou ava malosi i le pati, ma o tagata uma lava sa o ai, sa oo i ni faafitauli se tele. Sa ou matuai faafetai lava ona sa ou i ai i le nofoaga sa tatau ona ou i ai.

Ou te faafetai foi ona sa ou alu i le Peraimeri ma isi fonotaga a le Eklesia a o ou tuputupu ae. Sa ou aoaoina ai ni lesona taua e uiga i le talalelei. Ma sa ou maua ni taimi malie ma fiafia i gaoioiga. E faamanuia i tatou e

FAALATALATA ATU IA IESU

I le lotu, tatou te aoao pe faapefea ona faia ni filifiliga lelei ma avea atili o ni soo o Iesu. Faatumu ia avanoa ina ia fesoasoani i tamaiti o loo i ai i ata e iloa mea e ao ona faia.

1. "A ia outou _____ outou." (Efeso 4:32)
2. "Amuia e _____. " (Mataio 5:9)
3. "Pe a outou _____ i o outou uso a tagata, ua nao lo outou auauna atu lava lea i lo outou Atua." (Mosaea 2:17)
4. "Afai o i ai nisi mea _____, matagofie, pe logoleleia _____, matou te saili atu i nei mea." (Mataupu Faavae o le Faatuatua 1:13)



le Tama Faalelagi pe a tatou taumafai ia tatou i ai i nofoaga e tatau ona tatou i ai, ma fai mea e tatau ona tatou faia. Na te faamalosia o tatou faatuatua. Na te puipuia i tatou mai faaosoosoga ma agasala.

E faamalosia e le Tama Faalelagi lo tatou faatuatua ma faamanuia i tatou pe a tatou taumafai ina ia i ai i le mea e tatau ona tatou i ai ma fai mea e tatau ona tatou faia.

I le Mataupu Faavae ma Feagaga 88:63, na fetalai mai Iesu, "Faalatalata mai ia te au ma o le a Ou faalatalata atu ai ia te outou." ■

A o tatou auai i a tatou sauniga o le Ekalesia, e aofia ai le sauniga faamanatuga, e atili ona tatou vavalalata i le Tama Faalelagi ma Iesu Keriso. Tatou te aoao upumoni e taua e taiala ai a tatou faaiuga i le aluga o le vaiaso, e oo i taimi tatou te le o i ai i le lotu po o le siomia e isi o e tutusa a tatou talitonuga. A e ola amiontonu, o le a fesoasoani le Agaga Paia ia te oe e iloa le nofoaga e tatau ona e i ai ma mea e manaomia ona e faia. ■

*Aisea o le a ave ai e
Tamamatua se atigifau e
leai se mea o i ai ia Gage?*

O Le Tama'i Fagu ole Filemu

Saunia e Ray Goldrup

E faavae i se tala moni

"Ou te tuuina atu ia te outou le manuia, o lo'u manuia ou te avatu ai ia te outou" (Ioane 14:27).

Sa faataupupula atu Gage i le Tama'i fagu tuai e leai se mea o i totonu ma fefulisa'i i luga o ona lima. Sa laitiiti ma lanumeamata puaoa, ma se momono i le pito i luga. Sa tuuina atu e Tamamatua Russell ia te ia ina ua uma lona papatisoga.

"O le a lea *mea*?" na fesili ai Gage. "Ou te iloa o se fagu—ae e le o i ai se mea i totonu."

"Oi, o loo tumu," na fai mai ai Tamamatua.

Sa lulu e Gage le fagu. "Ae, o la'u vaai e leai se mea o i ai."

Na ata Tamamatua. Sa ia aveesea mai le momono ae tuutuu atu faatalata le fagu i le taliga o Gage. "O e faalogo atu i ai?" sa ia musumusu ai.

"Faalogo i le a?" Sa toe musumusu atu ai Gage.

Sa ataata tamamatua. "Filemu," na ia fai mai ai. Sa ia toe faamauina le momono o le fagu. "I le lalolagi i aso nei, ua fai lava si faigata ona maua o le filemu. E pei o le vai mai le fomai, ma o mataua taitasi e taua pei o le auro."

Sa faafetai atu Gage ma ave le mealofo ese lava a Tamamatua i le fale. Peitai sa le'i mafaufau tele i ai o ia.

O ni nai vaiaso mulimuli ane, ma maliu ai Vini le uso matua o lona tama. Ina ua uma le falelauasiga, sa toatele tagata o le aiga sa tumutumu i le potu i luma o le fale o Gage e asiasi atu. Sa sola Gage i lona potumoe ma tapuni le faitotoa. Sa ona lagona atu leo o ona matua ma ona aiga i lalo o le potu tele.

Sa iloa atu e Gage le tama'i fagu tuai lanumeamata o loo tutu i luga o lana kesi ma uu mai loa. Sa ia



fefulisaia i luga o ona lima. Na fai mai Tamamatua o le filemu sa pei lava o se vai mai le fomai. Sa manaomia e Gage ona maua sina toofilemu ma se faamafanafanaga i le uma ai o le maliu o Vini, le uso o lona tama.

Sa se'i ese e Gage le momono mai le fagu ma faasipa le gutu o le fagu, ma faafoliga o loo liligi mai i fafo sina filemu. Sa ia iloaina sa le'i tumu *mo'i* le fagu i le filemu. Ae sa ia iloaina, sa ia manaomia sina taimi paganoa ia lagona ai le latalata atu i le Atua.

Sa ia lagona le amata ona tumu o ona mata i loimata. O le a le toe i ai

iina le uso o lona tama, o Vini—e le toe i ai ni mea ula faavalevalea, le toe i ai ni piiga ma ia. Sa tiga le loto o Gage ona o le misia o ia.

Ma i le filemu, na lagona ai e Gage se faalogona mafanafana o tupu a'e i totonu o lona loto ma tuuitiitia ai le tiga. Sa ia manatuaina sa le aluese atu Vini e faavavau; sa na ona me'i atu o ia i le isi lalolagi. Ona o Iesu Keriso ma le ata o le faaolataga, o le a ola ai e faavavau tagata uma. Sa iloa e Gage e i ai se aso o le a ia toe vaai ai ia Vini le uso o lona tama.

A o ia uuina le fagu, sa lagona e Gage le toofilemu i totonu. Sa ia iloaina na mafua ona o le Agaga Paia ae le o le fagu. Sa na ona faamanatu atu e le fagu ia te ia, e filemu ina ia mafai ona ia lagona le Agaga Paia. Sa ia toe momonoina le fagu ma toe tuu i lalo.

Ona toe alu atu loa lea i le potu i luma e faatasi ai ma lona aiga. E mafai ona ia tauave le toofilemu ma le mafanafana o le Agaga Paia i totonu ia te Ia, e faapena foi i fafo o lona potu filemu. ■

E alala le tusitala i Iuta, ISA.



Saunia e Laura
Goodrich

E faavae i se tala moni

Sa tilo-
tilo atu
Litia ia Tina
o sauni mo
le galuega.
Ua fai e Tina
se vali laugutu
manaia piniki.
Sa aulelei o ia.

Sa tilotilo Litia i le
faaata. Sa ia lagona
le faanoanoa.
Na fai mai
Litia, "E leai
ma sa'u vali
laugutu."
"O lona

O Lima, o le Loto, ma se **Ataata**



uiga la, ou te le
aulelei."

Sa fusi mau
o ia e Tina. "O
le faia o le vali
laugutu e le o le
mea lena e faa-
aulelei ai tagata.

O le avea ma tagata
malolosi ma agalelei
e aulelei ai tagata.

"E te malosi ma agale-
lei pe a auauna atu
ou lima e fesoasoani
ai i isi.

"E te malosi
ma agalelei pe a
alofa lou loto i
tagata uma.

“Ma e te malosi ma agalelei pe a e ataata. O le mea lena e fiafia ai foi tagata uma e te vaai i ai.

“O le avea ma se tagata malosi ma agalelei e te aulelei ai i totonu, ae le na o fafo.”

Sa manao Litia ina ia avea ma se tagata malosi ma agalelei.

Sa faaaoga ona lima e ave ai le meli mo Tamamatua. Sa ia tuuina atu lana kuki sukalati mulimuli i lona tausoga.

Sa ia lagona le alofa i totonu o lona loto ina ua la taaalo ma se tuaoi fou. Sa ia lagona le alofa i totonu o lona loto ina ua ia tuuina atu ni sene i se teineitiiti sa aoina



ni tupe mo tagata e leai ni fale.

Sa ataata atu o ia i tagata sa vaai i ai. Sa latou ataata mai ia te ia.

O lena po, sa fai atu ai Lydia ia Tina, “E sa’o lava oe! Ua ou lagona le malosi ma le agalelei. Sa ou faaaogaina o’u lima ma lo’u loto ma la’u ataata ananei.”

Sa ataata Tina. “Ua e malosi ma agalelei, e pei ona finagalo Iesu ia avea ai oe!” ■

E alala le tusitala i Itua, ISA.






Saunia e
Elder D. Todd
Christofferson

O le Korama
a Aposetolo e
Toasefululuā

Aisea e taua tele ai aiga?



O aiga o auala sili ia ona lelei e
mafai ona manuia ai le fuafuaga
o le fiafia a le Atua.

O le fuafuaga a le Atua, e mo
alii ma tamaitai ia faaipoipo
ma maua ni fanau.

Ua tau mai foi e le Atua ia i tatou,
e tatau i matua ona aoao o latou
aiga e mulimuli ia Iesu Keriso.

O aiga faamaoni e fesoasoani i nuu
ma atunuū ia malolosi ma maloloina.

O LA TATOU ITULAU

Jesus é como mosso bom pastor e mos como as ovelhas!! Ele só quer cuidar de mos.



O Iesu e pei o se leoleo mamoe lelei, ae o i tatou o Ana mamoe.
E manao o la e tausí i tatou.

Victoria P., 10 tausaga, Itu o Federal, Pasila



Ua ou fiafia o a'u o se tagata o le Ekalesia. O Iesu Keriso o la'u uo ma e puipuia a'u ma lo'u aiga. Ou te fia asiasi i le malumalu. Ou te fiafia i afiafi faaleaiga ma le Peraimeri.

Angel M., 11 tausaga, Colón, Panama



Mo se sini i le matou tamaitusi o le Faatuatua i le Atua, sa matou filifili ai e fai se faataitaiga o le Malumalu o Montevideo Iurukuei. Na alu ai le tausaga o fai, ae na aoga lava. A atoa le 12 o o ma tausaga, o le ma sini ia mafai ona ma o atu i le malumalu.

Samuel O., 10 tausaga, ma Enzo S., 11 tausaga, Rivera Department, Iurukuei



O LOU TAIMI!

E mafai ona faasoai mai lou aafiaga, molimau, ma le ata i le O La Tatou Itulau. Imeli i le liahona@ldschurch.org ma ia aofia ai se faatagaga a matua, pe asiasi i le liahona.lds.org ma kiliki i le "Submit an Article."



Sa i ai se mea manai na tupu i le fitu o o'u tausaga. Sa ou manao e iloa pe moni le Ekalesia. O lea sa fai ai sa'u tatalo ma fesili atu i lo tatou Tama Faafelagi. Na uma la'u tatalo, ona ou taoto lea ou te moe. Sa fai sa'u miti lea na ta'u mai ai e Iesu Keriso ia te a'u, "O le Ekalesia moni lenei." Ina ua ou ala a'e, sa ou manatuaina la'u miti, ma na ou iloa ai, sa ou i ai i le Ekalesia moni.

Miranda R., 9 tausaga, Querétaro, Mekisiko


Na Molimau Atu Samuelu

O Samuelu o se perofeta ma o se sa Lamana. Sa ta'u mai e le Tama Faalelagi ia Samuelu e ta'u atu i sa Nifae amioleaga ia salamo. Sa le faatagaina e sa Nifae ia Samuelu i totonus o le latou aai, o lea sa tu ai o ia i luga o le pa o le aai. Sa latou tauai atu maa ma tafana atu a u ia te ia. Ae sa puipuia o ia e le Tama Faalelagi. Sa ta'u atu e Samuelu i tagata le mea na finagalo le Tama Faalelagi latou te faalogo i ai.



I se tasi taimi sa ou fefe
ai ona sa tuuina atu la'u
molimau. Ina ua tuuina
atu la'u molimau, sa ou
le fefe.

*Chase C., 6 tausaga,
Arisona, ISA*



Lauren P., 11 tausaga, Iuta, ISA



Oti, gagau, ma teu lenei kata o le lu'i!





E Mafai Ona Ou Molimau Atu!

- Tauloto le Helamana 14:8.
- Fesoasoani i isi ia filifili le mea tonu
e ala i le avea ma se faataitaiga lelei
i lenei vaiaso.
- Matamata i le mataupu e 40
o le tala o le Tusi a Mamona
i le scripturestories.lds.org.
- Ua ou luiina au lava ina ia . . .

O Mau o le Masina Lenei

A uma ona e faitaua se fuaiteau o mau, ona valivali lea o vaega o fuainumera e tutusa i luga o le ata!

- 1** Helamana 10:1–7, 14–18
- 2** Helamana 13:1–7
- 3** Helamana 14:2–8
- 4** Helamana 16:1–5
- 5** 3 Nifae 1:10–17, 21–24
- 6** 3 Nifae 2:1–2
- 7** 3 Nifae 8:2–7, 22–23
- 8** 3 Nifae 11:3–11, 13–17, 37–39



O Le Fetu Fou

O se tasi o mea na ta'u atu e Samuelu i sa Nifae, o le a le toe umi ae soifua mai Iesu Keriso ma o le a avea ma Faaola. O le a susulu mai se fetu fou pe a soifua mai Iesu. Sa feita nisi o tagata ma taumafai e fasi Samuelu. Sa talitonu isi i ana upu ma mananao ia papatisoina. Faitau e uiga ia Samuelu i itulau e 76–78. Ma vavaai mo se isi lu'i o le faitauga i le lomiga e sosoo ai! ■


Ua Aoao Mai Samuelu e uiga ia Iesu



O Samuelu o se perofeta. Sa pe'a o ia i luga o le pa o se aai e talai atu ai. Sa ia ta'u atu i tagata e tatau ona latou salamo ma ia faatuatua ia Iesu Keriso.


Sa aoao atu Samuelu o le a le toe umi ae soifua mai Iesu. O le a pupula mai se fetu fou. O le lagi o le a tumau ona malamalama i le po atoa!

Sa ia aoao atu e faapea, a maliu Iesu, o le a pogisa mo aso e tolu. E tele ni aai o le a faaleagaina.





Sa talitonu nisi o tagata
ma sa papatisoina. Sa
le'i talitonu isi ma sa
feitai. Sa latou tauai atu
maa ma tafana atu a u ia
Samuelu. Ae sa puipuia
o ia e le Atua, ma sa le'i
afaina o ia.



Sa taumafai tagata
sa le'i talitonu e pu'e
Samuelu. Ae na sola
ese Samuelu.



O le lima o tausaga mulimuli ane, na soifua mai ai Iesu. Na pupula mai se fetu i le lagi. Sa pei lava ona aoao mai Samuelu! ■

Mai le Helamana 13–15, 3 Nifae 1:13–15, 21

E Mafai Ona Ou Totogia le Sefuluai





Saunia e Elder
Matthew Cowley
(1897–1953)

O Le Korama a Aposetolo
e Toasefululua

VAVEGA

"Alu se feau i alii faifeautalai; e le o lelei tele la'u faalogo."

Ua sili laitiiti ma se tausaga talu ai, na o mai ai i totonu o lo'u ofisa se ulugalii ma sii mai se tamaitiiti laitiiti. Sa faapea mai le tama ia te a'u, "Ua lua aso o ma anapogi ma lo'u toalua, ma ua ma auamaia si a ma tamaitiiti mo se faamanuiaga. O oe lea na auina mai matou i ai."

Sa ou faapea atu, "O le a le mea ua tupu ia te ia?"

Sa la'ua fai mai, sa fanau mai o ia e tauaso, tutuli, ma gugu, e le galulue faatasi ona musele, ma ua lima tau-saga e le'i mafai lava ona totolo.

Sa ou faapea ifo ia te a'u lava, "Ia o lea la. 'Ua na o le anapogi ma le tatalo e o ese ai mea faapenei" [tagai Mataio 17:21].¹ Sa i ai lo'u faatuatua atoa i le anapogi ma tatalo a na matua. Sa ou faamanuiaina lena tamaitiiti, ma o ni nai vайaso mulimuli ane, sa ou mauaina ai se tusi: "Uso Cowley, maimau pe ana mafai ona e vaai i le ma tamaitiiti i le taimi nei. Ua totolo o ia. A matou togina se polo i le isi itu o le fola, e tope-tope atu i ai i ona lima ma tulivae. Ua mafai ona pupula. A patipati o matou



lima i luga a'e o lona ulu, e te'i o ia. Ua mafai ona faalogo."

Na togi solo o fomai ma fai mai ua leai se mea latou te mafai. Na suitu-laga mai i ai le Atua. . . .

Sa ou alu atu i se fale i se nuu laitiiti i Niu Sila i se tasi o aso. O iina sa tapena ai e tuafafine o le Aualofa le tino [maliu] o se tasi o le latou Au Paia. Sa latou tuuina lona tino i le pito i luma o se fale tele, e pei ona latou ta'ua ai, o le fale lea e o mai i ai tagata e tagitu'i ma tagiaue ma faavauvau ai i le tagata maliu, ae natinati mai loa i totonu le uso o le alii ua maliu. Sa ia fai mai, "Faauu o ia."

Ae na fai mai tagatanuu talavou, "Aisea, e le tatau ona e faia lena mea. Ua maliu o ia."

"Tago oe e fail!"

. . . Sa ma i ai faatasi [ma se toeaina Maori faamaoni]. . . . Sa tootuli ifo le tagatanuu talavou ma faauu lenei alii. Ona tootuli ifo ai lea o lenei toeaina maoae atamai ma faamanuia o ia ma poloaiina o ia e tulai.

A outou vaai i le taape a tuafafine o le Aualofa. Sa safai a'e o ia ma fai mai, "Alu se feau i alii faifeautalai; e le o lelei tele la'u faalogo." . . . Sa matou fai atu ia te ia, na faatoa uma ona faauuina o ia, ma sa ia faapea mai, "Oi, o lena la." Sa ia fai mai, "Sa ou oti. Na mafai ona ou lagonaina le toe foi mai o le ola i totonu ia te a'u, pei lava o se palani-keke o loo talatala." Sa umi atu o soifua o ia nai lo lona uso lea na sau i totonu ma fai mai ia i matou e faauu o ia. . . .

E i ai i le Atua le pule i nei elemene uma. E mafai e oe ma a'u ona aapa atu, ma afai o Lona finagalo lea, e mafai ona tatou aumaia na elemene i lalo o la tatou pule mo Ana faamoemoega. ■

Mai le "Miracles," New Era, Juni 1975, 39–44, o se tusiga na sii mai se saunoaga na tuuina atu i le faigalotu a le Iunivesite o Polika Iaga i le aso 18 o Fepuari, 1953. Ua faatulagaina faailoga, mataitusi tetele, ma le tetele o parakalafa.



What is our reason for hope?

"Afai tatou te tuu atu o tatou loto i le Atua, afai tatou te alolofa i le Alii o Iesu Keriso, afai tatou te faia le mea silisili tatou te mafaia e ola ai i le talalelei, o taeao la-ma isi aso uma-o le a iu lava ina ofoofogia, e tusa lava pe tatou te le iloaina i taimi uma e ofoofogia. Aisea? Ona e finagalo lo tatou Tama Faalelagi ia faapena! E finagalo o la e faamanuia i tatou. O se ola e faavavau, tauia ma faamanuiaina o le vaega autu lea o Lana fuafuaga alofa mutimutivale mo Lana fanau!"

E I Ai Foi i le Lomiga Lenei

MO TALAVOU MATUTUA



Mausali ia Keriso

O faafaigata le tetee atu i afa o le olaga?
Ua fautua mai e Elder ma Sister Clayton ni
aula e taula ai o tatou olaga ia lesu Keriso
ma iloa ai o tatou gafatia moni.

i.42

MO LE AUTALAVOU

FAIA O SE **OSO** I LONA LUMANAI

i.54

O le a le mea a tapoleni osooso e fai i le
amataga o se pisinisi? Feiloai ia Alexandra,
o se teineitiiti e 11 tausaga le matua mai
Mekisiko. E mafai ona ia faamatalaina atu.



MO TAMAITI



O Le Nofoaga e Tatau ona Ou I Ai

i.66

E tele auala e mafai ai ona tatou "tutu i
nofoaga paia." E mafai faapefea ona e tu i se
nofoaga paia, e tusa lava po o fea o loo e i ai?